

灌园集

吕南公

文硕阁

wenshuoge.com

目录

关于我们	3
提要	5
原序	6
目录	7
卷一	10
卷二	17
卷三	24
卷四	31
卷五	41
卷六	51
卷七	62
卷八	69
卷九	75
卷十	82
卷十一	87
卷十二	92
卷十三	96
卷十四	100
卷十五	105
卷十六	109
卷十七	114
卷十八	119
卷十九	123
卷二十	128

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部三

提要

灌园集二十卷 别集类二【宋】

【臣】等谨案灌园集二十卷宋吕南公撰南公字次儒南城人宋史文苑传称其於书无所不读於文不肯缀缉陈言熙宁中士方推崇马融王肃许慎之业【案熙宁中科举所用乃王安石三经新义及字说非马融王肃许慎之学此语殊为乖妄宋史荒陋此亦一端谨附纠其谬】剽掠临摹南公度不能逐时好一试礼闈不偶退筑室灌园不复以进取为意元佑初立十科荐士中书舍人曾肇上疏荐其不事俗学安贫守道堪充师表廷议欲授以官未及而卒陈振孙书录解题称南公欲修三国志名其斋曰袞斧将成而南公卒书亦不传惟其子郁编次遗文为三十卷然刊板久佚流传遂絶仅存抄本吕次儒集一卷惟录麻姑山诗二十四首福山诗一首及钱邓州不烧纸镗颂义鹰志龙母墓三篇盖後人从宋文监及麻姑山志抄撮而成十不存一今据永乐大典所载裒辑荟萃篇帙尚夥谨依类排次厘为二十卷虽不必尽符原数视世所传本则赅备多矣南公与汪秘校论文书自言於列庄六经百家十八代史因文见道沈酣而演绎之私心自许谓文学之事虽使圣人复生不得废吾所是惟当勒成一家俟之百世又曰尧舜以来杨马以前与夫韩柳之作此某所谓文者若乃塲屋诡伪刼剽穿凿猥冗之文则某之所耻者必若黄河泰山峻厚高简浑灏奔注与天地齐同而日月不能老之者此某之所以究心今读其集虽所言不无过夸然其覃精殚思以力追秦汉要亦毅然不惑於俗学者也乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

灌园集原序

刘梦得尝称潇湘间无土山无浊水民乘是气往往清慧而文吾鄉麻源地气殊异江山炳灵视潇湘间为不足道近时人物磊落相望其位于朝光显者固多而隱於韦布卓立杰出如灌园先生者世未必知之曾子固独爱重其文谓麻姑秀气世不乏人岂虚言哉先生幼而警敏力学不倦於书无所不读发为文章雄深浩渺自成一家羞同举子辈缀缉陈言气象萎茶迎合有司之好熙宁初尝预荐试春闱不利退而筑室灌园不复以进取为意益务着书讲道发挥圣贤妙旨且借史笔褒善贬恶垂世立训遂以袞斧名所居斋先生所养如此视一第得失奚足为轻重耶元佑中在朝诸公交口称荐欲命以官而先生不幸蚤世咸用?伤余先君昔与之游备知其贤每叹南城豪杰之士如李泰伯王补之及先生其才皆有大过人者而所享皆不永泰伯补之虽得卑位则旋而死先生且未及仕造物者何夺之速殆难以理推盖命也夫先生姓吕氏讳南公字次儒其子郁亦有学问能世其家收拾先生遗稿编成三十卷绍兴壬戌余领漕江右巡行到乡郁携以见访且属为序欲传不朽因循久未暇作後二年移宪浙部不远千里以书来请益坚义不得辞於是乎书南丰符行中序

目录

钦定四库全书

灌园集目录

卷一

五言古诗

卷二

五言古诗

卷三

五言古诗

卷四

七言古诗

五言律诗

卷五

七言律诗

卷六

七言律诗

五言絶句

七言絶句

诗余

卷七

议

论

序

卷八

序

卷九

记

卷十

书

卷十一

书

卷十二

书

卷十三

书

卷十四

书

卷十五

书

后

卷十六

传

颂

赞

铭

卷十七

杂着

卷十八

杂着

卷十九

墓表

墓志

墓志铭

卷二十

墓志铭

祭文

卷一

钦定四库全书

灌园集卷一 宋 吕南公 撰五言古诗

题仁乐亭

真山蓄幽奇伪山逞瑰怪峰峦纷变现座席疑广大未穿披云屐对此亦清快

虎泉

昔闻孤女子遇虎斯泉侧高僧为追诃弭耳不敢食岁月几何时称谈如宿夕故知事可传岂限涔泓窄

虚假行

虚假复虚假名陶不知瓦养子役于人不如生犬马公私严忌讳势利关取舍奉生既疎违死更苟且苴麻不敢服桐竹何由把未得久哀呼方当勤唯喏百年闻罔极一瞬经庐下岂不近冠裳驱牵到乖寡沾沾荷锄子言动只山野终制负凶纒兴辞泪如泻诸儒论鄙俗不若都人雅请问两间民谁为称情者

游子篇

游子朱门儿行乐畏不足遐方寒苦士自赞乞随逐朝驰锦鞞末夕讌凤屏曲雄豪弃残臄声色化耳目来时布素衣羞耻见罗縠几许膏粱味嗜好讳水菽劳劳车马尘苒苒岁月速家书懒拆封旧业废编牋间尝梦故国惊觉如被辱安知愜快余穷愁入皮肉趋承偶踰节况味稍蜷局长年倚恩辉积渐致轻瀆因逢故人语始叹误程躅都城名利场岂不多所欲从前入关客无虑共贫毒商鄮聚珍贗科举仰廩禄神乎夺我魄而独迷所属何人不谋身计虑自不淑寄声风尘子哀恨吾已酷当知帝里游有祸亦有福

莓莓原上田

莓莓原上田春至早已种塍塍樊间圃蔬好亦培?农家乐地利倚此拟微俸依随节序停领略儿孙衆徒耕有讙语各息无愁梦冷看里诸生焦心望郷贡

和道先从义同过张掾梅花下饮二首

山人如寒松无可媚鸞蝶谅非清峻契谁肯略顾接春城偶来至豪士懒举睫幽幽法曹厅一

往乃敢辄主人虽壮齿酷爱文字业相看论古书术不计勇怯陈家俊公子德义敦庆叶闻我
适过从逢衣遽披摄老成北扉掾喜客若渔猎招呼倒清樽促迫信重叠梅花香树下共醉死
牛脇勿忧侵暮冷坐我有毡麕飞飞落梅英绕座不待折煌煌画蜡烛未夜已戒设徵诗为罚
令献白作饮节谭高衡或争笑猛倒还絶李侯解县印心注象魏阙座中惜分?劝酒更酷烈春
先显父笋冬外尹吉鼈肴佳俎未竟酒美壶频竭更筹屡闻转归乘不许谒谁能避酩酊但恨
落角月

渠中水

咨尔渠中水源流本何许特无停滯分得此奔逝苦过村秽灌溉合涧浑沙土还当归海日亦
助云涛巨

野翠堂

重城似郊垧接眼尽苍翠无复见枯疎共疑春每至丘樊岂少此野叟不自贵

鸦声

鸦声噪人凶听者知惨然忠言论祸福受之如不闻禽口不可缄人言因义发畏禽而忽人使
我心如割

小虫

大螭身尺余辉彩盈首尾小虫未知名长不过半指相遭篱畔草错愕杂忧喜孤征有令凶忿
鬪莫我止交攻久腾突反覆召倾毁螭跳欲忘生虫怒乃抵死奔冲彻心腹刼捷沸唇觜方磨
雨?沙又堕足迹水肥无敏才智短有毒牙齿吾豪且深侵彼困漫决起壮躯俄奄奄恨血稍泚
泚虫休遂驰归少顷复临?安详衔螭鼻拖擦绕篱址却纳幽穴中其将食之矣人间有胜负不
在校形体楼兰虽雄王命尽傅介子新家巨无霸一战亦为鬼苟惟性资悍端可制魁伟君看
小虫威何独畏封豕

有虫

堂阴阙曲沼其浸可滥觞有虫宅其间游息能自将名号乱龟鼈形躯亚蜣螂何知一生微颇
以气调张秋风七八月泓浸稍减常低回尚飘然未若谋穴藏十月水泉竭泥沙暴枯霜迷迷
旧坻堦影迹类已藏延绵盈旻多天雨断霏霁皆言此虫絶躯殼应碎殭咨嗟亦含气所托异
慨慷迩来节令改泰卦直春阳甘霖一夕飞灌注成濊汪凌晨沼面涨虫辈早奋扬上下逞风
操同形喜相望如知出处时故以偁仄忘余尝舍其侧终始得瞻相因思物理深未易草草量
江海非不大其鱼每屠伤此沼固?浅其虫乃灵长浮生短与修有命不可襄运数苟未尽忧悲
岂其戕安危与时俱穷达须预防所以真至人如往皆暇遑

胜因院

庄严起何代幽佚惟天与有衆倚耕桑无人叹寒暑岚氛蠹金碧谷响酬钟鼓白昼方丈西犹眠听经虎

招豫亭饮

爱酒不日醉多为病相妨饥虚或伤脾饮过亦腐肠略困尚举白既颓方卧牀沈迷剧淹旬得疾岂可禳呕泄憎膳食乖慵岂冠裳愁醒甫旦朝衰茶还慨慷已复念倾倒咨呼问瓶?妻儿恶吾贫诚我以死亡载读伯伦传懦衷更强梁与其忧百年孰若天醉郷家酿苦屡竭市沽乏钱囊进歌五柳陶聊美天禄扬幸近豫亭叟其人固同方有田百顷肥秔稌岁益仓怜我数寂寞招邀共深觴醒往酩酊归不悟日月长有或致醺酢肴蔬杂矜张叟来坐酣酣肯问味恶良我蹇嗜坟史叟豪乐笙簧相殊不相关对酌即两忘如此粗适矣谁犹辨低昂宁须卖菜佣岂俟白面郎今日又得酒忍为独沽尝泔鱼取芳鲜煮狗到烂香及我未病困?斟足相当亟来勿蜘蹰午影上北廊

济道过饮偶成长句

酤酒榷吏杓买鱼市儿篮虽非烂肠宴亦知足一酣冬景忽卓午晴云丧县县室庐絶丝竹文字入笑谈以此称出俗相看庶无慙解衫挂前楹岂问布与蓝追讲石陂会秋霜正黄柑傳翁最後至啸咏能交参题诗庀东阁醉卧堂西庵论子赴官职可余老耕蚕俱为乐榆枋非傲谿壑贪掺袂歌慷慨睽离各情含寄书建水涯年历满四三不虑复见日乃于郡楼南子为赤髯叟我有学语男问讯养生具仅能无一簪固知寒儒分未易过石甌弃置且勿道行觴趣空壖将来难预期既往已备谙聊尽酩酊兴安能每忧惓

畴昔

畴昔林野居布絮不粗完及为羈旅人被服乃绮纨何以出胜处为君究其端篱苏不馥郁传自故老言鲁邦无君子子贱岂所伦东方足文史得饱在长安苏秦主父偃亦各有後叹况乎今异古而本无一?自非稍激昂何以脱饥寒辞郷挈囊书岂敢言王官苟免沟壑祸微生已成全文章盖有力温燠此其源遂离厮养科首尾只十年篋衣亦何者聊足覆衰残有破得纫补有新得缝刈因嗟为短诗所以记初难

粟熟二首

昨者小麦熟野人稍相寛新粟今又黄喜闻不青乾补助复几许久饥情所难譬如辙间鱼勺水亦暂安泽国农事苦无功及丘樊方与三日晴湖岸车已喧所以终岁勤不能离薄田里豪多旷土徒用养茅菅虽有愿耕手赋收重夷蛮祗今二种利稀若管中斑偶秒可劝後必荒谁继前幸哉雨露仁副此倚望欢

种田亦耕山投隙若避毆辛勤望成熟得慰饥歉口彼豪岂知苦踞坐科秉藪慳刻以诛收奇
羸复何有尚喜不荒空呼邻买盃酒

宿凌云山中留寄元礼

凌云山下村逆旅路旁宅南征为吾归寄卧偶一夕无人伴幽语孤咏到平昔瞻怀此山人曾
是同砚席萧萧古破屋文字堆四壁青灯照题评皎月论肝膈为诗有盈卷饮酒无?滴携筇绕
平坡班草尚遥碧栽松此山上共看徧冈脊要约过人长俱来荫芳色羈踪忽分袂不啻十载
隔世故日纷纭旧游空想忆今来此山下松老似百尺欲访松主人其车已他适徘徊重咨叹
辗转对窻隙晨鸡一何慵倾听久不得春风吹残月半夜屋角白难眠却求衣起望河汉仄寄
声岩扃去华髮勿强摘善醉真良图高谈尽痴策云泉与朝市处处堪偃息桑榆景可量名利
不足识无因接清话趁晓拊征轭已度滕家桥回头更凄惻

哭刘郎中

谷风拂层冰万冻倏忽流阳晖照积雪寸片不得留郎中冰雪人清洁映此州谁令司命家速
以风日收得非峻节土地下亦急求哀哉吴隐之已矣公仪休衆皆殖货利我独嫉贪牟衆皆
似芳春我独如霜秋多藏岂不裕害义固所羞谋身岂不急有命其何忧辛勤洛宋倅明白吁
郡侯未知居此官数有斯人不孤耿一德性纷纭万擲揄呜呼五十年平步落九幽象阙方肃
肃铭旌遽悠悠吁嗟高论儒何以示素修

仕则慕贵显贫仍忧子孙阳穷诈恬淡此道久满门嗟乎郎中心违衆辄十分登科未弱冠白
首两朱轡笑谈倾一坐絶口势利言遥闻朱轡流索水洗耳根服不至布絮食不辞羔豚自然
清白行皎皎不可昏杳杳浚郊县萧萧栢林原节士今已矣谁表三尺坟

初酿

岁稔谷价卑家家有新酿诸邻皆屡醉吾舍只空?封书乞余米故旧不我相淹旬乃分酬如愈
始赐杖搔然且湛炽督迫薪火旺衰迟念盃觞伺立久肮脏夜闻鬻沸韵侧枕屡欣畅朝来见
浮蛆喜气愈豪壮槽端乍流沥指面已淫漾肴蔬故稀荒被服稍质当无宾与醺酢引满自东
向须臾就醺酣岂藉红粉唱人生但能醉此外何足望忧勤欲奚为一誉抵千谤瓶罌幸未竭
吾盞且频康回思冷醒时愁寂可惩创隔墙闻馘气涎活复嗟怅非无毕公心坚壁詎窥傍如
今粗沾给後得戒初丧太息富贵闲平生易遗忘

杂兴

时情岂不脆转若轮行车昨日仆役儿今朝宾友徒问之何因尔势利已相如福祿固足骇流
品胡能拘浅草有孱兔污渊无瘦鱼宜矣洁介士望望成远疎

题迎宾亭

僧闲有余日怜客寻幽隈开亭翠冈腹延竚心徘徊年年车马多谁是思山来

绿净桥

涵虚正深明扶槛跨空阔共喜云退避更憎鱼拨刺相从有文酒讵快到夜月

为子举杯酒

为子举杯酒轩然放吟声岂无哀噫调不尽幽郁情念此高简器早为贫绪萦迷阳乞衣食拍
拍岁月更人生负意气曷不怀光晶譬如坚贞松岂为霜霰生永惭苟活迹胸府针芒并

独夜

悠悠此世路窘窘诸生业究竟非所宜俱为谬参涉三年就羁旅万事转拘劫故山归无月独
夜梦黄叶

尘埃

尘埃倚风日放荡乘空飞既昧驰者目亦縑游子衣雨汁忽散漫低徊化污泥憧憧要歧路致
困在轮蹄六合局万有成存各从宜升沉俱害物咄此其天姿

邓夫子

吾交邓夫子富有免俗气包含吉人道混协时辈事读书三十年恬寞无所嗜物古少明眼声
希难侧耳自同崑冈石坚厚保英粹不畏埃 染非求霖露渍幽姿审如此?错安得致余生
轲谐合幸此蒙羸厠上岳眺高远趋涛玩滂溥由来魏王瓠不在惠施弃

戏作数目诗

一?徒自受想象圣人甿二耜惭沮溺疲羸不善耕三时徒饱食何力助戎兵四部虽该涉心非
太学生五噫聊慷慨那复慕光荣六逸如堪继相邀且倒倾七弦休抚弄里耳悦铿轰八杀宾
宜惧过门岂敢迎九年储莫望吟醉但忘情十室论忠信吾穷或有名

南干水

清泚南干水北至白石角中间所经过左右恣冲搏来当高岸破去复新田作洲磧几渊潭湾
涡或垠堦余思二十载更易见已数唯此磐陀矶愈漱愈坚确不然矶阴地何足化溪壑固知

制变材可健不可弱

上山

行临鸟迳前下马理屐齿林风清不彻石路晴如洗何处是招提东峯薄云起

夜听车舍哀歌有感而作

昼歌蝉焦焦夜歌蚊洒洒随牛绕轮转浊污常满把虽歌未尝乐至苦不敢舍岂知清凉屋中有悲酸者甘雨不肯降吾车几时休温风忽喷然调苦声更愁仰视河汉转天星愈繁稠寄言击壤人与尔非同流

蝇骥

超超飞骥尾猎猎苍蝇翼托止如雅素主之无避色相从辄腾蹋稳望千里益朝刍鴈田粟夕饮龙渊液天山峻杳杳过若影撩隙神官下旁闯展折形叹惜为言墮螭类命自臭秽得胡然谬携载浼尔云天豁是时决骤次何莫怀辟易駸駸骅骝前拟越穷髮北仙风响琳琅忽遇九方伯殷勤致羁絆审按题肉力咨嗟絶尘足恨乏軼羣德悲此中道骥愤死秀冈侧苍蝇试回首海雾光圉圉进途当此穷退路安可识寄声人间世远致毋近测栖翔度材分勿妄希彩色永鑒蝇骥穷无妨每相择

鱼虾

神龙在重渊羣鱼喜回环自矜龙族类安佚无後艰晓戲腥浪余暮游浮沫间轻则远拂渚深之下穷湾或掉其尾萃或昂其首颌或扬鬣锋锐或耀鳞文斑衆虾亦恣睢不虑器质孱跳骹弄牙须翕习事狠顽渔师畏龙威不敢数往还操舟变色过战汗常盈顔虽有网与矢岂容垂且弯鱼虾尚忿愠出没如嫉奸一朝风雷动波荡若银山神龙舍渊去恍惚达九关鱼虾不自喻固欲严追攀奔冲竞上击细大不肯闲须臾云雾息墮落如见删或委顿砂砾或摧伤草菅里儿争择拾穷血弥望殷渔师啸其徒气貌特愉漉渊尽取之不复计铔铉鱼虾虽有悔已死谁悲潜

忆亨甫

诗老海上去三年断音尘初非乘桴行正以廩食勤梦想不悟远声容貌难亲忍无一纸书不寄故国人昨日见其子来归自东滨能言别後意憔悴不可闻一被吏责绕心肠载愁轮忘殫蹶偷党阅月驰空村劳事欲歌咏匆匆未成文遂於笔砚间章句絶所陈亦复病肺渴寻常废清樽唯余满颌须增进玉雪痕伊昔坐学舍萧条恨长贫题诗日数首大醉必继旬仰望官禄户谓如隔天云岂思曳尾龟胜却居檻猿不肯空谷卧愿为监綬奔毫厘一失差千里岂得论嗟我实蹇拙平生畏侯门乃无诗老愁何耻鸟兽羣

寄朱九

北风吹寒声切烈催岁暮中岁楚人怨愁絶不忍赋念子太学居辛勤即谁憇阴炉拥文火败
袄感陈絮无钱买酒醪醒坐若酣酣三年诂训艺一月江淮路归梦识亲庭都城非岷峒干时
无好命费力效章句堆箱纂织辞何以贸泉布男儿营养意汲汲水东注三釜若後时万鍾犹
不顾勉思豹变义勿守株下兔

道傍见乞士捕蝨

夕阳拂西冈黄淡映古道晚风吹高林病叶落如扫饥人瘦於繖俛默坐沙草扶危犹强兴力
惫辄反倒还持蓝缕缝委曲捕蝨蚤视荒数拈空杀缓或失脑悠然不能罢似欲锐鉤考宁思
百骸间羣蚁即入保傍行笑相顾慧悟信难早嚙伤乃知嫌馁死岂谓好方为大销灭而畏小
苦恼何有就薪蒸先愁稍枯槁衣青嗔骂贱髮白讳呼老与尔不同年谁能共怀抱

卷二

钦定四库全书

灌园集卷二 宋 吕南公 撰五言古诗

麻姑山诗【并引】

余年二十二初至麻姑山而未能题诗非不能也以为不及古人则不如无作之愈也後三年从友人括苍鲍强久道往来山间盖三岁中三至焉久道时时以题见属或作或已比其别也所就才二十余篇於是赋之为二十四

初入东麓岭路

调笑背南关虚徐梦榛梗稍穷田上路一蓦云间岭身高气渐逸步疾神方骋倾盖叹红尘满身松桧影

息羽驾亭下

仙官不日见羽驾今谁识漫向岭松陰掀掀对名额蓬莱旌节到夜半麟羞擗箫韵沸寒空山人初鼾息

至瀑布崖前

忽过乱峯曲隔林闻水声止车问樵夫知是飞瀑鸣下步入幽径萧然覓澎湃仰看百尺崖倒泻霜雪明乍近骨月健久留毛髮惊疑身是雷仙满耳鼓不停六月地赤渴平川露乾汀此源一何长奔注常淫盈利泽固不浅邦人昧嗟矜徒闻晏豫时相与怜凄清

至憩车亭

东冈十里险游客未尝畏竞爱仙都名岂知林下意道人亦良苦冠简日延迟渐近金龙潭轩车且停憩

观金龙潭

鸣泉漱石出湍压东崖落嶮石困冲撞穿中若深镗轰如怒雷鬬清响振林薄行人每惊窥心骨共矍索传言天宝帝龙以黄金作并投白玉简敕使临渊壑应云启灵祉可不忧旱虐岂思嵯峨间雨雾长所托宁须藏象物乃以致滂博茫茫八紘内至理参冥漠祈禳有旧文千载引穿凿扬雄去不返董相诬难削勿怪洞中云陰森护纖螭

过忘归桥

朱栏跨略约孤絶东山口不见客忘归
华标字如斗轩轩六龙辔不醉云间酒
何以赠游人松声杂鸣溜

至碧莲池

青红变芙蓉各是天然色时情苦贱眼
每叹今非昔人心与物态自古有更易
只使碧莲开游人果何得

上葛仙坛

南峯枕崇坂迳路荆榛稠遗坛在其巔
名为仙翁留石角已剥?林芳自春秋
谁无骨中尘来继冲霄游

寻链丹井

何年链金丹旧井穴田腹飞昇谁羽翼
腐尽贪人肉幽草蘸寒泉田禽时下浴

游流杯池

灵仙心无累会合祇偶然当时玉酒杯
放旷随清涟不知枯池上遂有无穷传

宿仙都观

仙山古秀拔百里见遭匝楼殿出其中
鼓钟日铿锵云间鹤下取芝菌嚙道人
锄药归月色满畚鍤夜眠依松檻清思
逼睡榻起咏步虚声倾觞煮蔬甲事有
属外念寄之以评商何由使我心浩浩
上羲皇

读李邕天师碣文

腾腾六尺碣标置羽客坟龟螭尚坚完
字画稍破分道士惜故物编扶使长存
前已三百年後当几何春昔诵八哀咏
颇推李邕文披襟喜此逢再读目愈昏
道固难洞达辞犹不雄浑岂殊沸鸣蛙
见谓鼓吹繁惜哉开元盛乃乏史笔人
复疑少陵翁赏识或失真凡例竟何有
占招仅成言当时干谒儿误听一走门
富贵世所擅文章我知论忼慨韩柳思
不返撰述?

谒真君殿

稽首香案下索火续新烟徘徊想功行
緬尽千载前念昔魏晋间士流罕身全
高人乐遗世学

者习虚玄往往迷至道琅琅漫清言真君当此时岂以口吻贤独持济衆术敢论名後先陰隲竟感格飞昇遂聯翩严严白玉京侍从皆羣仙旧宅入祀典列祠更他巔平生岂有意德在名自传浩浩一气游萧萧诸象专孰能知真君庸俗但告？

三清殿西庑见穆质题名石刻

香像坏已久虚名在金石深知无穷传须以托文墨穆卿刚直者公论触权威至於祸福间亦有随俗迹端知守财虏倚此销罪愿祗今蚩蚩流持论能引掖凭谁致我语解彼蚩蚩惑欲慕穆卿贤当充穆卿德区区建香像是乃卿瑕適用此而希卿何殊以耳食

殿後七星杉

岩岩寥阳殿东有蔽牛杉下无萝薜拘上有云雾参灵根不纳老秀色长如天已据烟霞都更带星斗衔成名在图籍匠手安得芟由来非自谋时值本不凡鸾鹤岂无侶栖翔倚？髣邒知高古林大用有所堪

上齐云峯

人言此峯峻谓与浮云齐浮云虽满空势自有高低惊名不察实世论所以迷为君上峰头旷望穷东西杳繚城下涧遥遥线环堤人烟衆邑屋蒙密乱町畦想彼平地眠仰如遇昏鸡应论峯头人已尽天路梯古士说高广中州抵仓稊岂尝骇嶽岑隘若坐一闥安得千尺翼翻身逐飞霓扶摇过丹山饱听鸣凤嘶

道法堂检点三帝御书

日脚退前楹崇堂豁明净縑緗出百函翰墨覩三圣舒张溢墙壁灿烂累籤？鸾龙交飞翻金石避坚硬毫无半分弱大至袞丈劲真行体兼精篆籀法毕正篇章入题写作者一何幸伟哉天纵能岂谓学成性名山徧藏蓄终古得辉映墨客徒醉心黄冠荷覃庆尝思八世主覆焘足仁政诗书所敷扬乃独蔑此命将非史官略纪叙非尽并不然天日资肯特记名姓或应淳古治不以余艺竞肤浅难考评随羣但称盛

无为阁见杨杰记仙都花

山风吹春来仙花靚如面芳馨岂不美俗耳未肯贱吾闻西州地薪以牡丹？何嫌此中花开落无人看

望秦人峯

此地去秦中贏粮每三月秦人不厌远期以一死脱何言幸可数久竟各存活得非潜逃心世

爱多洗割迴然深林岭云气长不灭避俗可成仙斯言盖疎濶余来翠峯地把酒望深樾不见云霞身山禽但惊聒

三门桥望五星峯

弄水石桥西退?百尺松看山同羽人初问五星峯为我袖手指当前秀蒙笼平排五青尖似拱寥阳宫自外虽崿施其高莫能同固知天下名有以形类通不然天精纬诂或聚此中他山冈阜名顿拔亦俊雄民耕牛羊践称谓谁与宗维此古洞府羣仙屡从容烟霞庇草木题号更峻崇融结俱土石灵凡异遭蒙想当有初物岂自知所从嗟嗟蓬蒿土何用羨帝公

问玳瑁石所出

陂陀土中石含彩若龟贝伊谁攻取之传玩诧奇怪山家厌搜凿养草事蔽盖闲名偶流闻尚自困酬对咨嗟人间世岂直文为害大有可用姿难能免侵败他山石不美粗杂等顽块奈何亦争求烂漫入磨?情知既有物顺以除恶爱不然悠悠生孰在形器外

观虎跑泉

名山一境镇水土本深厚谁令虎来跑应爪泉飞透吾知变化物持气异羣畜惭愧刚猛身堂堂负文绣仙乡既游历不忍无所就怒掌发灵踪山只助喷溜乾坤任陈故称号长芬富叹息泯泯人平生不如兽

入丹霞洞

霞光满西山古洞在其下石老只嵌空泉寒亦飞泻有居容冠褐无路纵车马游人务周徧强往不敢舍森森南荣树飘叶扑香垞过尽去来人谁为爱闲者

出山有感

偶随爱山客亦赋看山诗方为昔日登又作今日归劳生竟何有清赏不可期故慚康乐侯万里穷攀跻

答道先难交困新知二首

难交困新知触事得晚悔人方趋势富我独居老大悠悠强衰顔耿耿堕末界岂无相於迹襟腑殊恶爱羞同复多嫌乐与翻自坏谭高递互笑饮勇周旋怪嘉荣徒染濡程孔肯倾盖闭门当止矣非敢事闲退

孤坐念平昔凄然垂涕洟他乡二十游故里四十归父老略已尽後來异襟期卑躬揖我进反

顾问我谁譬彼古器物形模漫瑰奇尧冠落战国不贵理亦宜嘿塞习蹇吃迟徊避横飞秋风吹我须萧飒近素丝多感属暮齿难交困新知

道先贤良以南公出山愆期示诗见促谨依来韵奉答

为农岂非天归计恨不早业已入犁锄谋惟在梁稻春霜久不解乾渴满耕隩布谷彼何心声似相报不知兰台聚安用樊间老定许叩铃斋柴居就长道

以双井茶寄道先从以长句

园公嗜慾浅所好盃中物有田在荒村半以种穉秫居然成醞釀不复畏法律客至启柴扉盃瓯等闲出春蔬间菘韭秋果杂梨栗取次得寬怀何曾计余日山栖经五载此兴殊不失独有醒觉时追伤往年屈羈游住破屋愁寂靠 钺仰望步兵?优如上公秩无钱输榷吏穷素又畏咄太息苏源明仁襟信奇倔低徊怜郑老长使醉兀兀发我感古人何缘希髣髴粤从归村後夙恨亿万毕耕稼虽自劳醺酣不他乞亲朋或知我问讯俱委悉亦有赠助恩无非佳纸笔邻家世粗糲窃笑事儒术故故送樽壶端为鵠欺鵠披?忍辞拒对案倾倒乞特是今段乖遭承极纒郁遥遥海南尉悯我卧蓬荜寄以累幅书封题附邮驿殷懃屡存赐颇以照萧瑟乃惠双井茶云腴品居一人间有馈遗宜用彼所必牙栳奉戎王鵠?取侮忽藜羹予饿士荷德到身没惊嗟石上英於我系塘突回思西山阁其主异俗匹喜醉复喜醒其胷抵溟渤今当议移献不更嫌草率再拜写私诚庶几无废莠银锅焚蟹眼金匕搅云骨陆叟片无三卢翁盃论七能希击节赏且勉按劒叱纵被睡魔瞋吾豪不应恤

谢邻翁

穷秋我何事岁计聊支準割稻三万斤栽松二千本辛勤完廩庾颠倒糞畦畛为有空腹忧能忘此时谨崧肥竞垂陰稻美方聯糗自喜在丘园年衰且优稳天功偶不助人力翻为窘弥月雨连淫交冬霜不霽蔬长煮有綫谷湿春多粉厚望乃无聊萧如被宫牋今朝二十九看历惊秋尽去腊都几何阳乌尚高隐邻翁巧谭话念我频嗟愤杖插肯经过单辞稍牵引上论穹昊意宵嘿难裁忖下说倚伏端回环恒切近熙宁大丞相周孔登台衮手运道德枢生灵藉鍼疹劳神十五载坐许无遗恨归卧睫未交纷纭见矛盾推称忽排毀歌咏俄哈哂蔼蔼攀附人层霄墮污溷前愚初是智昔禹今成鯨譬彼羹澹衣仓黄可漱擦问君官际会何似农蓊蓊而以望小乖便同身大疢飘风将暴雨自古称豪敏邂逅不崇朝谁嫌类荣槿羲和与青女会见驱輶軫昼煖夜严凝安知不相趁低徊向翁谢老语真明允惭愧失路贤吾贫固当忍

寄济道

有田山陂间年历六七过买园丘墓侧畎亩十丈大於焉拟柴荆垂就又垂破岂无速成意煎逼少财货淹留寄他门一跌防百蹉诗书相娱老儿女既翦髻何必随羈游无屋覆高卧昨来钱可贷似有鬼陰佐乡间喜吾归惊咤竞告譖一茅曾未结羣盗忽讖 旌旗蔽粉榆弓箭拥

篱舍连蕞被焚荡万室逃斫判吾衰当此时林下若为坐苍茫依井邑买舍宁敢惰迎家郡楼南庭户困堀堞庇风惟古壁容足乏高座平生灌园心一旦入顿挫譬如千钧弩激发不中埶力穷坠泥沙岂免埃 洊浮沉非所善耿介诵楚些邻叟异吾徒轩哈不垂和殷懃怀我友契阔似弃播早以声气同中为章服里牛刀到芥羽蜀锦拭奴唾虽云不等闲无虑系轡轳能无挂冠计尚却采薇饿低回颇贤劳自比蚁行磨闽州富风物盈轴积文课时时寄吾庐恨不共制作相思匪朝夕饥渴各无奈忽闻有归期忻快亟自贺呼童治盆瓮醞醖忻秋稷支持醉梯媒伤吊俗类?仁人不吾诳早晚应沃輶延颈望东桥何当见绅拖

寄子发

後事喜乖初劳生拟何稟思山有藏市愿起或成寝交声违本心叹恨只愈甚听君东堂言去计非苒荏在外危速官谤内迫将母稔不能傲飞鸿为悔比拾渾寒乡有旧隐杭秣岁充廩及此挂吾冠逍遥适衾衽咨余方问舍期就指冬凜相邀林野娛高咏略宋沈闽蛮忽煽虐白刃万胸搥惊奔托城闐默若鱼在殢问君归来信延伫久才审亟闻漕台公推待过流品縻留不许退谗口亦旋噤古人制行藏缓走不为 况今羣盜炽岩谷岂安枕秋风又开菊庭砌铺故锦江鲈鱸丝肥蔬果具丰稔相思东堂远努力文字饮

中山感怀

西村灌园生好尚只坟史偶为冻馁驱放浪离桑梓初谋旅人食岁月涖滩纪城西谒郎官辞业入惊喜题门辱皇甫啖炙烦周顗积渐近攀援依稀召訾毁郴阳不果往刘馆聊凄倚俛仰秋夏交飘然动行李凌云古空谷中卧幽真士寄书使来前得共考经旨依从得所好不分严霜委宵话酒乾樽朝游屐磨齿春风忽浩荡客兴又迁徙邑里有名卿相寻走函纸淮南官未赴吁上船犹舣禄廩见贖余羈栖请依止萧条出门去四月大江水荏苒向枞山愔沉傍书几侯鯖岂无味旅疾或多鬼讽诵难呻呼辛勤一暮矣天书问乡贡侮角士争起却治举塲文归参白欄子征鞍遂南首故园冲炎暑把卷诣棘闈骈罗聚千趾文章虽草草论荐亦亶亶还与同籍公西行望旒旒於时冰雪恶进步忧披靡迢迢达浚郊徘徊经腊祀春官未相识退作暴鰓鲤惆悵问乡程东随汴波驶南京 慄饮泗郡崩奔泚稍赴建康城肋骸倦如死故人能俯接未许论亨否到得爽气严舳舻始东拟悠悠豫章岸速至日无几进叩凌云扉图谋备驱使同心颍川友曾共长安米解榻苦招延幽轩为余启归来坐高馆两见柳垂蘂出有冯讜车居多穆生醴为文万许卷共学十余第放论逼玄虚摛辞谢狂斐邦君颇投分巨室能更视师友足成名贫穷岂常耻虽怀招隐咏敢废事君礼况乏一?家宁忘抱关仕须眉保方秀时命固当俟虬肆伏神龙山梁叹雌雉徜徉亦何者游衍姑从尔蓝輿走仙都皂盖绕仙寺掀呀赤松笑積塲豫亭醉极有挽袖情非无送鉤戏神锋正轩揭贤诏已蒙被辞学属吾徒天衢合伊迓败军犹鼓勇韬略助轻恃自负七札豪旌麾必摩垒高心不虞祸羣吠忽满耳綵灌怒如雷魑仓衆於蚁纷纭莫沮遏回避但嗟唏大暑北路尘匆匆二千里仓皇忍饥渴迫若畏流矢又见朱雀桥重寻保康市追隨国庠试玉石混臧否皆谓连城珍无劳病瑰玮谁援周宣手反弃中乡芑颠沛翅便垂思山对蟾蛄迢遥马鞍峡滂湃虎林涘倍道怯粮空逢人类囚罢朝天两朱闔寂寞徒还筐无数吊唁声伤怀泪如洗时情看成败自昔有冰毁将军匿风棱县尉乃凌抵云

泉岂不好消息视天理即速肥遁装劳君屡牵裾宾筵堕盈戾卦气尽壬癸虽往省松楸仍来仰盆錡人皆贱屑越已独念摩揣会得卜终焉尤难在轻只齎咨灌园业早晚工力庀譬彼蒙笼枝初培就根柢求田阔陂侧问舍长林尾此计或有涯成家倍为美侵寻见冬暮我马议驾彼请婚无高堂授室藉媒氏风流愧王谢族望惭昭华尚恃五噫才诸余庶忘弭人伦喜修正鰥党成离此驩快见芳时承前语恹恹啼鹃聒牕户野思兼耘耔计较理锄耰踌躇背牀第栖迟抚州路独复操尺箠却整半老容临泉照清泚比邻旧时叟相见意不菲儿孙喜诗书扬借糠粃潭潭翠冈下其屋亦岵岵虚徐事毛锥脱略辍金耜盘飧得笋蕨满腹饜青紫或酌山泉醪醇香溢吟觥逍遥度晨夕次第遗轩陛祗欲养疎慵谁能论钦企柴薪渐营度且阅灌园技必可了余生功名付尘滓安排聚鸡栅编织钓鱼?划草种篴簹扶栏栽枸杞多年此谋熟愿与尺鷃比平昔侥幸非从今定休已书边夜来酌酪酏乱终始夜半睡魄醒追惟到前此悲哉二千日倏忽象转跬中间事变繁何啻亿及秭穉愉漫顔面愁痛彻骨髓若不悔先迷将何异虫豸向来与君住成熟至汝尔计成合初终三回倒吾指当时盍簪辈今者隔彼已朱张既分明陈夏浪同轨咨余逼衰晚谋望只寻咫打并矜衒名都卢让辽豕吾生大魂梦世路万疮痍作诗解君颐恨少月露体

壬戌岁归治西村居奉答次道见寄长句

肃肃白虎殿潭潭承明庐人皆通籍游我独老饭蔬譬彼兽啖土岂其恶甘腴道穷吾何之只得归荷锄盛夏督耘耔先春理陂渠低徊居未宁倏忽岁又除但怯簿有债谁羞门少车载歌里饭辞谒酒聊自娱念子早奋拔声华系名驹谁云破青衫罪谤更勃如朝野固异分知安尽夷途牛衣与樵歌各是对妻孥

卷三

<集部,别集类,北宋建隆至靖康,灌园集>

钦定四库全书

灌园集卷三 宋 吕南公 撰五言古诗

烟雨

朝来烟雨重天与平田接轻风更萧萧清快绕我睫开扉覓高岭没若隔世刼不见苍翠颜徘徊坐搔颊农夫一何乐羣辈聚稠叠移秧塞塍圈狼籍衣不掇誼阨交野语蹲踞就晨馐台笠映扉蓬端能胜经笈人生慕温饱万趣归一愜何必少髭颔区区羨长鬣吾村有荒圃吾屋葺未辍早晚画度全方将事农业耕耘党既入歌笑声可蹶虽欲着新书无妨理锹锸

傍湖行观

十日不出门厌闻水车声昨来新雨足耳外忽晏清步履踏初霁舒徐绕塍行向时荼蓼处荒秽略殄平青秧渐弥漫黑手益纵横固知农趋时岂特劝督明下士能致力高天得无情愿言成岁丰庶免寇盗惊

覆船山

高数十仞广十余里形如覆船後映会仙诸峯秀色排空葱苍倚垒远当县治之前邑之名山也

峩峩覆船山特起秀蟠勃当前百十里已见青突兀行瞻渐详谛依约认毫忽西峯自排列俨若魁健卒羣阜复东回欹如搢珪笏横冈挺戈剑坚重不可机峻岭扰駟骊豪雄欲相揆或寛侔放荡或迫类齮或象喜纒余或同怒诟咄林高盛巾幘畚破露鬣秃有险状饥癯有坳似壮腴伟哉形态衆尽叙难以猝忆随游覽後深入禅宅窟樵径坦复崎遥村现还没是时五月晦寒气尚切骨汲泉煮茶云石鼎沸鬻雪夜垂纸帐卧疑近鬼窟宰晓引杖屨行崑崙徧缘踣幽坡兽跳佳树鸟咽咽飞瀑下层崖鏗清断污渥分流浹田壤千里利耕捐爱此爽洒都拟咏屡蹇讷何由结庐舍静取蔬茹粹梦想空洞灵孤云动飈

奉和内翰太中城南放鱼

沾沾水中鱼生死岂有知成形四气中积渐长鳞鬣但喜藻可依未谙龙可随茫洋天地间寄命此郡西岁有竭泽例肯纵舍者谁秋潦走海去荒壕已愁饥方将赴烹釜逃避计若为万里雷雨解一时离兑睽夫何遇仁贤顾盼成嗟嘻载恼口腹累鲜能毫髮遗支川以三千此独数

亩池脱尔仓猝急吾其亡肉糜呼舟送中流狡吏敢挟私曾是溃烂势忽称太平时波澜网罟多要在慎所之香饵不足爱古言未应非丙寅元佑年内相守楚夷悵悌见篇咏鱼乎尔恩斯

偶游僊都道先以长句见寄依韵奉答

吹灯染小帖借马忤廐人岂其事朝参强欲观云泉盥栉具袍带超遥石桥间同征二十蹄弩骏乱後先朝曦遽突兀送我溢背温乐郊民何知桃李自满园逶迤松下路不践已八年道翁喜吾来煮茗巨石根导我复勉我攀跻绕漓岏依依梦中游忽得惊觉魂一听钟鼓响载惭尘土昏顾兹清泚流照洗憔悴顏噫噫金碧光嘈嘈杉桧喧楼台有新增碑版多旧观啸客徧厢囿周爰讯黄冠白头师灵仙不免归丘坟太息五浊土凭痴待飞翻譬持数寸胶拟救九曲浑往者不肯说来乎付谁怨唯当悟至真可入了世论崔嵬黄守庵本是刘伶禪忆我初借卧嗒焉过西曛踏黑叩归户仓忙遭骂言宁知复来时邂逅乃见尊中从鲍兄至三岁四五番题诗不知我命酌戒醒还丹霞所未识西望久日存畏雨我独止于今负长叹鲍去死令长无人辨龙岫我穷羞白纈引分逃山樊俛仰十五载恍如毕晨餐方为此日游忽计後戚懼何以遣孤愤随鞍有残樽焚鱼濯甕瓯浩荡临前轩适举共悄嘿屡觴渐纷纭步兵俄鼎来四座惊欲奔授我大纸卷捧承疑未安披张纵眼力审是陈侯篇上序天质坏借余尽情文下伤素交稀庆快未契敦忧我困跋履且令慎盘飧平生惯衆憎读罢肠轮囷引笔欲作报停杯类含酸人间有义好薪向异辙轅权势之所在万夫呈肺肝风云苟不至亲戚争弃捐此谬匪朝夕期谁反狂澜余龄既蹉跎乃得逸驾攀感槩舍酒去冲烟下耕村黎明候铃斋再拜以谢闻

蔡翁

蔡翁高古士终始素践清晓然不欺心可抵日月明二十弄赋笔周流教诸生四十背辞场归来闭柴荆长子力近利旨甘足谋营次男治诗书庭户弦歌声居止在城邑身如隐林垌旧交势富门十载不一登稼穡有凶稔翁无田可耕间阎多是非翁耳不为倾萧条一亩宅裕若据八紘书囊配酒樽此外毫髮轻晚醉有癭枕朝饥有藜羹未知穷与通何者当達情维彼九章袞煖外未觉荣维彼八味?饱来无足矜妻子亦垂白息孙初习行謹愉同百年世患安得撓嗟我稍濩落晚能慕幽贞何由似吾翁坦坦寄余龄

早获

温风扇炎节高壤见新稻苍黄色犹杂鎌担力已到时当艰食久不暇论赢耗奔奔竭顷亩翁翁资釜竈蒸炊防碎折焙煏取乾燥乡隣自齐同早暮谁讽告老翁操匕筋一食九嗟懊丰凶存後忧饱饒偶今暴骄阳有炕嘆积雨或淹涝未是安眠人儿童但嬉噪

穷鬼

穷鬼断去志送之岂无文譬如衢路埃屡归已复新随我三十载间关不辞勤诱我上债台为我拥愁根羈旅风雨夕空庐冰雪晨赞成蹇拙谋谨守冷静门遇酒或略避见钱辄生嗔亦憎

富贵儿永矢不失身昨者试羣士閫亡忽连旬谓其舍我行忍不许我闻乃复跳篱棘譟张幻
司閤吹沙衆官眼使视玉为珉诡计动有效更谁评正真归来只康然知我耻奏论忆昔熙宁
初与子俱食贫相语厌此鬼多方愿崩分宗伯正愤惑委其制风云仓黄别我足置我寂寞滨
子脱白布衣鬼顔愁不欣自子有官守辞乡八青春坐想廩俸优宁复鬼敢亲今者枉书札无
财亦云云信哉此鬼多不限吴楚闽陰灵虽叵测要自有婚姻族党各生子子嫔又生孙宗支
遶天下焉往不见存子行改京官途辙异凡民闺房渐珠翠盘桉溢羶荤万一鬼不喜乖离在
逡巡顾我惯与君应来合朋羣益五以为十其徒日滋蕃吾文虽极高鬼去无治因

读东方朔传

武皇肆荒惑公卿噤忠齟先生有直舌谈笑开吾君董偃不敢怨壽王谁与伸堂堂补衮心不
厌犯怒频岂不顾仕养崇卑位泥云耻同高论儒瑟缩忧烹焚贤人事昏主献替视所因不尔
朝野间谁非爱其身彼哉下世士所见异吾闻丑谬无不为乃思谤遗尘国风歌善戏孔圣许
狂人何嫌班孟坚区区记余芬

过巫师步

还过巫师步竚立想平昔不见旧门闾苍苍但榛棘当时修竹圃十里认浓碧佳树鬱珑 高
能百余尺连薨覆多瓦厚塹叠坚甃生计具安恬隣人总驩适非无四时乐乃预五等籍不知
九载间剗灭自谁力或尤近川水川水岂其蹙堤岸尽民庐何斯最崩析有疑沿鬼道浮诞致
淫愿僻术固欺人穷袄盖伤德不然当合会大数名终极幽玄竟难量理意浪参测忆初羈角
岁文字未深识此地事遨嬉随羣惯经历波澜浇暑汗略约骋霜屐逗晓集围鱼连宵按传覲
走听铙鼓动就视符籙敕座軋歌神儿盘分受厘食中家馈牲果豪屋送金帛弟子争聚藏巫
师坐欣怵顾余方眇弱比衆似岐嶷抚省更呼留殷懃赐遮盃持盃劝醇酒引筋指香腊牵袖
索吟哦嗟天赏英特期将雪侵鬓见庆云路翼童稚喜矜称徘徊重低嘿岂图专輶轲所望壹
差忒荏苒至巾冠奔驰为甌石光陰与愁度肝胆遭事役文藻漫雄浑途程转迤塞翦翎看远
举蹠足美横击何以副乡评徒能冠经席虚声渐凌厉谤口遂压积辞山寄他州封纸问故国
惊心存没异刺耳荣谢亟偶尔跨归鞍萧然又行客凄凉到今日憔悴对遗迹礪影冷茫茫塹
泥新拍拍春风吹骀荡夜月照岑寂曾是祸福场翻为马牛陌谁能逃死丧乃独久酸惻无处
沥余觴空思咏渐麦人间屡兴废世路真阻厄愜快一难逢睽违千易得布衣甘我老耕耒非
上逼饱煖即逍遥功名可抛擲虽慚巫师语且免荷蓐责自作好诗书宁须位侯伯

过辞归岭

老翁爱园庐未省越隣坞婚姻挽他乡送客犯修阻委蛇上高岭四顾异吾土相揖遽辞归惊
如避豺虎漂浮千世下出意能近古游子笑安居相传入名谱黄尘压碎石岁月知何许但有
鬱苍松亭亭待斤斧秋风吹我马路向此山取因名重徘徊不独行役苦

过忧劫岭

强步已半日前冈更悠悠下如趋龙宫上若登云楼不见人舍宅但闻鸟喧啾我行只空囊盗劫谁知忧

五月二十五日三陂桥晚眺

涨水久已退擎泥草扶疎平畴极我目一来施犁锄九夏行过六尚忧复污潚哀咨此乡民耕力岂踣蹐地势苦卑薄况无古川渠愁潦惧燠乾不可保终初昨者多暑雨洪波日凌虚新来满旬晴渗涸类灌植垂秋且当蒔到否知何如摇摇衆农心凜若畏简书远瞻来南山其壤似郊墟依微緑秀间浮白略散舒间喜早稻吐因高得纾余幸无风早催聊济升斗储天下有大福唯民乐田庐乐哉俟丰登快我羈旅居

咏榴花

敷敷英乍含春尽叶已碧垂垂实稍残秋晚花尚拆鲜妍谁造化迟暮我彩色方托晨露滋何知早霜烈天时岂顾望生理自溢逼根柢或未衰芳葩肯无益徐娘老情重武后善涂泽所美出虚疎其殃乃穷极参差共冲气窈窕负灵识草木可毋讥吾伤在人德

俗士

俗士各何在来登盖徒然彼其见湖山乃特论价钱为此可径絶陰梯阻狙猿当有诗酒豪相将快留连一醉抵万宝高吟对遥天下视闐闐儿污埃尽痴年嗟我濩落手平生负云烟题诗不放纵或似摹印圈安得水雪才同聯座中篇

岁除感旧

旧德无路报衰年又增多平生感激心恐惧成蹉跎幽幽黄鍾原总角便经过一饭倚从母徘徊类娉娶学书随羣童讙叫抵鴈鹅相逞知字画勇於渴寻河羞耻道赵壹矜夸有甘罗岂云幼殷懃乃取晚坎轲荏苒三十载万千穷崇魔旧游不得寻听问徒悲歌秋霜压芳兰岂复异径莎愿见故根畹邈如隔岷峨老穷怯脂韦趣尚近笠蓑此恨长不没安能辨蒿莪

偶题北轩

说儒论四方以北为背明盖言幽陰位有向即非亨遂令口耳儿恶北如近刑安知壬癸交於此兆万灵天元气始降坎水首五行理数渐推迁至兑乃秋成余陰与初阳分此朔易庭故为始终地变化容可轻不但天道尔人为亦该并帝王宅九垓辅相罗贤英德虽若伊周稽首为公卿如其恶北面谁以臣庶称吾知讲析师苟以巧自矜何能乱達识止可欺愚冥吾来坐书屋轩楹有北名题诗非赋咏聊以说儒憎

初游投子山

东山未尝到兴言往游观寻幽味已淡全胜交凡官扬鞭遂出郭樵路行萦弯遇险辄舍马听松频侧冠霜天正枵寥野吹何萧酸强步且数里犹在荒林间峯回得古寺一叩云中关高僧夺睡出迎对如嗔烦解榻迸伏鼠煮茶爆新泉东亭一何高岌若崖临渊西庵更爽亢基与堂薨班延缘徧登坐共羨闲人闲同游二三子取酒醺吾颜约略訂市果横斜列山盘饮语快不彻望睫张无端曦光忽衔西归思攻余欢撩樵酒醉毫拂壁罗矛干调笑下前坂暮色凄漫漫行矣重回首林凹数声猿

答济道

外物不可必一官非我心荣生在适分素愿乃山林知恩已三年趣幕不觉深因君累幅书更激浩叹音袞袞旦复暮劳劳古犹今其谁有功名不顾忧患侵富贵岂不欲才力视所任长鲸舞天渊寸鲋安牛涔性亦各得耳何为辨差参夫子方得路未应弃光陰咨余厌卑摧谋望止尺寻誓买五亩宅归休以浮沉耕渔入程途文字亦所钦看子展云翼腾凌和薰琴还将草堂书敌子朱与金

答陈公美

少壮事已远旧文良可怀百年能几何十载不得偕念昔居乡里游处了无猜饮食不相舍谈笑久所陪拜君以为兄分密谁敢开齿髮俱未老未至衰与颓我子在襁褓君犹无婴孩君後独舍去为吏天一涯我又厌奔走远引不复来岁月杳难恃区区老吾侪况从与君别多事岁若排心力不能究衰病侵筋骸二子皆已冠如吾苦无才君亦已有嗣眉目秀且佳人事知几变会合终不谐昨者本不出豪杰苦见哈鬱鬱自不乐谁为子悲哀幡然感其说东走凌巔崖不意君在此得奉笑与诙君颜蔚如故大噓飞尘灰我老应可怪白髭生两颧新句辱先赠古诗许见推贤俊非独少故旧每所乖作诗报嘉贶亦聊以相催

拟古

仲尼鲁司寇官职亦已优从祭肉不及戴冕奔诸侯当时不之知为肉诚可羞君子意有在衆人但愆尤置之待後世皎皎无足忧

仲尼为羣婢一走四十年苟卿老不出五十犹力田顾彼二夫子岂其?狂颠出处固无定不失称圣贤彼亦诚自信谁能恤多言

公孙昔放逐牧羊沧海滨勉强听乡里垂老西游秦自顾未为壮徒为久辛勤君子岂必隐孔子皆旅人

竹榻

竹榻破坏久隅棱类绳桥扶身轻坐之不敢直我腰动小响已大搯严势仍摇铺氈蔽其顔倚

以度晨霄醉卧稍安贴如舟乍停桡愁醒辗转多似泛八月潮欲下必以缓将登未尝跳奴僮
为我忧疑我或怅怊讶我合改置我心岂其遥所嗟成与亏本以材用招念此苍翠干初非愿
枯焦唯难逃匠手遂与岁月凋物固不求旧人贫自无聊怜强弃其衰此志亦已忉我有四壁
宅尘书映空瓢何嫌此榻存且以异贵骄

寄陈道先

寄声西山阁知我新近否病嗽辄弥旬无钱雇医叟夫何稍除去乃自得醇酒美味既沾肠清
甘更悦口适从耕垄上杯醺不在手坎坎遂连传誼如击盆缶清秋田舍事秫糯或稀有倾渴
圣贤心囊空欲狂走思君彩衣次与我异好丑病少官壶多何因到衰朽古人说天道高下常
更受此语傥可徵丰荒竟谁久

慈济塔

僧说奸雄人亦发归依愿祗今慈济塔乃自张崇建云空土石乾碑倒龟龙断悠长香火事岂
以非夫贱

一日复一日

一日复一日夜眠复朝兴不见事物穷但觉忧患增千虑不必免不思亦如恒未知此世间有
用智与能少壮怯鬱屈衰残念轩腾方如夏中蝉忽若秋後蝇非誉等毫丝善恶计合升可醉
且勿道云来譬高曾

理髮

我髮日以少我梳未尝频过旬一理之每理愁欠伸壮长足痒屑奔驰更埃尘搔爬不觉劳垢
结类组紉虽复强栉沐憚如负千钧钩牵就平直流汗益苦辛当时结似拳渐细微梅榛悬知
又十载几许及变银万物有盛衰吾何为喜嗔借令但两鬓岂害有冠巾人言髮既凋乃稍异
痴民题诗且自贺渐系老成人

宿燠塘村

尽日绕冈岭孤征凌险巖春风处处豪游子行安之过午或未饭人烟信遐稀暮投燠塘村正
见牛羊归黯黯乱山腹茅庐压笆篱阳光向余霞畏虎先掩扉系马就屋尾解冠挂门眉怡声
问前程乞火照寝衣夜半雨忽恶长雷撼坤维奴仆亦睡觉雨泻百箭驰草草卷席避倚墙顾
晨鸡故园岂无情一梦不可期我有三亩宅比隣勇鉏犁何曾问三旌自足了四时不肯卧寂
寂亦来走栖栖幸无王事驱或是奇鬼欺咄咄复咄咄生平笑狂痴明朝遇清溪莫洗脚上泥

西村

东村岂不佳南村自清幽北村亦可居俗悍不易投维此兑岭曲陂陀遶川流桑麻有清园耕稼有绿畴云峯十里外足举旷望头本无车马喧岂有声利愁伊我先君子故家待增修还当起檐楹此志敢不求开辟三处径疏通四前沟有轩列琴书有室贮锄耰压麴拟长醉藏刍待肥牛超然了余生不问万户侯我策久已决我身强悠悠安能荷蓑翁不以意相收

镜镊

镜镊亦何功铿铿漫从事助人饰形骸初若逞意思须毛何足简尘垢何足薙端为儿女怀丰靓以言贵余家在农亩耘耔当传世朝犁泥糊糊暮耨草翳翳风搔日暴炙姿状难斌媚百年寄托身颠倒皆顺利颜红黑何害髮黑白亦是谁能妄去取屑屑论姿致深村拟三迳岁月治去计带经以随牛镜镊成相弃

秋色

秋色今又动凄然悟衰残筠牀读书轩一卧八九叹少壮非所惜尘劳苦间关端为智虑倾得此悄悄颜筋骨衆疾劫肺肝百忧攢还当节律迁刺促惊痠夜眠却明烛晓脾拒坚餐从文未终篇腰?益痺顽太息造物宰劳余岂其偏宁分无穷悲直窘有限年想彼向荣木萧森望云端虽无瘿蠹亏久竟归朽乾万化有尽极一身何足安方当委顺之不必专愤烦起坐仰星斗环行绕檐栏西风穿我怀肃若临矛干世故属无谓悠悠谅何言唯应就枕时旷荡如山樊

岁寒亭

北风搔长林万叶各穷屈爱此清秀干高寒色如一虽无化石验自是後凋质

送傅亨父

相公坐东府简拔无留才贤良得帅权志与冯赵偕以策屈羣力勃如飞蚊来河湟多新田陇渭少惊埃壮矣功利举趣时各贤哉谁言夫子喙不在此日开手把经纶书想望黄金台相期衢道亨纸墨皆云雷腊雪拍马睫朔风穿仆怀虽云行路难足免壮士哀去去合利见少微近三台得志亦遄归我有贺酒盃

卷四

钦定四库全书

灌园集卷四 宋 吕南公 撰七言古诗

和得茶杂韵

衰翁脾病怯饮茶不但嗜酒成雄夸夜长昼短读书苦伫待鸡鸣愁日斜秋蔬搜肠酒正恶踏
炉火慢煎双脚偶然接得西安角险欲冲尘送高阁沉吟却忆陈公子惯在京华看贡篚蒙山
顾渚建溪春花乳清冷偏知味今来下国深秋景酒厚花稀心未醒盱水中 亦试烹岂须奔
走扬州井

延陵行

莫爱倾域名名高祸将作莫嫁多才郎才多情义薄君不见季伦不保绿珠命长卿终负文君
托岂如延陵庀下赁春人无色无才贫且乐

乌翩翩行

乌翩翩鱼漉漉陂湖漫漫浮穷肉贫民疫死屍且坏冢儿忍看熏墙屋桐棺一寸无钱置亦可
裸埋难乞地绳挛箠载肩负?暮夜间关来此弃哀号数声泪淋漓归掩柴荆邻寂寂官家政令
如文王日月不为盆下光

黄茅行

黄茅??天垂雾夜宿野亭行旅共看看灯火问他乡听说艰虞各悲痛早年转货河东北亦熟
淄青涉梁宋民生富裕利源宽所至如家忘勒鞅晚来凶札作饥馑首尾七春荒播种已知人
物俱流亡祇有室庐齐歇空回旋却走向淮浙并值纷纷叹饥冻积屍狼籍臭相兼无异烂鱼
藏暑瓮去秋关陕谷将稔践囓忽惊黄鼠衆正忧飞挽负洮岷敢论仓箱稀食用昨闻王师又
南伐熊罴十万临诸洞荆潭五岭皆宿兵日费千金谁运送闽州旁助早成乏何况匹夫图窃
弄三川迢递未得归悬想讵能余赋贡独称江国久丰足游历如今愁更重旱伤水剥疫疠频
何处商?犹佚纵困京少食但萧屑寇盗乘虚还扇动一宵此地漫安身万里故园难入梦嚶嚶
鸡唱侵枕脚淡淡晓光穿屋缝去矣东西勿复言文臣方献昇平颂

迟晚行

少年踊跃希卿宰迟晚徒思老江海吾道淹衰髮渐凋壮图销铄田今买文苑锋鋌稍收戢醉
乡朋旧多携解唯有愤世嫉邪心自计终天不能改

呜呼行为闽寇屡动州郡无兵而作

君不见熙宁宰相经纶苦不肯养兵累神武多时州郡罢招军欲责耕民为战伍诏书一日下
九天守令宣布周乡田十家嗟吁百家和父子握手悲残年干戈不与锄耰杂此道几回轮历
甲未能井牧似三王何用匆匆谋混合輿情有幸闻旒宸敛鼓收旗防怨谤尔来下国稍自安
其奈兵防已颓毁大城有兵不千百小城更少几许力一夫窃发数县惊坐恐饥癯皆盗贼承
平久矣称繁富儒生枉被高谈误同声敷奏尽哀矜引手施行皆耗蠹居不得宁辑财安能充
裕呜呼争得略如开元姚宋之民人万里东南开夜户

别离

东家卖儿价何卑西家弃妇声更悲得钱未足三日饱既别岂有归来时山如高城路如线回
首难言泪盈面蝼蚁沟渠处处同短长不复能相见

死别离未如生别苦绸缪恩意无穷处忽作乖违成陌路非缘官诛与私刼忍令弃置随童妾
夷齐不可人人学争得腹空无悚懔生别苦此苦无尽期百年泉下亦衔悲娶妇养儿畏不早
何知此日难相保

贫妇叹

昨日良人死穷独粮空子幼身自哭卖衣葬罢急谋嫁富翁立待封居屋夫妻寒贱恩亦深纒
麻终制非无心饥肠雷鸣无可奈礼法虽存何足赖

教学叹

卑卑穷生无令图偶开浊眼窥字书村田子弟念笔札邀请稟访同师儒远防鬪讼习诡讦近
就财利评侵渔行身便事世所幸先王教道徒迂疎君不见官家设庠校俊士罗冠裾亦工细
丽苟荣禄谁复高远稽坟谟本期教学敦风俗今如附子充饥腹

勿愿壽

勿愿壽壽不利贫祇利富君不见生平齷齪南邻翁绮纨合杂歌鼓雄子孙奢华百事便死後
祭葬如王公西家老人晓稼穡白髮空多缺衣食儿孱妻病盆甌乾静卧藜床冷无席

壮士胆歌

非灾非祥何所出回天转地成恍惚蓬莱金曜急食昂矫矫霜虹横贯日帝尊万乘勿致威大
兵如火无所施擒龙扼虎无所尅手引存亡才顷刻事无今古用则灵用时天下毛髮惊能将
义勇发至诚壮士之胆君勿轻

恩讎必报歌

苏相东归施不妄栾公得位言何壮恩讎必报真丈夫不苟而已焉知余浮生百岁飘风速胡为顾慕甘侵辱道之至实先吾身纷纷毁誉何足闻

西风

西风一夜飏飏动冷触病身增疾痛卧听促织不成眠起望明星还内讼十年客路过秋色五亩故园停岁种学如观海祇自奇文似屠龙竟谁用情知至足在饱煖何事低心随荐贡桀溺从初岂有官接輿却是能歌凤今虽未借邯鄲枕昔曾屡叹南柯梦嗟矣归哉有近期会将物我分轻重

渴虎

九月十月霜漫漫圯垠南野如羣边东风已作冻未解日月晓望皆璠田冈陵焦枯涧壑竭草木性命俱沈緜彪家於时若为处掩拥败叶方闲眠阳辉中天穴户暖起坐嘿翬喉方涎虚肠未充多潜土怒掌久敛悲盗泉黄河泰山深且茂恨不休止薪安全熬然宅此取饥渴焉用武勇声名传侧闻近便长松坞十顷池塘停滯古不胜积润在鳞虫浩有余波沾畎亩尾摇伊昔讳凶檻腹满愿今同鼯鼠世间遇合无必然平行静视皎日前嗟来恳恻尚不就避逐刺促渠为贤主人若不开文籞归卧幽林待天雨

乞士歌

天下大辱无过乞忍能饿死不终日空瓢曲杖行复嗟高楹厚壁他人家风蓬蓬雨雨夜投野庙眠枯叶世上艰难有此时强顏岂是相师法从来诟骂多言乞僮客受之犹噎郁今日同行富者孙末年祸福谁能必

关关春树莺

关关春树莺晨晡不知久似欣融和景乐得飞鸣友可怜天性喜朋类肯念同羣杂誉咎年年日暖风暄时园林无处无芳菲高翔俛啄足自适焉用戚促勤追随君不见花间柳下纷纭後擘弹挥丸少年手蒙笼枝上惊急来不及伊嚶已分首世间利害难预期少德义多奸欺雁奴伤损雉媒饱侪辈岂不交倾危古人恶热曾吹董莫近王丹墓畔啼

读文塚铭

长沙进士何襟灵辞源浩瀚如翻倾十五年间聚文藁得三千纸封为莹自怜意气颇足惜题作文塚仍鐫铭富哉言章有如此恨不尽见空传名吾闻人文乃儒效用之佐治王化成五帝三王实推济孔孟忧世存书经真儒不作世已异文士所说非所行趋时治已两不振奋笔多

是图生荣唐文旧录二万卷于今大半归漂零昌黎河东幸存显自外寸片谁与称故知辞藻贵遭遇身後纸札皆劳形当年不用更埋聚伤嗟此似秦儒坑

石井大雨

云垂四山泼墨浓风怒发屋茅遮空征人不安纸盖下猛雨迸射邮亭中厩兵色动牵马出惟恐摧压伤仪同吾衣敝薄未免湿今夜何处还张烘

古人

古人已往知无奈犹被後人兴蠹坏前亦人焉後亦人患自口强心不逮扬雄比孟必有辨马卿慕蔺良足怪未充志气徒好名醇醪岂不因糟馊

君益惠竹杖

衰来病衆难推荡日觉筋骸非壮长百亩锄耘致苦辛万端应接皆牵强稀曾起处钟漏尽多是归时星月朗满腹经纶一意闲垦田头绪重新讲偶逢过客语文字突兀破坏如梦想太息诸书不救饥几曾货利微能仿故人怜我晚愁瘁委曲相寬三复两卒岁尝分蔽骭衣方春又赠扶身杖修颿一竹信瑰特知自何山精产养数节包紵鹤胫连碎花黝纠彪皮爽提携宛胜冰玉滑顿卓便同金石响野老生看每问名耕儿熟见仍私獎未谙黄钺端许制久惯青藜饶俗状灵壽杖坚负曳劳朱藤饰伪功程枉何如得此清峭干本与雪霜争气象旧谷遗根未陆沉末年遇主成真赏已将蜡屐作游伴更共文簪为静党测渡无忧石涧淹助跳肯畏泥坑广时修疆畝便指画自牧鸡豚谁放荡差可撻蓬讯髑髅岂徒辟野披榛莽倾危屡济功转积安稳利征吾滥享辄莫飞飞向葛陂要当受侮敲原壤古人五十徇乡礼我为困穷聊早上画戟彤弓且勿思苍顔荷篠西村丈

代木工言

欧阳子作啄木辞嫉世俗室庐无制善乎其为激之言也余以为啓之者不令而引之者不逊然後力之者剧焉是则财豪之罪宜先匠师之罪可恕於是代木工言

愿君勿斲木工手请斲财户眼与心时平力贍侈不彻有见必欲相摹临试言贱工目所击窃窃富室清溪浚偶来公府证誚讼适见栋宇雄深沉归损多费换堂室唯恐壮丽微差参逡巡子弟到京国新值器服夸如今买真购法不议价持还逞诧争歌吟一家矜尚一乡慕自此籍籍师奢淫当时溪西鄙朴老颇出厉语聊讥侵为言人生倚衣食繁手未必加厚音百年荣落岂易保身後志业须胜任华棖不可孕金谷盛服几许忘釜鬻不见声容赫赫家晚来衰谢无遗簪乃公营求嗣孙毁弓劍往往同芒针人情护近不庇远厉语一出争诟擒况我孱微食技业得不骖靡依余陰区区小材盖如此天下谁与制尺寻安得高梯切闾阖上叩帝膝敷诚忱尽取人间富财户免使僭倖难?斲工手何辜可毋斲自然风定无惊林

奉和内翰太中腊雪出郊长句

冬风虽鬢少霜霰一雪偶严飘腊旦初惊云物稍凄惨更觉天威能变换翰林太守方出郊去
指登高作荣观崩腾逼眼忽无尽皎洁映怀成极绚从前温燠自迷舛到此零凉谁计算下看
平路尚稀微远望诸峯先片段虎头岩侧山腰半冪薄烟占午传声宾从暂纡余命酌圣贤
同款缓飞花满席不须拂小大入肠宁复乱山陰安道今在否更欲扁舟破弥漫

立春雪冻有怀道先贤良展诵腊除见寄长篇辄反其韵为诗奉寄

先春一雪何易消南山骤见青迢窈余寒忽作雨冰怪似有陰沴相呼招第堂晨兴乍出户畏
冷须鬢不敢撩还归书边拥鑪坐想像悠远情悵忉念君幽怀绕嵩少如镜对物皎莫逃乘高
北望三十六只见衰朽连平皋心随归雁身欲去又写佳句传鸣磬缣图遥遥郡阁迴高咏尽
日行周遭无人属和卷自满蚊蚋讎可冠灵鳌自来耕野寄病叟珠玉偶许麻囊韬空山寂历
时一讽爽爽不觉惊骨毛当年只是说苏李後此岂复论刘曹嗟乎步武已误高蹄涔不録沧
海涛东风浩荡官耐饶不善酩酊亏二豪

和道先南城逢相工

古人往矣说可传显以悟者其为贤周侯树立圉圉饿蔡泽饱足四十年知之穷通信已妙降
此抵乞食与钱贪谀末俗满吻涎一中百否纷可怜吾徒自断休问天书册读尽头苍然功名
分比囊里弦且饮美酒饲豚肩

和次道村田歌

蚕蛾已明年卵蚕妇乍闲嫌夜短圃柘无端长宿根潭芦不住抽新管时哉乐矣犁鋤伴簪笠
團团麻袴輓日出离家日入归岂论步武如轮转强丁屡叹牵车远稚子或诃鸣犢缓暴雨晴
雨忽蓊然相惊不觉耕皋晚老翁踞坐抵掌谈獎借专勤讥懒散草衆当争第一耘塍高勿厌
重新剗中天节近香醅绽簪面色如人面里巷齐歌竞渡声人人钱在鸡巢满

卖帚翁

霜日倒芒梢筠劳束勒断送山野村参陪尘土役价卑徒易售用贵安可得人间糞秽日以
多翁负帚秃当奈何

老樵

何山老翁鬢垂雪担负樵苏清晓发城门在望来路长樵重身羸如跛鼈皮枯亦复汗淋漓步
强遥闻气呜咽同行壮俊常後追体倦心烦未容歇街东少年殊傲岸和袖高扉厉声唤低眉
索价退听言移刻才蒙酬与半纳樵收直不敢缓病妇倚门待朝

山中即事寄上知县宣德

一钱重丘山斗粟轻粪土昔闻丰年乐今识丰年苦东家米粒白如银西家稻束大於鼓再三入市又负归殷懃减价无售主刀机纵在屠伯瘦盃勺长闲垆妇去了无蹊径近甘肥只有呻吟厌寒暑相传城邑尚牢落村野萧然安足数鄙夫自分为儒生坎 薄佑来蚕耕言章自昔枉用力债簿几许能除名连旬暴露顔面黑弥月菜茹肠肚青原田常恐不遇岁及此遇矣当何成昨日邻翁谂种播相与竹下团团坐共嗟衰暮值艰难未觉丰登胜饥饿望天宵邈巨致诘得令贤明聊尔贺不驰干隶扰租输更秉公心悯盐课何乡巨恶不手斂有处宿奸皆胆破且勿恤失得且毋论福祸但愿令尹住三年钱重物轻犹可过

麻姑道中

山翁种树不差择桃李无穷杂松柏风吹阳和入芳根万白千红映苍碧猴藏鸟啄人恣窥桃李实熟无完枝由来未可论坚脆松柏材成斧斤至

道先贤良寄示长篇辄此酌和略希一笑

闭门却埽未足高遇酒辄醉岂其豪穷山终岁拥书坐涧谷曷日兴云涛浮沉非工俗子恶只与笔砚为朋曹流年侵寻路婉婉镜里已复惊苍毛作为文章世不用似对妇女论铃韬欲陈肝胆自荐进恐类衆蚁观连螯尝闻声气有求应此日寂寞谁相遭当歌无和亦已矣岂意或有怜悲瞽陈侯嵩丘降灵士传世事业师夔皋有官未得断国论昭代尚把浮名逃陔兰芳香月桂老静卧感古成忧忉题诗远寄巧及我稍比陈敌轻兵撩龐?疎輶孙臆锐胜负不待明占招惟当释耒往共饮不必皎洁分桀尧

夜闻

夜闻黥徒叹行苦传檄驰符渺无数霜晨雨夕常疾驱鬼魅豺虎何山无寝兴顺时岂不欲简书可畏鞭刑毒儒讥冗食知谓谁我非浪费官家粟

内翰太中以某伏谒郡斋特赐长句谨和拜酬

寒人气象寒於冰闻有嘉运无由乘阳和吹嘘品彙生燕谷冻瘁漠未惊年华四十盱畔城惯处涸竭忘流盈六张五角长合并百虑一得嗟何曾鸣悲自昔起不平苦调往往抽毫成穷衰到处难得朋坐使见笑苍蝇声心知俗誉不足荣分死枯槁羞逢迎由来极晦亦小明不在壹郁居蛮荆翰林先生天下名风裁如监初无情偶然误许筵与楹重言既出衆儒兴譬彼卧蛰因雷醒恩文抚接曲尽诚更剡荐牋辨玖琼匹夫有获万口称此世不复投清冷正恐疎濶如樊英

送何斋郎赴选

书堂四顾皆苍山禽鱼树石烟云间纸编屡絶笔屡鬣十载一瞬忘青纶谁令忽忆南薰关尽
箠打马鸣镳鑠春风桃李纷妖嬈辞家大笑涕不漕由来磊落羞穷跼下位亦足惠寡鰥乘田
委吏不敢闲以日自爱维孔顔当今俊杰登朝班拔擢杞梓披榛菅君能忼慨露豹斑岂比嘿
嘿贪食孱果哉往矣步勿?仕以行义贤可攀仆姑百中初满弯书堂静坐尻狂癡

过界山馆

界山馆下平街路行客无穷朝接暮十年二十四回过每觉人烟不如故初寻此地谒高士?里
謹愉忘迫遽固嫌饿子辱间阎乃有善人尸管库歌声酒气等闲满鱼尾彘肩容易具半无宾
客味羣书盈耳只闻论富庶一来奔走绕淮汴高士亦趋城市去南蹄北辙不可留虽有暂经
难久住前冬适自故园出忽见疮痍变其处岂能糠粃保黄台乃忍沟渠叠童孺官条既改驿
亭破儒者不存书屋蠹萧然巷陌但荒埃听说流亡不知数昨朝又自劔池返遭值故人车马
驻相看问讯十年间涕泪沾襟如水注当时饱腹今半殍近岁朱顔多已腐一盃虽举屡噫鸣
永夜不眠犹恟惧哀哉天运不易识安得各齐金石固凌晨复过高士门回首荆榛带霜露

五言律诗

信眼

信眼成吟步虚廊遶几回见云侵月去闻雨趁风来羣动悄已息烦襟相次开殷懃谢凉气少
为挫蚊雷

急雨

急雨抛砂响惊风伐鼓过漏从孤馆永愁入病身多辗转思乡井依稀梦薜萝得他庄叟罪忧
焰日焚和

平云阁

高阁与云平超如近玉京未须论峻絶聊用压崢嶸看雨诸村白乘风百里清途人岂知此拍
额望丹楹

寄微之

末俗矜乡举先生尚滞淹门人能颂述羣小或憎嫌旧学时方用新书日以添陰霾虽拍拍会
解见圆蟾

和酬道先雪中见寄

空馆雪霏霏孤怀不可为
绨袍正蓝缕布褐强参随
想望垆间酒支持席上诗
念君将远适宛转万重思

岁宴

岁宴仍迁徙萧然背客堂
听鸡吹宿火骑马踏晨霜
世味宁皆恶吾生有底忙
奴僮亦相笑归计只他乡
岁宴知何事低徊恋醉乡
衰残三十老岑寂五更长
识字初无益医愁未有方
一盃寅卯举天下又兼忘

小港书事三首

破屋照山垆山民问笔耕
日无宾接戏夜厌鼠横行
被服烟埃色呻吟老病身
不知齐鲁士甘此欲何成
沟涧横三面冈峦匝四隅
满门牛宿留刺耳鸟喧呼
造请难通谒经过易失途
锄犁有余暇歌鼓宴官奴
梦想惊冠盖糟糠继祖孙
多财新得友善讼旧成
策士吞并说门风楚挾痕
饮酣尤壮浪潜听亦消魂

向火

八月淮南地轻寒已中人
病夫嫌冷褐敲火乞乌薪
体畅宁须酒神和不让春
养生聊自适何必问时辰

送及之丞公

先朝贤御史风采九州钦
嗣子传家法孤芳映士林
忠良常在我便佞不关心
得庆宜蒙福时清岂陆沉

金秀才归

书来动乡思归兴偶幡然
故国轻一别彩衣闲八年
星霜亲鬓上文字客灯前
此意终难诘西风满耳蝉

日日

日日听铙鼓坊衢送死频
岂能悲此事争愿作归人
邑屋儿孙衆山坟草树新
去来应迭代渠独泪沾巾

渊老

渊老真高简能逃世外禪
青山如故友白髮任流年
叩竹五六节梵文三四编
无人知此味冷

坐小窗前

邻老

邻老今亡矣谁犹辨短长隙驹沈迅影石火掩孤光错寞悲新事凄迷想旧狂朔风原上草归
梦见松霜气槩平生事粗糲滞故林得无尊道性长有贵儒心躁暴村田酒粗疎欵乃吟暮年
乖此约谁使永差参

送人游边二首

六月洮河上惊飈霍似拳游人方仗策元帅已开边京观酋豪肉军储府藏钱参谋如有取常
武在周篇我爱王忠嗣兵威万里横只知精士马不忍幸功名四印无矜色三边有肃声未知
谁愿此徒用送君行

病起

病起兴萧萧余魂次第招凄酸攻意气衰朽入风标纳带惊腰缓移梳恨发凋何心希此世只
合顺无聊病起南荣下初寒仰日温坐顽知力困视慢觉神昏避俗无长策沉思到故园人生
乃如此微处共谁言

衰病

衰病相侵早劳生得意迟两腓初瘦後左耳半聋时已取世上苦强将天下知只宜收散质偷
惰学支离

赠白

成童即学佛五十始披缁去髮有先後悟空无速迟游云经过雨淙瀑到清漪此意分明否人
间不可思

留题罗汉院愚轩

纷纷伪饰日愚者乃贤欤好丑知谁论文章亦漫书蚁来方弃智匠去莫寻樗枿有闲风月经
过未忍疎

奉和内翰太中残春口占二首

久次萧条郡高情奈乐何莺花三月促风雨一春多野寺携筇到幽溪饮禊过四郊田水暖驻
节问新禾緑陰槐柳院白日静寥寥有句方高咏无宾可屡邀独眠闻漏转纵步看丝飘结束

东州计诗编问酒瓢

晓作

雨恶天光淡风高晚气清四檐喧急溜一枕厌寒声世虑漫沉想此心还不平搔捞下书榻坐对纸窗明

同俊和赋禅悦长老此君轩

只园无俗物轩为此君开但未为龙去何妨引凤来法中常住境天下後凋材岂复如迁客殷懃到处裁

笋蕨

笋蕨吾山味风埃旅馆心盃盘感时节魂梦解参寻烂漫销青紫横斜破玉金平生疎淡意饱足望家林

赠亨父次温伯韵

老未上青云谁论德行纯有名传郡国无食给冬春惯见官徵债多应鬼笑贫岂能逃俗口坐作解嘲人

卧疾

卧疾动淹旬搔爬满爪尘已能忘饭食聊复畏冠巾风雨惊新岁莺花待早春便无游览分樽酒幸相亲

足疾

足疾在中年萧衰只自怜徐行如敬长顽坐似逃禅欲适求新履相忘任故鞵思山徒有兴登顿岂能前亨父錄示山斋即事五篇索和遂次其韵

斋阁得山栖萧然万虑遗此心终异俗吾道更同谁好意凭琴写衰顔取镜窥穷通殊未定幽独欲何之有红盃面酒无白髯间毛合世心虽淡论文气转豪迂疎怜野叟萧散敌儿曹免被南华笑忧时两目蒿荣利机关拙云泉兴味多岂同愚士窘自合圣人和敛敛青毡旧酣酣白石歌故应消息有贫独奈余何啸傲村田景巾裾得所从壮图因酒动睡思向书浓坐见云归岫吟闻雨溅篷但无诗準備何以谢情悰榻为庸儿挂轩因好月开清风知晓暮往事付尘埃喜燕长褰幕嫌蛙屡洒灰山中乐如此肠莫等闲回

卷五

<集部,别集类,北宋建隆至靖康,灌园集>

钦定四库全书

灌园集卷五 宋 吕南公 撰七言律诗

呈知府内翰即次原韵

某顿首伏蒙知府内翰以某微时旧稿或似可观特赐篇章过形褒借园庐有幸绡裘增荣夫大声所入盖非俚耳之能而无言不酬是亦先民之训谨循严韵特致斐吟僭瀆有愆战越以俟某再拜

山人何事忽伸眉新得陈王七步诗题是船斋高咏後开当寒谷带经时仁风坐使羣心动健笔潜将暖律移砚席久荒青案乏报酬非称更惭迟

忧来无处寄深思也拟春秋也作诗空役肺肠添故纸有何勲烈补明时身唯蓬荜行将老志似嵩丘永不移谁使翰林东道主肯敷余论悯衰迟

重游松溪偶题八句示升卿

七年前已到松溪不虑重经有此时寒苦惯为穷进士清高长羡病禅师云山契分输今日香火因缘叹夙期庭栢森森秋实在向来尘想误多疑

梦寐

偶入重城坐客堂年年风味只荒凉春花秋月各无味晚鼓晓钟俱断肠别恨不堪诗控引高情犹赖酒分张着书耕钓平生事梦寐西村五亩桑

送傅济道之漳浦尉

河梁东度送征鞭屈指闽荒路二千难向解携无一语再思重见尚三年高堂上壽今谁及白屋青衫合自怜努力官箴莫轻堕清时无善不登延

送刘贤甫之余干尉

太学诸生初入官绿衣新尉古余干科場得志已容易下邑徒劳不足难萑泽察奸行繚绕龔厅参论坐盘桓羽仪更养文章去他日云天见孔鸾

出蔡州

奉天桥下水汤汤桥上征人破晓光秋色稍能禁暑气客愁终欲害离肠遭逢未入千年会穷苦犹为此日忙笑杀壶公祠畔路又随尘土过仙乡

奉酬纯父浚都病起见寄

建康学士注鱼虫枹罕兵官策守攻此日精勤徒有得异时荣盛各成空吾能委曲谋田上君乃呻吟厌旅中故国他乡俱未快劳生何事不齐同

奉别道先

邂逅过从两载强诗书存问满藜牀光荣得路谁非友道义心知独不忘圣代君才多勉勉中年吾髮已苍苍牙弦自此聊停缓万里穷山隔帝乡

桐城与曾唐杰话别

事物无穷世路长人生聚散亦堪伤寒暄旦暮年年急尘土风波处处忙我马欲冲梁苑雪君帆先犯楚天霜交情若是存悠久定有音书入帝乡

宿青绶舖

两檻中间风脚横解衣铺簟近南荣曦光欲堕已睡熟斗柄转斜才梦惊方恨此时无月色未知何处有蚊声尘埃恶热明朝路会为今宵动旅情

过洪州

未定荣华与退休三年四度过洪州红尘白日知何得西去东归不自由一带好山谁旧隐百端闲事我新忧可能石马亭边路见客区区到白头

道先游仙都至李尊师故居见余早岁题赠拙句存於屋壁辄寄四韵重相叹赏谨有赓酬

仙李枝条万国分陇西旧望道家孙曾经二十载还往忽过七千余晓昏人落九泉无可奈诗存古壁更休论困穷辞气君偏爱太息南征返北辕

十月二十日过陈二表民追讲昔年同学事迹慨然赠之以诗

西斋共学昔辛勤一别侵寻十四春此日科場还似梦旧时书屋已成尘文章不鬪钱财福贫病长依寂寞滨相值酒边当取醉大家忘却困穷身

百年

百年长短有愁兼世味如今岂足沾客路无聊贫苒苒春风相值病厌厌辞章漫与前贤并气
调终遭俗士嫌安得一闲散去耕桑吟醉似陶潜

晓陪内翰步至北园

晓风吹雨北园开追逐双旌踏翠苔芍药一栏霞上锦嫩荷千片玉流盃多年架阁游春兴此
日关防感物才花不能言草成恨故应知我偶然来

次韵显翁幽居即事

文高只合论钱神屈膝须防望贵尘轩冕未来应有命丘园随分亦安身山樵水钓心常逸夜
坐朝耕乐更均嗟我久怀农圃计何时操耒即相亲

送唐杰重过金陵

金陵春水解归舟重到金陵恰仲秋世路已衔奔走恨风光更引别离愁支持事变何由办叹
息安闲不易求祇有北山长好在为余频上冶城头

寄赠张县丞

二年来往南丰路饱听乡民说县丞刚果已如秋汉鄂洁清仍似玉壶冰室无奸吏纵横入门
有书生旦暮登何事廉车帷幕厚不将高位待贤能

熙寧五年归至旧山伤已感时作诗奉呈升卿黄丈

几年奔走背农桑半世归来只感伤蛇足画成曾失酒古书看遍却亡羊一席屨何从受三径
园庐已就荒犹赖比邻贤父老许同飞鸞馥余粮

杉树湖前流水远石城街左乱山苍滩深潭浅无由问竹秀松枯不可常物理自应随变动道
心聊欲寄存亡唯君坐占忘言境珍重诗编与酒觞

再和呈二首

五亩之园未种桑自怜疎懒致财伤稻粱只是同鷄鶩皮鞞徒劳胜犬羊敢羨苏秦终富贵正
忧郗鉴遇饥荒遭承若值开元日何恤东南万里粮

茂林修竹旧时乡争得安闲两鬓苍长忆樵渔有山涧岂论勲业到旗常儿童好在今初见故

旧寻来半已亡此意不堪频念虑便倾襟抱付深觞

再用前韵奉赠升卿三十一丈

百年此地有维桑後庆唯公免物伤早岁懿文如鸞鷟一生纯德似羔羊人推奥学追三篋自许宽巾贮八荒冷笑村田诸父老满胸茅塞只资粮

好德年高富且康就中多福荷穹苍吟哦有得能千首议论无穷只五常此日乡闾获矜式异时风化免销亡嗟余欲买西隣住岁为先生祝寿觞

金陵递中示到亨父老丈去年秋初见寄诗书捧咏无穷之意不胜私感因成四韵奉呈

邮籤初发去年书叹息贫穷未破除乞食君方如檻虎贼粮我亦似卑居有求自恨伤生酷多难谁能虑事疎同病相忧古来语此情今日好欷歔

九月一日口号奉呈显翁文叔

九秋未尽六秋穷露冷风高爽气雄无事日成多事过故乡身与异乡同心随酒盏归愁外眼对时花到梦中鸿鴈已南吾渐北自怜安稳愧龐公

次韵酬朱推官

上?辉光不许观故园岑寂且闲眠无心自可齐穷达有口皆能论圣贤百本柔桑绕茅屋一陂清水灌沙田余生饱暖聊依此岂有高风远市?

寄酒伴唐彦君益

门外水渠鸣漉漉屋头桐叶落翩翩向来苦旱难寻井及此愁霖易怨天数盞旧藏真糯液一盘初烂壮牛肩故人忙迫城隍远独息书牀又醉眠

得乡信

乡信迢迢出旧山琴心先落断弦间数行文字传新事几段悲欢破客颜闻喜竹林经雪好想怜溪水逐年闲征衫有泪归无计一夜穷魂趣梦还

过聂彦伦故宅

彦伦门外旧城墙雉堞崩销草木荒人物已成尘土去风?犹与岁时长绿衫科第何曾贵白髮诗书不可常平昔往还吾亦预经过此日倍凄凉

范十七司理见问岁除醵蔬夜饮之约新春愆爽以八句答之

田泥涣烂醵怀子圃塋肥腴菜长心僧瓠纵然忘忌讳书刀何忍屡残淫村渔不逊财难动澍
雨无端草易深拘束学官懒复懒坐愁佳约未能寻【范君寄住北成佛屋】

出都

霜风吹背出皇都大笑回头谢酒垆楚国但闻悲弃璞鲁门那复辨真儒百年风槩文终在一
世光荣意已无乞得耕桑了疎野太平何害有潜夫

稚女

衣无罗绮且贫清口有诗书亦性灵论客须多如反寇笑爷?破似穷伶园中果熟心先动案上
盃传眼更青钗拟荆枝帚拟布暮年吾活正凋零

寄李居士

三月山城叹旅穷冷看豪士振浇风送花盘上春情重卖酒垆前醉魄雄钟鼓聒眠崇佛庙绮
罗争路拜神宫此怀若向林泉说又落仙翁大笑中

奉答顾言见寄新句二首

早年辛苦待飞翻翅折无因达九关更使襟灵憎市井足知缘分在云山谁怜古学长无用自
幸余生且就闲多谢鹿鸣筵上友解传诗句慰衰颜

羨君肝胆壮难攀不厌长安出入关探穴定期收虎子采薇寧暇顾西山盱衡自庆千年运冷
笑人求一日闲乃肯题诗寄空谷的於游旧有温颜

和酬道先贤良见寄新句

中林独往寡襟期只与耕桑治町畦迟晚识君真幸会生平於世似分携未能捧履师黄石且
欲同歌效紫溪郡阁郊园遥百里未妨怀寄屡封题

池口阻风奉寄唐杰

贵池亭下浪如山触拨愁根阻楫间眼为故人成北望梦知乡路数东还此生太半沦忧患万
事何时脱险艰不敢临流更窥影便疑秋鬓已斑斑

子发移令上高

两州三载屈参卿
百里初来福困甿
无处不思逃浊暗
此邦何幸得贤明
後生智足科防密
凶岁财伤性命轻
能为爱人忘富贵
岂徒循吏有佳声

有怀溪斋奉寄微之

溪光清媚四山稠
十五年前记薄游
茆屋读书风满座
野桥寻酒月当头
身名不分轻如梦
甲历谁令过若流
此地主人相问否
一?今带百端忧

题陶集

未读陶诗已爱闲
自从能读转思山
烟霞合定徘徊分
尘土刚侵勉强顔
伊昔有人安白屋
祗今何事慕青纶
披蓑戴笠终当去
更在规谋俛仰间

豫章城

西山东下古池隍
增饰依稀问晚唐
平世但严民筦钥
乱时曾是贼金汤
春归旧堞多芳草
鸟聚荒陲正夕阳
也欲登临赋风物
自怜才笔厌忧伤

晓过城隍街马上看木芙蓉

秋来风味苦阑珊
偶为繁红略据鞍
何处更期征鴈过
祗今聊作故人看
三冬已至休争气
九月将残未觉寒
自有荣华趁时节
免将憔悴惜幽兰

八月十四夜小雨

小雨遮空意未回
轻风迎夜势初来
青楼月好人何在
锦帐灯寒扇自开
四七功名真土芥
一千期运亦烟埃
会须放纵云雷手
不到人间有剩才

高赋亭二首

耳外蜩螗响切才
眼前冈?秀环回
曦光堕地收风尽
云脚遮山送雨来
长恐易成多事恨
可怜难见絶尘才
何由上得崑崙顶
试使烦襟磊落开

事变纷纷不可防
祗应人世恶忧伤
高情易与时风背
远虑空为智士忙
感古有怀成戚戚
就书图活得遑遑
贫穷到处乖惊况
不但他乡异故乡

将归南城留别高赋亭二首

一上高亭一惨然
颺流无状见风烟
林泉本是侬家分
衣食刚为此世牵
流水岭云能自得
樵

歌谷响远相连来时祗恐禽鱼笑掩敛南华第一篇

寄食官斋过一暮登临容易此阶梯四时光景非无乐千里忧伤却自迷旷望可能舒感慨幽吟长是写酸嘶从今风物多清暇免被书生掩泪题

清明日再题高赋亭

二年来作旅行人节物相逢但感情彭蠡湖边看竞渡攸阳山畔过清明游神杳默皆愁意倾耳寻常得恨声若有桑麻三亩地肯将高迹学蓬萍

送子发赴江州司理

湓江湛湛照闾闾庐岳蟠蟠郭郭此地一官虽郁屈异人当日亦踟蹰元规楼下随红旆居易祠前看白须才调似君真不薄有诗无吝寄云夫

寄范司理

郡南郡北叫呼间砚席相望聚首难笑我性灵偏忍饿怜君风韵似无官傥来富贵能多与不朽文章倍好看莫怪参寻颇疎缓鞋穿衣薄怯霜寒

送张司理

三年频说狱空虚叹息贤才治有余晓踏府尘铃宵眇夜吟庭月树扶疎尚微官职人皆有已大精神衆不如努力无忘建功业秃毫他日为君书

感怀奉呈纯父

去年三月出京关汴水东奔不可宽今岁此时还逆旅牡丹开尽未曾看春风祇管添须发世事争来触肺肝传语百忧休恣横已因泉石着南冠

次韵彦臣感怀

不得经纶辅太平枉於天地荷生成少如贾谊频垂涕老似樊须请学耕醉舞或将猴共势饥吟时与蚓同声若教眼底不识字应已脱除穷困名

过湖口

野客西来意绪劳为停征棹到亭臯湖山气象皆清旷名利襟怀自郁陶晓市鱼多腥万鼻晚波风健趁千艘高情未有分张处愁诵山移一两遭

偶书所怀

凤凰亭上倚层轩桃李分香到几筵曾与故人同一饮试思前事已三年歌懽旧兴知何在衰
新愁祇自怜纵使春风容病迹亦贪牕下枕书眠

奉和内翰太中建昌三见梅花

三见梅花似故人楚乡春是洛阳春蘸盃酒意枝枝重入笔诗情处处新南野幽林寻去远西
园高树绕来频无心草木穷山里还解遭逢侍从臣

登滕王阁

韦君德政满洪州去後无人更讲求帝子骄奢起高阁到今连岁为增修座中箫鼓来无定檻
外帆樯过不休惆怅幽怀谁与问水长山远总关愁

书边

劳佚由来命不同悠悠身事几时穷学能爱日终无补愁解迎春却有功千虑漫游言语外寸
心常在苦辛中故应樽酒怜顛顚会借书边醉颊红

风雨

春来未苦狂风雨初见云雷气象豪合杂忽如乔岳倒迷冥不辨九天高林峦偃亚传雄韵沟
涧苍茫起怒涛花卉一空何足问且欣余润入耕臯

哭邓氏女兄

东田嶂下古荒村又向荆榛占一坟寒苦到今初是了荣枯从此更休分棺旁乳女随遗襦膝
下亡男恨白云共系人间酸鼻事欲言聊复泪纷纷

凄凉三十六青春叹息从人只累身内外诸门方破碎初终两姓却沉沦平生尚未谙奢泰已
病犹能强补纫便向夜台逢考妣应传同气各遭迍

答道先寄酒柴荆

江州双酎到篱东快杀陶家寂寞翁田野放怀容易老篇章写意敢言工渐生耳外燠烘热转
觉盃间潏灑空何必籃輿依五柳久来身世醉乡中

己未上元宿崇相山寺

七十年华已半除新春犹复感穷途
肠便酒味虽如旧眼对花枝只似无
计画但求闲次第文章知是枉功夫
满城灯火笙歌沸独访东山宿佛图

陪道先兄游麻源辄赋二小诗

借得篮舆便出城山光门外望西行
昨宵偶雨路尘少今日好风林霭轻
有竹人家庭院秀避驹樵客面顏生
溪田桥北驼鞍岭犹记当年志未平

十五年前胆气麤拟将文字换金珠
科場委顿成何事耕稼辛勤落晚途
累岁不曾言石磴居山空道有茅庐
今朝碧涧潺湲响若不因公得听无

永定东轩望净土芭蕉

高丛猎猎画檐西曾听寒声惨淡吹
午枕有怀疎雨後夜灯无语恶风时
二年成别应多恨此日凭高动所思
人世不堪谋虑远眼前容易得伤悲

过游源驿

游源驿里壁间诗去岁经过一览时
客子面皮真铁铸闲人公论是灵旗
有谁谗浪慵开口只我哀怜为歛眉
多谢县侯新荡涤从今莫恨放行迟

池塘

池塘春草夏仍多更照层林发翠波
到处风光长好在座中愁客奈情何
眼随高鸟寻乡思手把闲书养睡魔
谁使早蝉能触拨新声来与断肠和

次韵济道见寄

君作王官傲衆儒尚逢廊庙有为初
尘中白日虽牵逼笔下清风肯破除
欲去定成贤者隐未归尝与俗流疎
人生到处随荣愿何必江湖胜漆沮

追送城东但立谈当时惜别恨駢骖
一封消息难频到千里倾思只坐谖
知有才谋当奋发岂於州县却悲慚
为文尚喜多余暇寄我新诗似渭南

过庄子祠堂【堂以嵇康配坐】

客过蒙城日欲曛更寻祠馆拜遗真
文章昔已悲衰世香火今谁望俗人
诸子异端争土苴千秋余乱见缘因
祗应叔夜轻狂辈未是先生入室宾

奉寄芜湖征局都曹

不见铜陵唱和翁相望三度叹秋风商量难得樽罍共存问空烦简札通驴上阆仙邀苦思草中田子建微功明年官满当携手未定韩郎耳便聋

梳头见白髮

未老先斑岂自由可怜蒲柳易惊秋不缘迁染应非俗若有梯媒必是愁老蝨纵嫌相间别素丝何害共风流尘劳兴味吾谙尽肯似豪人讳白头

黄九游河州

黄河东背贺兰山回望尘沙万里寛土地久传戎种姓人民还笑汉衣冠军中意气谁先得史上功名我惯看何日归来谈将略转吾愁面入忻懽

六月二十七日醉书普安院壁

西寻行甫戍已见夜候显翁朝乃来隔树鸣蝉休聒耳满樽浮蚁且衔盃多忧莫道无由解一醉从初不用催传语羣书未乖间只今相忆尚须回

题河源诸兄壁

不见诸兄十载稀重来问事只伤悲一家未有中兴地两地皆成永感时道在莫亏清白业力微空赋鵲鵠诗吾门旧庆天如报会向层霄得桂枝

将离东洲书社留题屋壁

偶向林间寄病躯七看圆缺印蟾蜍何言雾隐南山豹只得人怜涸辙鱼衮衮光陰添一梦劳劳精干落羣书扬雄若有闲名在此地曾经寂寞居

将归南城书内乐堂壁

野客辞郷道转孤祗於愁上进工夫乞衣借食亏豪气弄笔翻书滞壮图三径未成真隐约五穷争现主人迂南归漫过庚桑国不得留参鞅掌徒

己酉岁归省松楸过武陵翁所居留书屋壁

千里归来尽苦辛见君依旧自由身始知絶学无文者胜却翻书弄笔人案上方经闲白日门前车马漫红尘半轩风竹一樽酒冷笑世途争富贫

卷六

钦定四库全书

灌园集卷六 宋 吕南公 撰七言律诗

忆西村

东冈西下古墩头草木风烟事事幽畦壠弯环延果菜笲簪参互献鱼鳅常开夜户夸无寇竟
拨香醅贺有秋愿定此居犹未得岂堪侥幸望公侯

鍾南平祠像

天禄空虚土运崩匹夫徒手起揜枪还将有限骁雄力换得无穷跋扈名已是用心贪祸乱尚
何顔面见昇平丹青此日凝埃色尚似忧慚问罪兵

寄黄梦授机宜

少年秋赋险横飞晚去从军脱布衣只见乡评推孝行岂知俗效在兵机黄云古渭边烽断春
草临洮战马肥了取功名上麟阁莫因昼锦苦思归

得唐彦回篇再寄

手把封题又惨然坐惊新句俊翩翩穷通可是俱关命聚散由来亦系天此日未逃衰俗口几
时真及古人肩一樽酩酊难频共况望青绫被底眠

闻唐彦君益作计相过先以此寄用前韵

见说东征计决然梦魂迎马去翩翩遥怜迢递荒村路幸对温和此日天意厚但青贫友眼装
轻肯赤仆夫肩书编酒盏蒲团坐预拟中宵未放眠

緘题道先诗句尚多未和酬者因书短律奉寄

已作醉乡贫户限更逢诗匠恶穿裁王弘一酎何曾送崔立千篇不住来枕上精神难托梦牀
头卷轴易成堆贺兰溪上如归去省得衰翁合勺才

寄邓师厚二首

茅屋分携但偶然蟾光今已十回圆自存交分长长在不用音书叠叠传无术入时犹是命有

身多病岂非天勸游已作南归计只待槐梢沸早蝉

庾岭前头梅散漫灞山东下水滢滢二年时节俱为客千里家山各未归
俛睫游从真丑谬方头言论易乖违人间胜事知多少专把凄凉属布衣

金陵寄示亨父

东游西上但差参寒饿催軀失本心多难有言悲运命厌贫无意惜光陰
穷通未定功名主疾病能将少壮侵故国渔樵应可入寄声先为问云林

寄亨父

当年勇慕古人风坎壈无由到泽宫力命不容相鬪竞光陰从此便和同
身如孟氏兼三乐家似昌黎厌五穷莫为明时颇惆怅着书亦是济时功

再寄亨父

匹马辞家腊雪初二年名姓入銓书熊罴帅府招韩愈邑里经筵失仲舒
稳把声荣收雨露冷看交旧厌沟渠蓝衣定有夸乡日为到耕村问溺沮

奉寄子发

春雷动地竹牙生社雨淋冈蕨臂擎田野盃盘容我饱牛羊鼎俎为谁荣
能无智虑随天转未有工夫与俗争苦忆南园江健令解於忙处用闲情

解於忙处用闲情絶口多财与美名剥啄至门方就枕毕逋归树却催耕
烧香事佛人俱佞曳屣歌诗我亦清笋蕨又芳春酒冽相思何计可同倾

戏题白鹤观

辽海沈沈信息稀苍松枯尽草侵扉楼台有字知年岁城郭无人辨是非
像座风轻蛛作网醺坛春老藓成围道翁久蓄瑶琴意莫为闲名取次挥

南丰道中口占

冷雨迷蒙懒举头望中恐得故乡愁梅经旧腊香犹在水被东风冻已收
鸟喜春和纷格磔马嫌泥滑转夷犹人生祇有安居好可奈安居不易求

野菜

采采新英出远冈生香不断冷垂浆地神手老皮先紫山鬼肠饥色更苍野馔自宜清品味世情谁识淡馨香旧林春草盘飧惯忆共隣翁踞坐尝

秋堂

秋堂灯烛夜辉辉照我书边泪湿衣何术更堪图惬意快平生已是足乖违悠悠客路和愁往杳杳青山借梦归虫响风鸣俱有恨惊残二十七年非

过列岫轩辄题小诗

槛前清沼一奩披墙外横山百马肥长使座中知爽气岂烦天际问修眉留宾出酒人皆喜不语看云衆未知饶借俗儒谭尔雅主公偏重谢家诗

赠叔宪

轩昂不肯事雕镌放却名缰已十秋举世有为皆负累百年无闷更何求长驱好意归吟笔笑领真风贮酒甌嫌我生涯非濩落纸编寒夜困灯油

赠王九

李杜是非张相国曹刘忌惮吕将军异时各有凌人气此日何妨负我文议论当如山顶石光荣会似雨余云恨君不悔邯鄲步希世功夫枉十分

尘土

尘土营营自满城此间赏望四时清朝看云树吟天末夜对溪光醉月明只见渔樵真气象岂知?市细纷争座中更挂庸儿榻未识冰壶有旧名

道卿上人新作塔亭准拟寿终乞余题诗

道人八十转康宁却傲浮屠起竊亭日月无穷终系数乾坤有坏亦因形未张云鹤萧萧影先养松楸郁郁青究竟会应逢逸少为师重勒雁门铭

寄观上人

袈裟初带帝城尘便咏南陔望白云贾岛未为穷主簿汤休何事小参军古书似我闲千卷山酒从谁尽十分正是诸生薄韩柳劝师絶口莫言文

寄上山阳太守屯田

故国无田只一瓢儒冠相误感萍漂虞翻骨相终迍滞许劭题评漫借饶已养道心忘贵贱故应荣分任渔樵文章解颂贤人业更坐看君立九霄

献翰林太守

欲辞铃阁重徘徊世路无人计实材宾榻少因高士下醴樽多向俗儒开孤踪此日叨余论直笔他年倚上台召节不迟天陛远辍耕朝夕为公来

和酬道先高秋见寄之句

眼看金菊木芙蓉想见严城此景同儒术凋零归故纸岁华催趁入衰翁千秋治乱三锺酒万里关河一亩宫南鹞北鹰方得志更谁迂阔问哀鸿

晚出寿春

马足迟迟破晓霜朔风迎袖过川梁帘栊几处迷醒魄烟霭满空含曙光已是途程规进取可能怀抱似鸿荒平沙莽莽兵戈地却为千秋起吊伤

书斋春日

花困蜂莺柳困风年年春恨渺无穷已添病格忧诗债未破愁城忆酒功日月正居劳苦上山川长在梦魂中游鞍赏席今多少想见浓阴替乱红

和酬李宣德二首

销闲堂上日何思或弄鸣琴或赋诗声正只传心静处篇成不待烛残时隆中有客吟梁甫洛下无人说克儿此日余音到逋客定如医药蓄青芝

临邛大邑少鸿生初敬多辞马长卿几许分财来涤器不如收迹去躬耕生前遇主无高位死後遗文有盛名毕竟负他贤令意被人传说是闲情

次韵辉卿感春

日日春阴共惨然愁怀不称艳阳天已从鲁酒迷醒枕更向瑶琴怯武弦往事自惊千里梦胜游谁犯五更烟因君解道花如锦始为芳菲忆去年

再和

欲写春愁上粉牋只凝幽思恨遥天尘埃漫蠹霞书字日月终亏锦瑟弦夜听子规欹醉枕晓

看新燕立疎烟冷灰残烛相遭惯触拨东风不记年

再和

闻说羣芳初满园未能寻赏恨参天风豪雨横伤莺蝶酒冷诗荒负管弦屐齿有时临薜径马头何日破晴烟谁何赠我宽怀语每道新年似旧年

熙宁六年再至邓氏北轩感而书壁

窗扉暮闔晓还开乞食寒儒去复来土木不妨人冷落诗书能使客低徊言如鸚鵡今徒尔宿似夫不亦得哉但识浮生皆寄托莫从河汉论涓埃

寄从义法曹教授

军学先生骨气清每嫌盃酒乱襟灵讥排只是攻三雅熟烂除非是六经榴榼日虚尘拂拂兔毫宵运烛荧荧俸钱添得真何用好赠茱阳买绿醪

奉酬范十七见寄二首

接人坐语送人行两饭逡巡晚鼓鸣遇社有何欢次第过春多是病心情消磨白日无云补计算流年但暗惊苦雨寂寥还一醉梦魂依旧背严城

一纸新诗入北城起予聊复醉魂惊低心苦淡吾徒事转眼炎凉此世情六月未须论止息三年方看大飞鸣锱铢社肉休过问幸有鰕蔬且烂羹

再和

浮桁门外树如城归路迢迢梦易惊嗟我衰迟从旅食感君存问有诗情牡丹不在儒宫种杜宇偏当静夜鸣劳费主公怜苦淡驼蹄时劝一盃羹

几欲相寻出郭行念君家雁不能鸣逢杯得醉常常事渐老多慈种种情荏苒又闻寒食近牵缠空作暮春惊祇应已入东风笑愁思长於万里城

次韵酬亨父见寄【时亨父在厚平山中】

醉墨淋漓诗屡酬浮蛆上下酒新篘人生有此自可乐世事无穷何足忧端是览辉同鸞鷟不应专宿傲夫不嗟予久负思山兴空得公诗展复讴

和酬天休

故人邂逅早莺时一别经秋燕尽归已是苦贫看客懒更堪长病出门稀何曾富贵来如梦但觉光陰去似飞欲酌清樽相解释莫嫌穷巷瓦盃微

酬何威中

十年经画凿坏逃只为乖违不为高尽力未能成饱煖致身那解立勲劳已从酒盞忘千虑羞看贪人校一毛游旧惟君尚相记每将新句访耕臯

和酬伯华

襄阳耆旧足高风不识州城有德公器业我应居衆後姓名今耻达宸聪文章末技知何用衣食残年叹屡空朋友赠言当儆戒恨君虚美一篇中

道先贤良以其到郡未及相见遽寄四韵谨以酬之

山人还是入闔閭自笑穷心失本初郑相旧怜穷御寇秦王新伏勇相如衣裘破敝身谋拙齿髮凋残世味疎人正弃捐吾独取似君风谊更谁欤

酬次道京还见寄诗二首

会得吾生只泛浮莫将耕钓异公侯文章高去乃青史富贵极来皆白头至乐如今惟强饮最贤从古是无求荷源礫上枫林叶又过元丰第六秋

平昔贤他马少游有官何必至封侯天如大雨当挥手命合高眠亦到头幽涧鱼肥堪煮炙丰年酒贱易追求恨君门馆无酣伴枉共痴儿对一秋

酬西阁书事

西山阁上彩衣人过得三冬似九春长恨作诗无客和更缘中酒被妻嗔有官未入功名境多暇仍思寂寞滨文雅一时传万世却应能此是荣亲

朝曦阁诗为李道正赋

道人开阁破东厢惯看朝曦亦坐忘但见长时似车盖不知何处是扶桑云归後崦陰无迹水过前渠响自忙雨露纵然能恶作未妨微白到书牀

至凌云山却寄平仲

建业归来路二千一舟轻借死梯缘贵池亭下风如鼓采石江头浪拍天险与阳侯成愤友幸

从鱼腹脱腥涎只今亲旧知怜否尚有余生亦偶然

九月七日偶书

愁里光阴不觉忙忽闻时节近重阳絶无闲药拟衰疾才检旧衣防早霜未必此生专冷落漫因往事巧思量呼僮闲赏篱边菊并括忧端付一觞

伏覩教場後庭新移梅树辄赋小诗呈献内翰太中

中庭移植气萧萧无数芳华压翠条田地纵然非旧壤冰霜犹可见孤标人间岁月何曾老物外馨香猝未销故有明年佳实在鉶羹滋味看和调

闻仙都李道士下世

布褐毛冠七十秋为谁浮泛为谁休但曾计日防三鬼不惯携琴谒五侯诗卷在前聊养目酒尊从此罢销忧七星杉下朝曦阁香火应教弟子修

长忆初能戴幅巾仙都门外学游人科场未数金门赋襟袖空余紫陌尘平世选贤终法令暮年如我但寒贫惟师不信文章误只道遭逢有屈伸

九月霪霖谷欲登稻芽连穗水漫塍无方解我心愁寂更欲闻师近寝兴纸尾忽传成异物棺中还恐已飞昇羲和睡熟泥涂恶絮酒寻浇叹未能

寄江州沈尊师

洞天一别七春风长梦桃花烂漫红不得云雷相借助且因文学守贫穷曾寻物外无穷意已觉人间万事空便作野夫才是分只嗟凡骨误仙翁

五言絶句

橘林居士题载溪馆壁

云冻月笼影风生水涩寒故人真似雪何必到门阑

七言絶句

寄茶李侍禁

东塞将军日月闲五兵不试坐云间却因睡思侵书卷送与茶瓯解壮顔

过虎林渡

淮南行尽到江南野渡风高送晚帆五五长亭莫回首向来穷泪已盈衫

戏题白鹤观

八月风高宇宙清银河秋浪到天声门前合有仙槎过会待参随上玉京

戏题妙灵观怪松

二十年前看怒龙鳞鬣半已召雷风至今未拂层霄去可是怀文与我同

晓雨

晓雨彭彭发旧泥田家拆壁备朝炊无数星辰一轮月夜来空似欲晴时

重过福兴院

重过山寺借牀眠屈指前游已七年文字转工身转困被僧相问却凄然

乞钱谋食总悠悠两事平生话亦羞何意茂林修竹下今年还得一回游

和道先雨中栽花

二月前头雨意回移花趁雨破青苔芳根得地春工敏定有新英次第开

旋封旋筑带霏微赢得浇瓶不用携衆草自今常避地主人来绕渐成蹊

题药录

华佗气絶钓台侧扁鹊坟荒浚水边末俗好财无妙智此书何日似鱼筌

茶铛

宾榻萧萧午户开松枝火尽半寒灰主人欲就游仙梦休愿煎茶醒睡来

风雨

风雨萧萧夜漏沈北窗灯影见伤心从今莫更言沧海只合思量此恨深

有见

卖药诸生体调狂尘埃空助老来忙壶中自少闲天地岂是今无费长房

晓日

晓日曚曚上纸窗小炉文火近缣绡冲愁满盏扶头酒笑杀医师第一方

咏白髮

人言华髮是愁功不分悲伤得老翁亦有不愁头自白可怜功过略相同

已任萧衰潜似雪何须轻脱便随梳不及穷愁索长远一生相逐未相疎

偶成

苒苒新青上草头小庭春色强悠悠酒罍虚卧琴弦暗眼见风光似九秋

新室

为奸只是疑王涉至死何曾识杜吴四体早知成散漫前年悔更染闲须

魏勃

虽发齐兵未不臣问时何用便销魂一生才勇都纖小可怪区区扫相门

祢衡

世乱无人及祢衡眼看豺虎似蚊蝇乔玄荀彧皆儒雅至死何曾晓爱憎

覆船山

山似舟航压衆坡静为平地动为波桅檣不藉瞻乌首争奈风帆百尺何

过武陵翁题其屋壁

十年骑马走红尘非敢求为富贵人只愿似他龚处士不余不欠一闲身

绿竹林边白髮翁面顏犹似壮时红朝来卖药钱多少又闪间愁入醉中

废井

清不能常浊有余辘轳音絶
螯苔枯荒凉欲就羣蛙问
今有观天坐客无见
广度院紫荆一株先开

满树新英待发时东风先动
向阳枝同根若是生疑怪
为道开迟谢亦迟
兰溪驿

驿亭何处近兰溪行尽莲华
日暮时春雨发香无分见
断肠频诵杜郎诗
恶客【薛许昌集有好客篇故作此以拟反对】

恶客无端舍旧山坐令千虑
险相关青灯白日贫兼病
听着农桑更厚顔
野客【拟欧阳詹】

野客来过洞府门天风吹断
去时魂得归应被乡人笑
衣上云霞有异痕
酒客

酒客胸襟亦自贤平生不断
醉因缘望见青帘涎已活
谁能顾惜杖头钱
夜拟李义山四更四点

四更四点露成霜个里愁人
暗断肠鼓角未喧闻鼻鼾
北风窗户月荒凉
反李义山人欲篇

药囊易中荆卿背匕首难伤
赵政胸燕国无辜竟鱼肉
可能人欲有从天
题圆上人宴静轩

宴安深静属居僧一炷檀烟
万虑清犹自笑他檐外铎
风来未免鬪鸣声
客到

客到空斋说早春嫩红轻绿
渐纷纷寒人不预寻芳品
多谢东风许听闻

答内翰太中观插稻见寄

睡过春深一月余绿秧黄犊负村居东风似恨归耕晚故遣黎牀日枕书

杨朱

战国功名尺寸劳先生持论异吾曹孟轲解辩承三圣後世谁曾拔一毛

陈都曹座中出示诸公曲词以四句酬之

看尽新词听尽声未能高和耳徒倾聋身纵作岐山老争得闻他彩凤鸣

真辉阁

会得真时真亦空光辉何足更流通劝师不用严标榜瞽者逢灯与暗同

安昌县侯

能说齐论与鲁论世儒希合便纷纷何曾後学皆传信只有奸名万古闻

小檻

小檻幽花已破香此心无处避韶光年年恶作伤春客稳为东风细断肠

杨八送笋以四句谢之时在湖口

杀却卢家十五龙野人盘馔当时丰湖干少得中林味此日乡心转不同

诗余

调笑令【倣韦苏州作】

行客行客身世东西南北家林迢递不归岁时悲盛泪垂垂泪垂泪两鬓与霜相似

前调

华草华草秀发乘春更好深心密叶纷纷妖韶随处动人动人动公子王孙情重

卷七

<集部,别集类,北宋建隆至靖康,灌园集>

钦定四库全书

灌园集卷七 宋 吕南公 撰议

追难皮日休鄙孝议

皮子作鄙孝议二篇疾时之剔股济亲及庐於墓者後二百年余读其文复病皮子之不强於道也造语以难之难曰孝非浅狭之道也大推之弥六合不能限小存之寻常方寸亦足以与之经曰圣人之德何以加於孝乎非莫大之谓耶用天之道分地之利是亦为孝非小存之谓耶盖圣人之明孝以报也主之以爱恭不碍其迹而特原其心心苟有在矣不必科其所趋也古之为孝者多矣其时势迹状艰难平坦未尝一辙要其所归惟爱亲而已矣奚必圣人开以如此而後行之乎今人能哀其亲之疾苦而忧穷无策於是剔股以进焉此岂以无益望其亲哉用父母之遗体济父母之危命经虽不言然未为不道也若曰吾身可宝而吾亲有命则悠悠世习谁非顽忍耶虽大舜曾参苟其亲病苦而有以此告亦必为之矣二人之孝应不系於避杖而汉景之不肯吮痈亦未足贤也凡人之情便安佚而畏烦苦世衰而教不振者久矣民之无良有生不能养而死不能葬者为人上者取寸心而劝激之犹不足以?动今有人哀思其亲不足而从之夙夕於草树荒凉之间谅非偶然必又禁之是爱亲者反得刑也夫剔股甚痛而庐墓甚不便也人情顾近而忽远安有快於疮割利於野处而直幸悠悠之旌赏耶万一为之而上之人不恤则其人亦将遽已耶天下之奸顽冀幸者时甚不少悦令剔股庐墓皆主於邀名免徭则其剔且庐者奚其不纷纷耶若人之心固易原也原其心而不害虽圣人出固亦与之况经语哉惜乎皮子之隘吾名教而欲禁人爱恭於亲也

论

经行论

经明行修非相因之事是以古今讲授之士虽以传解显闻而有不得罪於名教者也汉以来学经家衆矣顾违行则犹多董仲舒号大儒而下流禳厌类巫覡不自羞至推灾异险受祸乃吞声而絶口刘向烧金幸宠罪延其父郑康成八十不葬其亲孔光张禹曲说卑意亡国以存家戴圣见纠不法范升废於出妻马融骄奢王弼躁急贾逵附图?以希贵显祝钦明诬周官以媚祔后刘歆助新蔡邕怀卓譙周致主於輿衬陆质效鹰犬於叔文是皆内不令於身外不祥於世清议之所投窜而学者之人所为共羞而数君则为之夫岂经之所能救哉盖学之於人所以辅益其器资器资或陋虽力於学亦安能保其措置不涉於小人譬诸染然同是朱蓝而入是则各有分缁之入不异黻之入而黻自然贱缁自然贵贵贱岂色之预哉而论治者或称行修出乎经明吾詎敢信且数君之学皆世用其书不可阙者而行已若此彼其学数君而

不就者其有过而可羞谁能计之谓明经人为必无罪焉吾终大笑此论耳夫明天下之善曰德而德之所成有吉凶当天下之务曰才而才之所设有邪正维吉以正故贤人君子业履所以全维凶以邪故数君所以不免於过恶岂数君之愿哉主於中者无以胜於外之所行则经亦何能予夺於其间但圣人之於教不欲引己望人又不欲骇以所不及是故存经以为辅性之本使之上智益明下愚或畏虽然终不必以经为母而行为子为其吉凶邪正之所自成设有不齐故也盖古之人有经行兼长者矣然而非实相因也负可贵之器质而成德於吉设才於正焉则如薪火之遇膏有加壮而益扬而非俟膏然後为火也语而用此则圣人之意与士之所兼非实相因盖亦可亮矣嗟乎吾安得若人而见之

以孝事君则忠论

道之在人莫不资之以得其德成其行然而得之未必能不汨成之未必能由序是故天下之名有生於不足而实之所受有非因於有余而性命自兹烂漫矣盖生而知之无待於外之学所以着爱亲之心也推吾致爱之道以自尽其力则得名於孝固裕然矣是之谓不汨义无施而不宜则行无入而不出移吾致养之勤以效於职业之官则得名於忠其必然矣是之谓由序经曰以孝事君则忠以敬事长则顺岂非谓其不汨而由序者欤盖天下之治待政而後治而政之所举待人而後明则出身以仕於当时何可以不蘄其能竭心思此忠所以见贵於人臣之节也夫唯能竭其心思则力之所致不择事而安之唯其称而已矣夫既出而安之不择其事则其未出也必亦不择地而安矣夫非明其固有而推之不夺於物修之不失於怠则安能移不欺之志於黽勉之次乎传所谓求忠臣於孝子之门者以其得於天者能定则立於人者易以成序故也先王之盛时作德有教而天下之人材小以成其小大以成其大於家无或不利於官无或不忠则士之履籍名不足以标之盖人爱其亲各敏其事则孝忠谁与爲异及夫王迹下熄礼义之泽稍涸而後名生於不足矣虽然从事而不敢告劳念靡盬而忧父母至於陟岵岵以思望叹稻粱之不艺则人之内性非其外之必能灭可知矣事亲之至不异於许国而公义不以废私恩然也惟其有内之实不胜其汨者之多则诚衰且漓官瘵职旷其上自不能信操药以进慈父其色焦然而圣人以爲羞而陈蕃江革之徒方以独高取名於世其远于先王之盛又可知矣夫资道以成其德性命序於日可见之行此理之不易而事之易爲者也而何曾王祥孝足於父母而忠不足於旧君则利之丧真亦可戒矣

序

韦苏州集序

初余未读韩退之杜子美集时适读薛许昌郑守愚诗而尝读韩杜者以余爲笑谓其读之卑也方是时余遭笑馘且自恨不识夫读之入於高者奚独人能而我顽莫入者何故其後余年二十三始能读昌黎文又明年亦读少陵诗矣而间以论於人则莫余明也时又自悲以爲余真用愚见外於人哉则又疾焉以求异时更读孟东野王摩诘张文昌李太白等诗乃至泛读沈宋以来至于晚唐诗人集本焉人虽渐不笑吾卑然往往怪之以爲是无益於进取者何必困眼最後读松陵唱和编则复见笑於人余於是而洒然损愚之悲亦不复论知昔之笑者未

必识其卑而今之笑者未必在於高其怪者亦不足问也夫入宫者自坂而门自门而屏自屏而庭而庑而阶然後堂奥可至今不容薛郑又笑皮陆而特喧然称韩杜之高此何以异於不涉门庭而已至堂奥者耶谅非鬼物恐不能至也未之至而亟以爲言岂能得其所以言乎哉甚矣人之不足尤也所见之不明而务因称传之显晦以定论学之高卑其亦不思而已矣安能笑人熙宁三年予归自建康始读韦苏州集於舟中爱而叹焉嗟乎苏州已能使余得怪於人矣庸詎知苟无欲笑者耶然予既履闻而誠恨矣书予所遭於裴方以自怜云

送叶著作序

熙宁二年夏某归自淮南将至故园隣境之鄙人有迎某者言若将爲贺而不果言时怪而问焉徒曰依欲有贺於子然患辞之不胜也子亦行当具见之矣入邑则所见居者安行者肃有知者谈无识者谣皆曰天畀特厚於吾人今得贤大夫矣问其所以贤皆叩额曰无倾河之辩与通幽之智亦何以壮我大夫之美维子亦徐而察之得矣奚言之俟於是某往拜大夫焉初瞻公门萧乎无故时之纷纷而有未尝见之肃肃已见大夫则渊兮泰然终日不睹其怪慍之容而持评文学引谕开击如不足者私独怪大夫之临冗剧而不失雍容则以爲其缓於听断也又窃视庭庑则将事者不諠被罪者色泰縲有尘械有菌鞭挺稀鸣而勃诘已平吏胥不劳而契牒已理出而观於乡则涂相谢而室相庆者又多多也则又问焉曰尔之谢且庆也昔者莫之爲而今则爲之其何以乎皆曰吾负大夫大夫以仁恕礼义治我而我曹不令尚或争焉今吾慚是以谢之其庆者亦曰信吾父祖之言如大夫之贤非特未之见实亦罕闻今吾得身见之奈何不庆於是某亦叹嗟累旬不能休是以读循良吏传十余年而不意亲遇於今日又不知其所以致此何修而吾人又何幸得此也是年之冬复以事走京师比明年之秋乃归至则又拜大夫焉凡前年之肃者安者谣而叩额者不諠而色泰者平者理者与夫涂相谢而室相庆者皆仍昔也独观谈者有蹙容时又勤而问焉乃曰天虽畀吾人甚厚而特不以久今吾大夫被勅书当移官於蜀去有日矣吾悲焉顾末如之何是以起忧某曰何爲其然盖亦理遣而已矣天之生贤也理不专爲尔一方闽吴燕蜀中土之人其谁不愿得如父母者爲之长然愿而得者几何今大夫之贤而既知爲难有且以爲虽吾父祖皆未之见而既得之夫岂不幸固欲戾天理以专所愿乎大夫之贤其美利在而身其无穷之传惠而子孙孰使而子孙所逢皆得贤如今大夫者耶今之大夫既在而所得盖已无憾即无有焉则是而身之幸已上越父祖而下过子孙矣独何爲窘窘於所未如之何於是忧者稍平因曰子之言然其爲我叙而次之以慰我难忘之思亦书以告大夫使知吾人之乐爱焉可也某曰慰汝而次之言是已若以告者毋乃非大夫之意乎皆曰是何伤乎仲尼之不见敬於乡隣也千百世之後人莫不讥鲁人之不令神龙丹凤之爲祥庆苟有口者莫不颂而美之未闻龙耻而凤患也今吾人乐爱大夫而得怒焉是诵甘棠之诗者可褫而读循良传者皆可挹矣大夫必不然吾子其文之某曰然则吾文不足奈何皆曰不足则爲之何害於有意以不足而遂不爲是吾子与隣境鄙人无以异矣某不敢复辞即具书之并赞大夫之阜徒云

傅岩字梦弼序

学圣贤者学其内而已矣若夫轩裳禄位何足慕之有其内而外者至焉审之义而宜观之时

而合君子於是受之有其内而外者不至君子盖不恤也顏淵欲爲舜豈主於百官牛羊公明仪欲爲文王豈主於三分天下有其二孟子学孔子豈主於鲁司寇揚子比孟子豈主於齊卿然則君子之慕古圣贤名实可知矣吾乡学者傅岩其友字之爲梦弼盖勉以辅佐之器业云尔豈可以空疎无有者爲哉勉之远大其内也字之固当而或人讥其虚喝以爲傅吕之事非布衣书生取次所能享呜呼此论外而遺其内幕其德而折巾角之流也何足倾听岩与余待试於浚都亦同馆舍尝以其字之疑道焉余爲之说如此岩因请爲之序是岁熙宁三年

送傅亨父序

自史馆公在中书蒐能而餌善天下之士尺寸之长细大各伸方患无有不患莫知方患未知不患莫用譬如贵豪张宴其筵十里有豆如山有尊如泽有座如阵味无品而不荐乐无工而不陈当是时宾之上者以贤其未必贤者以亲其次以附以幸以役大之有笑歌献酬以备福祿小之有筐篚币帛以给沾丐不在是者身以爲歉人亦以爲宜弃焉呜呼熙宁之盛盖如此遇豈易哉而比岁之冬南城傅亨父始摩髯欠伸有必出之意自言坐书边四十年穷铅竭丹吟口渴而捉指疼八十吾亲而三十吾子尚无所遇正独困於雕虫之有司耳若今科衆路多人各以所负致其闻达我则不能强行非圣人之训学者之事朋旧闻而壮且是之吕南公曰速乎夫子之运踵也吾闻士之学道不贵乎以己忘物亦不使物忘己己忘物则不仁物忘己则非有德夫见忘於物者世之谓无能之人而夫子宁固处之虽彼忘物者尚未果贤或者本无能而借高以自幸尔从者审非不仁又实有德而直乐於退藏吾又有说必令志局异此则人俟时乎时俟人耶自古杰人俊士所以功名成遂盖棺无余恨者亦各会时而已矣以夫子之所有解括而露怀上可以闻于相君旁可以请援於故知之人得无遇欤夫遇有小大我所不能知所可知者豆尊既展声味既给不在乎宾之上亦宜在於其次不在於献酬亦必在於沾丐爲夫子计惟亟进勿缓毋使身出乎投辖反关之後而衔歉弃之悲耳於是闻而壮之者皆曰信然盍相与赋诗以赞其行某既爲之赋又序之以俟其所遇时则四年十一月之丙申

思亭诗序

余欲序思亭诗执笔而叹已叹而嘉盖孝思之爲德其取名甚美而致实甚不难然世之人率难于不难以自弃于马牛既自弃矣又回首于美名铭乎其心其最无耻者则斐僞熏驰盗取经传爱敬其亲之辞开屋而榜之幸自标饰夫若人者只欲胜马牛于毫发之差其安可得盖马牛去离衣冠又未尝盗经传之辞以自欺且用欺人则虽不足于孝思不犹可恕哉呜呼余饱於怨久若于所嘉则未之频频今而值於江君是故先之以叹顷尝闻之江君丧父不但依于礼而又深长其情于祭葬凡以自尽而哀摧念慕日月愈久而愈忧未至也因葬已而爲屋于隧前与其仲季宵昼于其间以致其思感涕之余讲读先生之遗文曰吾亲昔以是飭我者也不敢忘治其田桑以足衣食之奉曰吾亲昔以是爲之家者也不敢隳命其子孙诱之戒之母不令曰善庆有先莫之思而绍者爲取诛盖如是者至于除丧矣而屋未尝命名焚衰之明年邂逅余而及之适言亲之于子也爱无穷则子之思亲亦岂有穷爲之祥禪之期节者礼之名文云尔感德思报而罔极者人子之情乌可已哉吾于学行思率吾亲之训以成吾身於四时舂蠶想绎吾亲之声容以永吾怀于展墓而旁徨则思夫亲之所以位此而昔同仲季之所

以留此者何缘乎归而述吾所思以镌勉于所临也故初题隧前之屋爲之思亭盖所以深长爱敬之情若夫美名吾安取也余谓江君其勿固于谦天下岂有决于致实而疑于受名君之所致无所避於嘉矣亟归大其榜足以识君之意并録余之所叹于壁以惩艾夫马牛之徒若尝爲诗者过焉爲谢之曰毋苟以章句媚人而不审诸己可也江君字子仪与其弟子发皆以进士荐于乡而子发先及第解汀州司法执丧于亭熙宁六年正月序

豫亭诗序

颍川陈君益既一新其居宅有亭在堂之左而以豫题其楹他日爲余说其名豫之意曰豫也者人情以之爲悦而莫不同喜者也然知喜而不明所以爲悦豫之道则亦有时而不得其所喜焉而或者因以豫爲不可常其亦过矣盖夫万物之兆象也时各有所用有所用者所以辅资于人情乃今不此之察则以我而赴物其爲流连荒亡孰御哉故吾之所以居豫者不以物用先我者也吾如主物如辅如是可矣吾罍有禽吾尊有酒吾丝竹有音吾架有书吾壁有琴吾局有碁吾园有花木吾池有鱼可系可醉可听可读可弹可奕可翫可钓无非乐事顾吾不以在意则彼未有能起我者吾固不以物象而先我也是所命亭爲豫之意又曰人之不得所以居豫之道也因其莫思而已使尝思之庸有不察吾亭之内有斋吾于是而燕休且以嘿题之盖嘿者吾之所以思也如之何余听君益之言而不能易也亦曰嗟乎允矣歌吟斐亶之士新与留辞咏于壁间余爲叙次其题楹之说如上

陈君益宅观假山序

上豫亭北顾其墙庑之间小山丛然面南如画幃者即而观之工之臻绘所就也而幽致乃不少凡其爲山枝者爲峯顿者爲阜洒者爲岩崖扞者爲岗岭攤之成阪衍之成隰窞之成洞陷之成谷有鸟道有夷路有裊繚之径有迢迢之坡而交聲蟠勃变状总总又引自墙後穴而酺之流乎絶壁之前垂爲瀑注爲潭平爲谿析爲渠遏爲陂如是者又多态其间列茂林突枯植渚沙矾石层杂附见乃至人物诸类皆在焉其正中峯特险而长其顶冢之陰乱石骈罗若可坐憩处有两书生趋之视其缘陟危然乎哉而犹未至也其路由东洞出者稍近寬原有二游僧出焉轩轩有得色北下而西一径更深有道士跨驴背之而南一樵翁沾沾望驴後以行其东洲桥堰之交则又有三牧儿伴二牛息焉夫工之所就亦劳矣余既徘徊观之已乃兴感于中夫山林藪泽之深懿爲天所覆皆有之然人常徒爱之以言而身不肯安之此文雅之士每借耕渔清旷爲说而要知其所愿不在焉者皆是矣况下此者乎哉今道士僧俱背而去之而书生则方抵巇未止岂非道士僧朴直不知矫饰其情迹而书生善诈乃区区蕲出峻絶之上以成其好高之妄欤道士僧皆背去山林而僧徒步道士乘岂僧贫于道士而然欤世言僧之徒工以罪福胁诱人得皆常厚而道士之说不及此故不爲流俗所恤今见于此乃不然其亦有偶然者欤今又岂臻家病世故之非平而作此以讥之欤言之座客皆大笑君益曰是皆不足议不若平之以酒于是取酒而散焉座客前循州司户吴充道新青州察推陈才甫陈留蔡彦臣南阳邓信臣才甫之弟纯陇西李孝孺并余合八人是时熙宁癸丑之仲秋

送傅济道赴漳浦序

傳濟道爲漳浦尉初之官過其友呂某焉某念別方遠不當無言以贈也摻其袂而告之辭曰嘗論士之所以賢在全乎其美不全其美非所以賢也全美之事有二曰能文曰飲酒蓋博學而力行者士之正功而無得於文酒則齷齪不奇短缺而卑譬如爲車高箱暢軸輶軫轂輻莫不材集四騮六轡囊而總之其於厚載致遠何陸之不可行然一不置轆則雖有善御無以運動一不載脂則雖運不流故文之於士猶轆而酒猶脂使遂無之何害其爲致用之名顧聚而莫運運而莫流終亦不奇而已大丈夫智識出沒六合而下筆如鳥跂鸞才干振攝萬務而對盃盞愁眉則齷齪而卑夫酒之於人豈但足以銷憂蓋所以平和其心而壯直其氣心平則德厚氣直則行正是寧小補而世俗之人因屈原一語獨醒便謂實爾此何嘗知原之意吳時韋昭以好學顯惟不能飲酒故朝宴則竊以水漿代之終用此失吳主意以至滅身夫齷齪固可憐而況滅身乎士不願賢則已如或愿之必致思於此矣且文酒人在襁褓時豈其能之蓋亦長而得於習耳視今濟道之全美唯酒宜進之耳頃吾初識濟道時云我值糟亦神昏吾嘗爲之嘆恨以爲雖有文辭異於學究而不識醉鄉終亦不全而已及前年同舍於汴陽則濟道已能竭三盞既別一年重見則又進至六七矣蓋造物者之於人業賦以賢則詎容不備唯其所習有至不至則各止其止矣夫世豈有不可能之事哉濟道行矣吾聞漳浦瘴疔之邑唯酒爲能御其毒於濟道之習尤利也異時歸來名兼飲戶則吾當大喜賀拜矣濟道勉之俗人護短必稱禹惡旨酒而好善言又曰市道衆人率能劇飲何足領略此言亦誤發何則禹之所以聖者豈在於惡酒而已使其無德與功則其異於市道衆人何也彼今稱禹之人未必能好善言又無功德而特倣其惡酒其謬何翅千里此言愿濟道勿听熙寧五年三月甲午序

測幽記序

灌園先生曰無物不有然後爲天地無事不有然後爲世道通乎此而盡之則所謂非常之故不慮之變皆适然耳孰復諄諄然問觸觸然驚哉夫有無之相因其順矣雖或戾逆猶未始违乎理是故天地之所以生陰陽之所以行日月之所以明鬼神之所以靈山川之所以凝人物之所以成皆在乎不得不然之故而未足以言其妙彼或謂之難知者未之思而已矣蓋理之所出數之所必前既有是後則未睹者特未睹耳今而有是昔或無傳者特偶無耳精也氣也非委何因命也性也非復何真形也品也非廣何伸廣之又廣未離乎息復之又復未離乎極委之以無所委而不失其則此非理之大致欤數因乎此者也明以是入幽以是立出无不藏入无不陽以化合機或戢或張其亦何常何異之有悲夫世之人特以耳目廢其心而已矣古之得道者之于物也智有所原有所不原言有所宣有所不宣書有所載有所不載其所以不爲者非真不可也以爲姑不必尔三才五行歛協推摩未有一日相無之道則事物之變故舉足而值掀睫而际何必過而問爲哉而有問焉是則寡見淺聞足以窒其靈府而開其愚徑也余少之時讀書不出六經听覽不離閭井以爲天下之理具諸此矣窘窘乎追逐衆儒之步武而稱誦不語怪神之说以拒乎諛詭之术如是者固久天誘吾使有超脫之幸是以泛觀春秋以來諸子百家之文章太史公至于國朝之史錄乃至山經地志野載私紀无所弃擲故識其所爲非常者多矣助之以凍餒漂浮屢游乎數千里之他邦而親見審問合于前識又多矣于是深思極索遂見理數之始終知古人之于此言不言各有意也時又浩嘆乎夏虫井蛙不幸而不知冰海也讀阮瞻之事見其弊于慚懼而重悲之熙寧乙卯年始記于書所記隨所憶故不复品列率二十四事爲一篇第而積之沒吾齒而後止命之曰測幽言讀而能思者幽可測

也自古记异之笔不少余虽不敢有记然无害于理数之所存而遂记焉趣异于虫蛙而已矣
若夫守经束教余虽不尔其忧无人乎哉

卷八

钦定四库全书

灌园集卷八 宋 吕南公 撰序

甘圃诗序

民不可一日无食食不可一日无蔬然则天下之圃为人之业何可胜计惟其业之者未必儒则君子之为圃所以异乎衆哉甘圃诗者先生巨公相与称叹傅君翼之志养之诗也傅氏世儒家邑里之所畏忌翼之少以举子取清俊名虽未即達而不敢怠曰吾力此庶几有禄以奉吾亲既而久矣意犹不遂乃慨焉而嗟闷焉而思择其力之所能堪足以纾睫端之急者以谓唯圃为可乃曳俛勤之正其畦相其宜谨其时播之殖之培之利之稍与思颺之书合于是内之庖饔外之贸易皆得其给而滋不怠焉荷耜操耰且行且吟日于其间有过而问焉者曰子儒者也为尔卑陋能哉今世书生何必俱以礼义取资诡激其声容以游乎梁烝屠贩之中致利甚润舍是不为而使埃 绕须眉吾盖苦之翼之笑不暇对他日此声屡至乃对曰士各有愿圃虽卑吾所愿也得吾愿斯足矣以吾之愿易彼彼固愁吾能泰定也欤哉有以是告于李先生泰伯者变色而发其详乃叹曰贤者之志也为诗以称之继其声者凡若干人泰伯死甘圃诗缺无作熙宁六年翼之以累举得出於是翰林学士曾公子宣与其弟馆阁校勘子开皆劳之且及泰伯之叹时又各赠一章翼之拜受南归明年谓余曰宜为我序我珍藏之以为吾家德庆余不获辞嗟乎士诚欲贤何远之有昔者子路孔门高弟而以养葬为伤微孔子之言则菽水几不自安传曰知其无可奈何而安之若命唯有德者能之当翼之为圃时所谓无可奈何者也唯其能安故至于甘甘者好之上而乐之下也非有德者詎能名此藏之世世篋衍丽句高辞轴而籤之与史争久得於畦町耰耨而已夫贤何远之有若余文之鄙何足以重翼之乎

杨公留题道卿上人栖真塔亭诗序

道卿上人生于福州年十二随其舅至建昌即舍家事太平元新和尚年十七落髮为比丘气韵萧萧若有愿而未修和尚发之曰汝欲得道离法已乎汝恶乎求之曰然请无求于书而持于心乃东行入松谿精舍视物如人视人如身不饰此以映彼不八中而十外波靡驰骋之务一不涉于其胸居三十有二年松谿之主死其徒谋所以嗣事者曰非道卿上人其谁堪于是逼之上人避不肯听其徒强之上人俯而思曰怨物之来拒事之交岂足以为道于是听焉其为主领如其莫为而衆赖以安久而如初至于八十筋骨不劳神爽益清则叹寄而念无焉其徒请之上人曰而何怪我且孰有梦而不觉者哉乃相地于堂之西偏先为之屋而俟竊焉曰以此顺化他日其徒相语以吾上人之经措若是可以勿命之乎德琳禅师之葬实占堂东故今议名于上人之兆所以别于禅师皆曰称以栖真可哉自是称之上人曰栖乎哉且孰知其不又兴真乎哉且孰知其终免于伪乎哉虽然免之不免又之不免又举非我怀我亦顺陰阳而已矣如指听臂而已矣是时光禄卿清江杨公闻而遗之以诗而一时才士多从而遗之松谿

之人詫曰公贤贵人而赐文于此上人宁草草者是宜勒之金石以示无穷衆皆曰可即以上人之命来曰辞有以助杨公而致吾不没者是在夫子惟遂有畀也某辞而不获乃序而畀之是时熙宁七年四月初吉

相山新图序

道散德不明然後学分九流辨方揆日相冈观泉卜食之言立故墓宅之师专门其书之多与儒同而祖习之人或悟或迷亦与学於儒者同此历古以来图牒论撰之所以相望而出也古图山形八其後演而广之为三百六十今又广之为千二百且每图俱为之说者吴山人智伯之所撰也书既成分三篇篇分上下卷凡六命曰相山新图始求余序以冠其端余闻之也道出而为理理出而为数数出而为形色故有形有色皆可按而察知其祥咎始终之变天地山川同得于数者也是以无所逃于推步畴人之文虽然文不患不具而患乎意之不能通意不患不通而患乎识之不能忘苟至於忘矣则自一照千因母知子何书之足多何学之足名苟异乎此亦迷焉而已矣新图之广多矣而智伯以为崖略耳盖形之所变名有所不胜尽而言之所至意有所不胜尽夫惟学者之才识有明暗之参差则鱼兔筌蹄其敢守越而待秦哉呜呼迷以书悟以书余岂独为新图而太息也智伯建昌之南城人李泰伯尝称其能明所学者也求余序时熙宁九年之仲冬

十八路地势图序

罢侯置守以为天下积千四五百年易十有余姓中间华夏且混且裂为三为二为十六为九其变故多矣郡县之城治大概略相循沿而其乘便随时析并迁因废复侨创不胜名号之纷错也学者操禹贡春秋谱读之纸编屡败然于後世之所变有不及悉也职方之史邸计之吏据图按牒各熟其一时然于前世之本初有不能详也盖知古而不知今其为儒也腐知今而不知古其为儒也浅君子之于天下也何浅何腐与其腐也宁浅逃浅必资于腐逃腐必资于浅是为两得之术余求世儒所出禹贡图观之家各不同则知其不能裁以後世之所变然也愿一作是书欲见职方图经而不可得熙宁末年得所谓十八路图略者考之参以天禧九域书则四封际接往往差舛盖画手之屡失也以书正图而约以绘焉用防乎腐若夫有浅之患则吾不患久矣夫欲聚米者按之思过半矣

陈殿院集序

余为童儿时见文章有建安陈师道所制而患未甚晓少长则知爱之而恨不得其全书未几已闻士论惜其早世于御史矣後师道之终二十年子师韩为南城丞余始从之求书得三十余通皆杂萃存藁者为之次比删正舛错除举场应拟外着四百五十六篇勒成十五卷以还曰呜呼君子哉其质美而秀其志大而正其气直而充故思虑之所绕辞语之所達无非圣贤经治根本而远离羣小眇迳未尝彷彿涉似也夫惟内之所得与外之所益流通傳会不溺不蔽者其知之矣彼区区于雕绘以戾其心者何足以知之师道之为布衣有所存发间见于文至後入官悉能履蹈不忘平生之言借其壽愈高位愈大则其建立可胜天下之福哉师道深

于春秋盖与泰山孙复齐能而师道仕望转高故不倚经以名春秋索隐论五卷御史奏疏二卷皆别传不列此集目师道之葬其友福唐陈述古既序铭之余故不书其行业而独推见其志气之所到于此夫学而不足以知师道则亦安能读是十五卷而许余于序哉元丰六年冬至日袞斧前窗书

赠武陵翁诗序

武陵楚仙乡龚姓望焉翁耆艾之总名也余论斯人野逸平和而喜事欲其别于流俗之序字故缘望以称之昔余幼时闻翁以治折伤有名云嘉佑中县尉罗彦辅迎转运使于抚界桥折马惊堕彦辅肱髀骨破肉裂塌然不能运动翁为治之旬日而愈其效类尔圜南城境乃至隣数百里折伤者必责愈於翁无不得其欲者翁家道傍无田桑封殖独种庭竹千竿资医养十口泰定不乏行旅过门踵相交翁遇之皆有理致无不得其欢心者其接儒生最谨乡之人莫及也余闻如此及余羈游去故园则过之与语信焉视其屋壁既有题诗赠之者矣自是出归每过之而壁诗岁加多且满熙宁八年余与友兄黄显翁还自郡翁酌酒其前楹以醉相邀逡巡自道老夫无事於文墨而才子误遗以好辞吾不知其益乎否也吾里人未尝赏此皆以为不若蔬根稻粳之宜拾也吾不拟同之孰能为我说以解谢之乎黄兄举醖以属余余盖许之而未暇于今七年矣黄兄不幸墓木已拱把而翁朱颜白髮康强如旧其求余说也滋勤呜呼岂其诚知文之工拙不系穷達矣乎夫古之所谓乡之善士亦何流品之限题之以内外之分焉耳以今考之仓廩愈实而礼节愈废衣食愈足而荣辱愈昧岂不识字者然哉若翁之所成不拒不要不厌所处之境而希云霄有所不至而不失其至未始为高而有在於高谓之善事谓之喜事之豪其可矣乎必有知余言者矣

王梦锡集序

维天生材维世长之长失其道则虽有俊茂伟明之质有不能自保其成者矣吾於周道既亡而见之夫所知所行壹迪先王之学而不诱于俗习者豪杰特起之士也而欲仕之心则天下之所同向非自信之笃自知之明则亦安能置已于悠悠寂寞之乡而处外铄之光荣如尘滓之去来哉秦汉以还所为抗论说於周孔下风以克有传於世者皆非有待于长养辅助而致之者也得之于心文之于言考之于前闻尽吾智力之能至而已君师朋友於吾乎何有是故晁董公孙贾谊刘向之徒虽或不纯乎圣人而後世诸儒腐烂区区终莫能望其程躅也诚使此诸人出于周孔之世其所成固可知又使之出于魏晋隋唐五季之间则又不论可知矣夫谓之木矣何莫任乎曲直根深本固而後干伟枝强彼匠石之有无谁之职欤知乎此者万万也信乎此者万或千之一也是古之人所以可贵而不多多也嗟乎其不多多盖有不幸存乎其间矣吾友王向字梦锡生数岁而喜书少长则治进士业茁然衆骇其进而莫敢议其所止也既冠犹未得志于举场梦锡益自刻励觉其所治未足以居先王之学则欲尽其智力以图之顾家日贫亲日老转转不救则曰及吾无营养之患而後吾智力足以致也庶几不负古人会熙宁天子将以经术作新士类而丞相长安公父子实始受命成之梦锡家远方独取所谓杂说字说者读而思之推见其指乃解诗孟子合四十万言书既成而雋新说亦出梦锡又取而读之顿脚大笑曰果与吾书槩合于是人皆以梦锡为必能由此得禄以养其亲而後卒其

素所欲致者也而再试益不得志则又竭焉去之太学其行也谕余焉余曰闻道而知之行之我也贫富穷达彼也太学之异于吾山则余所不知梦锡径去不顾至未几主讲者果悦而称之浸浸乎闻矣俄而病死初曾子固为洪州余往候之从容访余以後來俊秀余以梦锡为言其後子固归省松楸而梦锡献文子固语人曰建昌学士世不乏吾以望若人悲夫乃遽不幸梦锡归葬之明年其兄定拾余藁数百纸以父命授余曰愿得次比而表题之余为之剟去拟试之作而存着其可者诗书序辨论总百七篇厘为五卷所谓四十万言者悉不着也盖梦锡之智力所欲为与所能为非五卷之谓而不幸不得致尽以成焉其尤可悲也已夫繇後世之法以进则梦锡虽及仕吾安能知其穷达徒使其怀如许美才困于有余之四十万言而无得也存不足之五卷余独能使梦锡见知于世乎哉知之者知之盖将有焉叙以告其兄使藏之而待元丰七年中秋日

送邓德夫序

子弟之乐有贤父兄盖为愚无能者言之彼贤而有才则自立乌乎待其诱掖而养成顔冉孟扬不闻其父兄最贤而襟蘊所就卓卓如此顾虽不露勲业然使之遭时发达则其凌厉超轶谁能抑之惟夫不灵之人德性无以自张故其涉世动须依赖莫教则不之学莫导则不之行譬如南妇习乘无助之梯???挽繯则未知所据既能据而薪进莫善为之先後则无以骋而迅焉嗟乎以此议世之子弟贤有才者真见恩耳吾鄉邓德夫二十而能文三十而登第有兄甚贤而从仕尤早与德夫居聚者盖无几而德夫为布衣学行着於鄉既仕政理闻於上此岂亦养成诱掖於父兄欤忽忽之徒或未尝为德夫思此也德夫解令金谿用荐格当改京秩而先时诏举学官公卿以德夫名闻既索文章在可中势滨显矣而当是之时德夫之兄初为翰林舍人於朝光价籍甚人之不思想或以为德夫虽贤乃因其兄以显余闻而叹焉曰呜呼他人之兄贵且贤则已千万其幸若德夫者诚不幸尔以德夫之所就使兄而未贵则其发达亦孰抑其超轶耶即德夫而不若人虽有贵兄欲?其炎炎何足道耶呜呼德夫诚见恩尔德夫将如京师余戏为道此德夫笑曰人之於我也使果知我尚非吾意彼如莫之知也吾庸意之吾知修已而已矣於是某下拜曰是所以为德夫哉时又为之叙云

送沈忠夫序

吕某曰甚矣政之有以败俗而俗之有以败才古之时称齐鲁文学天性而就今观之则野陋椎獃类如醉者之睡惊此王介甫既尝论之姑置勿述然吾於齐鲁之外之士亦有叹焉盖先王之治以义行道而以礼行义此非天降地涌也明之心推之天下而已矣然则学而称稟先王岂应知礼义之犹难欤夫刑法律令皆按约礼义而为之章程者於学士之通知益为易事而自上之人以辞赋课天下应令诸生遂视法书如幼童之见大楯长刀虽欲亲之更患莫能嗟乎孰致尔哉人之才固各有所穷然而未有不周於所用也周於为辞赋而不周於知法律岂果人才之穷正亦荒凉於俗习耳他谓之何周秦以来二千有余岁以抵今法益不容一日舍舍之且无以为天下而入官之士不此晓识祸之在世宁有熄期虽高明敏达之士事无不通然大过人之人常少中下之人常多不宜以所少望所多则出政之君臣詎当不以是为忧日者朝廷之制选人三岁六试不在可者冷其资任以辱之夫斧座之意岂亦专以不明礼律

待一世之士人盖以荒凉於俗习之才云尔而或者伏读诏书必惊心而破胆谓得失之难虑嗟夫为士若此岂特不当吾君忧政之勤是又自甘於所败者也虽冷以终身亦何足恤且夫吾之心固有以深明礼义则推吾才以致用於当时法之情文岂必难知借如实未之学犹可按章程以求进其所至今奈何先守难知以待莫习乎甘於俗败者非也沈兄忠夫司户於吾军余得与之游其为人沉静端方庶几所谓明於礼义者其当代去而试法於有司也吾知其必不为冷任所辱於其行序吾所叹以送之

送王中舍序

王大夫饮酒百醖不乱及为南城絕不肯饮曰务繁而屡取醉此治之所以不办也其为政以察民隐为主曰不周知风俗情伪此治之所以不善也其追科必谨曰民喜儒缓而上官期会不容违违且抵罪谨之乃所以使其勿抵也其鞫狱念从轻曰教令无素而条章已严不将之以仁恕则无往而不伤其生也其嫉恶必严曰恶人在下则乱民在上则祸民也其佑善不厌曰知其可人而乍援乍置此身之所以不诚也大夫之代去也邑之士送以文或谓吕某曰汝亦知大夫者乎曰大夫也余何故而不知之为衆诵之曰是则余之所知者也

送张户曹序

进士足以怀常才亦足以显异才此言何谓也得非所治与所用戾欤经术也文辞也不兼优诗赋策论也不兼工况於知古今识理体者乎虽然今日解褐衣明日亲吏事则虽有兼优且工之名皆无所用而不足倚为其未始治今日之用故也是故笑者之腹常为儒生而痛惟其明敏之人理与心会事与情悟触而辩之抚而尽之不俟沉吟而万缕尽析虽平昔与人同而一旦与人异异以才识不在他也有见於是者今余得於张兄景倩景倩少时盖常应举京师屡试礼部优於趋时之文而已何曾与衆异习及其登第而从政则日胜旬胜日月胜旬年胜月作椽而府史不敢期摄邑而衆眈眈其去夫岂素熟此哉资明敏而非素其学故能致用而显其异才也余方论其才而并望则景倩者能之

送张君明序

儒之味莫善於强力莫恶於忍诟智者於不获已则资忍以济其强其善在乎有所就不能强力而唯诟之忍虽各有愿然无以取善於世矣余食於羈旅四年而後识清河张君明其人所谓儒之强力者也其读书如刘伶之向酒尊倒愈数而愈悦其为文如鄂公之运槩麾诃所压无有坚鋭其言曰儒也其真而博大者犹不足到况斐伪而细者乎吾欲得官则视时之所尚而醉之收之以暇豫可矣不忧人能而我不能也居无几何会有司以口耳之伎进退天下士而尽弃心晓之学当此之时余方敛臂愿罢而君明倡踊曰诵彼之说以点缀铺舒而已此童子之事我何畏之且吾闻口耳之伎以衒哄为工今其以是见邀我将趋其业聚以快吾手与声计当直出其上吾趋决矣余於是而益推君明之强而自甘以不及也嗟余不佞於嵇康之疎嬾未尝学之而自与之齐同异时开卷占对六经诸子命世之文犹然揽取其宗旨而遗其辞句今乃邀以一时之冗琐其安能有就乎余不及君明远矣或人闻而诟曰果哉其以惰蓄

穷者余曰然诟也乎吾受诟多矣故时漫出文章累累为不知者所诟今又用情取诟焉唯不及君明焉往而逃诟吾之於世味终恶而已矣虽然亦味也敢书以送君

送何主簿序

忠厚之德三五之君所以先乎民而称盛者也当是之时人体而行不薄不欺彼我皆然不用是相高譬如丰年继稔虽增京庾不自知富及世下漓则上之人挟诡伪以莅衆唯恐不济况其才不足以居上者哉自然者汨於使然虽有天真不丧者已如凶岁之一米矣有之者甚寡无之者甚衆有无之相形衆寡之相倾故博大真人着书而大笑回首至德之风继之以太息自是执史笔者始计一米而详焉大率百许年间见记者不过十数米而已其凶亦极矣夫使汉魏之君臣不作则丙吉第五伦顾雍之徒亦滞穗耳有何必记记何必详唯其不得不记且详此见者闻者所以欣欣称幸余求忠厚於世久矣而适见之昭武何庆孙余亦幸哉史之有国野也唯大達者寄之国不然皆野载之庆孙方以进士起家名誉甚隆其達之小大未可知故余虽幸犹逊以俟之使庆孙之位终不配其德则吾书能详之力不爱也

送刘进士序

今日进士诡薄贱卑最为可耻不俟有道者而後知之尝闻道者固能知之矣夫惟不自诚故诡不自厚故薄不自贵故贱不自高故卑虽云颓习因时然自失已甚古之君子何尝以不仕为义顾不至於亡耻以苟求焉耳论者乃以为公卿显人多以是始基故暂经胯下不害其驯致功名是又不然举世胯下而功名几何人中病而刺之凡亦苟於利達而已饿之人乞食则标以不获已此岂足以言义命然一伸手向人而不见酢又至於再三皆漠然也怅吁而去之旁观者曰是近於知耻夫乞食至辱矣就中犹有知耻之人今饿不饿例乞数数不见酢而不去殆欲以盗窃活其身果有耻乎无也余从熙宁以来深於冻馁之忧亦隐忍於白欄以随羣輩步武盖四往而三黜当其不在黜中也既自知为不足荣矣至於今者敛臂愿罢而自比怅吁之徒矣衆方与我以无能之名而我则以为受之可无嫌何者今之所谓无能者无亡耻苟求之能耳加余何嫌余之趣慕如此而刘君适以赠言取於余岂非误哉谢之愧其悔也而不肯止故为之一说盖乞食非难能之事也其情易知而可怜若盗则无可言者而其情非圣人不能知之今听鸡而入唯恐不先见星而出唯恐不後羣然商剽掠之可否邀记诵之分均上之人非必以真贤实才相处而人各妄意其爵禄此皆今进士之心迹而曾异於跣徒之所为否乎刘君且力为之此其实矣而不获已乃其名也实易为而名难免余安知刘君果有遇於酢与无有哉姑亦愿其能知可耻云尔古之人以其身为重於天下而今也为一切之温饱而跛跛於白欄之间岂不可怜刘君行矣万一遭有道者过而问焉则对以腹空腹鸣足矣

卷九

<集部,别集类,北宋建隆至靖康,灌园集>

钦定四库全书

灌园集卷九 宋 吕南公 撰记

麻姑山僊都观初建东岳府君殿记

熙宁三年某繇建业归明年夏五月访僊都视观东隅有屋正新问其有且新之自道士曰观故有岱宗府君像而几筵无次遂扫钟楼下以居前道正黄君太和为吾言吾山百灵正位而此神尚坐钟楼下非礼容咸秩之意我虑之以为恨则谋专起殿以迁之覆其橐中赀聚工取材既竭犹不给又持其说以率乡邑之豪使各出力助是维屋之所以有新余听而善之又明年正月太和以书来陈岱宗府君之有殿也经始前年之夏而毕役去年之秋凡材章覆填之直费盖五百千而丹青彩漆不与计殿之制以楹数之得十有六环殿而室者其楹又百六十有奇应为我记之以辞某曰然是固宜言岳神者祀典之所谓尊视三公而衆神之莫得班者也位在名山乃不以正谬将谁任善矣太和之能虑也盖天下之事所为乖序也常因乎小或加大而宜尊者反卑知其故者或力不得以正或虽力而不强是故理乱得以相形使夫任事而必此之知知而务正以力力又克强常如太和之於此殿则叔世何必有而太平何须颂声哉吾於是而感焉太和有道术冲厚君子也贤於其流衆莫不敬之故能讫恨济谋起今有於昔无遂正宜尊之位余虽爱文谊犹不可书来之三日丁酉记云

大仁院重建佛殿记

殿为屋名不见於古经以尔雅细碎犹不着而南华说剑乃着之盖六国诸侯初变题号以异者为高至於秦穷而其称遂着其究主以易乎内外朝之名刘汉始承惟视事之位则以题之乃世皆烂熟则宴私之地亦以题焉礼文之变其必弊如此象教立於中土帝公助其庄严故梵王以殿居而学老之徒攀玉京称秩其奉与梵王同孔子死二千岁乃蒙王爵而有庙於天下庙有殿此三人者生无百里之势以临衆民而死以能圣之德享齐大君周公复作必不发论凡为殿压以鸱吻环以钩盾其庭容其陞崇其位正以深其事重矣势非君主德非孔老释迦而辄居焉智虽不及周公论之可也夫天下之人知殿之名尊而不思所以居其尊是故轻於奉拥而不当公义自今而察苟有灵真之号於佛老下风而因其所奉之力足则皆居以殿而不疑此与夫宴私名殿何异至於房祠邑祀民壹以其正座为之殿呜呼作始有伦而令乎妇女古之人岂虚言哉是维世习之极弊而邹鲁搢绅以阳弗闻为宏者也而今则论焉岂勇於反之哉谨礼之变难俗之非缘事以寄乎情故论焉而不以罄凡今三圣人所享唯梵王为莫盛何者孔子之庙郡国或以为学则谓之盛然其中皆一殿而已佛老之居谓之盛者其殿则二三之而精密壮丽又不可赀其如是孰能肩若夫锺梵所建星分鳞布於井落山林其势虽不在於盛而各不失於足盖徒有院佛有殿斯足矣事有然理有原此又余之论而不以罄

者也江西之县四十六而南城居县之一南城之佛寺二百一十五而大仁居寺之一其地去县七十里而遥其於井落山林盖又居星鳞之一而长老言其起於唐太和中然则焚修旧矣光化三年行常禅师於此迁寂其真身塔在今院西偏乡民祷雨之地怀赴如响故其为佛事也滋足熙宁元年院僧有暹请於衆言吾舍毕治惟佛殿宜新而未新於是里豪余致收者率力户资之或敦匠或献材诸役具至是岁十月戊申新殿成诸像亦蜕尘力户来落之相与庆讌凡计其贐杂五百千而美论其资之优者指过有成黄守安徐守忠衆谓有暹必记於石以告而勤暹雅於余遂来恳乞盖非文无以行於远也使世道而每不变则此院之得名若暹之谋余过黄徐氏之力何必无继且以余之不佞而文之不苟也何直岁月云乎论虽不以罄世必有知余者矣有暹姓陈氏其为人静以庄其举非轻於奉拥其乞宜於莫之拒殿成後七年冬十一月记

华藏寺佛殿记【代郭主簿作】

由道而为言淡乎其无味则中士以下有不足以循之体道而立教则故常玩易之俗有时而不振辅教以制法则依违苟且之弊遂变而形见至於因天下之理迹而耀之以祸福之利害然後多欲之生民莫不悚动而从之帝公之贵富臣庶之贱卑惟听其所煽惑而已万一愆负容贷而佚乐容致则冥冥之报显显之责非所过而问焉也其悚动之心一至则割弃髮肤炮灼顶臂无所敢爱而况於身外之才力乎此释氏之庄严所以益新而每大也崇仁为邑领治八乡而郭中塔庙华严居其甲其佛殿之雄丽费财五十万乃能成而罄其氏具出之彼唯悚动之心一至焉耳某年月日始事某年月日落成凡其所以为之雄丽者莫不竭尽其方术呜呼亦已勤矣夫为妇人女子不得出於盛古之际而同流俗於教法烂漫之後求所以善吾身於存没初终既无所取循矣方又覈以惇惇之嫠而其贐利蓄藏倾於一殿而无所靳也其心岂不可矜矣哉余为之书盖所以矜之元丰元年六月日记

北池记

北荣尽间对而周之其制如庭其溜下注鍾而为之池春动以来泓浸襄阶怜其无物涵游访於?买四五鱼鱣养之其中异时奴献田之螺又选十数养焉日向久鱼产童子十余口萧萧相从浮头漪上或惊之暂没去少顷复出噉喁以为愜比其长矣虽屡搅之犹不现余於是感乎人之幼壮也既七八月天不雨而溜絶漪痕稍落羣鼠辄夜下漉之丽泥而鱼善奔潜鼠不能有所执唯螺钝滞又无逃乡鼠食其肉无子遗当是时鱣遁最深虽工於漉者犹不克覘其尾余悲螺之为物有殼自周而以不敏於运故见戕於鼠又怜鱼虽奔潜而终不如鱣遁之深也忧其水大涸则并不免鼠祸呼僮掬而徙之他池因书感为北池记

韡韡斋记

钱塘盛裘明从其兄殿中丞签判於建昌日与三弟讲学於官舍一日署其斋为韡韡临川吴文仲者仰而读之悚焉诵司马牛之言曰人皆有兄弟我独亡诵已其容有蹙裘明使来语曰非子无以说吾署斋之意余故为之说盖名之不可以不应其实久矣草木之生皆有不孤之

英葩而诗咏萼跗独引棠棣者彼固有以昌其美於实也以天伦之璀璨夫岂苟以衆多为贵顾必俱昌於德然後乃为可贵间尝思之问学所以进德也袭明年二十汲汲然甚於趋利者其弟袭美力与之相亚探拭研砢不到不置不尽不履何但外而已盖已邵其中何但达而已盖将大其功譬如纵宛驹逸夷路其势发发人惊其进而莫知其所止也是维盛氏之所以昌而韡韡之所以美若夫世官余禄朱蓝合逌尤非所以恃者自文肃之兴诸孙以不试仕者七八十身而袭明未尝道也按此亦足以尝其所慕矣视今天下庭闈之所庇其兄先弟後者家不为少然不短於才则阙於行不自祸其身则召累宗門此其与诗人所歌终鲜何异若犬羊鸡鹜其同气非不总总亦其无以离於物虽多何预比数且袭明之意岂能为不预比数者谋之请以吾言谢吴君袭明日然谨用以为记

得轩记

余已记韡韡斋袭明又以来言吾之於道也求之内而已内者固道之所集於我集斯备矣而犹将之以求盖不勉而中不思而得者圣人之事圣非吾所宜居则得与求因其安可废虽然至於忘然後得非所知也而况於求乎哉五常百行所以足乎已者也而性存焉非外取庸何求轩裳戟冕丰功大业所以利乎人者也而命存焉非内必庸何求然则吾之所以无待者其可知也古之人不以一室之明而忽天下之光也使吾径出於忘犹不果以求讳吾斋之阴截壁而檻焉同吾三季於其间论义游文以俟其求故题之曰得轩得者为未得者悬拟之也使其各得而之忘夫然後可庆吾韡韡未庆子姑为我书南公遂书之如前

老懒轩记

年中半於七十衰非暮疾非痼世不以为老求心循理畏衆人之所畏世不以为懒而我则以之自许焉唯其处顺而委蛇故也闻古之至人与世浮游於物不迁谓我马则马谓我牛则牛环乎其莫之择也故能免患而自得若夫睢盱矫揭甘誉而苦毁则亦焉往而不韡其所寄哉昔余饥寒力不足以活身则仿诸生为进士以幸於未殍及既为之则识字过多序言过奇思义过微超遥不戒遂违羣衆而登列庄韩柳之域盖已尝怀蛇足之疑矣方是时也论者固以为善於古文章而不善於今辞赋非所以适一时之用余闻之不已尝疑而致悔也又加数年更事历变忧伤熟烂齿壮而气郁矣虑烦而善忘矣天下乃始以记诵补拆相高倚文信安昌之墙效顰受唾以相轧也余虽欲从之而智力疎矣於是彷徨斂臂蘄为无用而已梦想田庐以规图饱煖耽玩文史以致其癖嗜而人亦次第不以飞腾相期也萧萧乎潜移而嘿运犹惧有未许我者也揣摩人情愿以老懒自盖有过而问焉则崖略以示之果转语以譁莫之信也或私於吾僮曰而公视昏而嚼废乎曰未也尚日书细字啖牛皮以食酒然则乖慵放肆莫无所省乎曰否工狙贩出九年披翻纸册吟写呶鸣未之止也然则奈何老懒之云乎益转语以譁余闻之而颌曰会当有明之者矣俄有人焉为衆释之曰彼其今之不善於记诵补拆也犹昔之不善於辞赋也有不善之实而名随之虽欲不居其安可得夫百果诸蔬毛血之类均以养人然过久不取则坚顽秃齧而不美实始见弃且庙堂宵旰罗网羣才亦主於养人云尔不适於一人之用则委而不取犹果蔬毛血之以老弃也谓之老宜矣虽然其有以也或出於莫之为也可以为而莫之为谓之懒宜矣余闻之而大快如世之获官荣利泽者也曰善乎许我

於无用矣蘸笔以题偃仰之轩谓之老懒所以顺而自盖也嗟乎德不及至人而时之委弃甚於马牛余之优幸大矣异夫时之不召而自往未信而求试者听鸡裹饭待晓棘篱之外变色而争进腋索鬻搜以即脾俎之後辍食忘饮流汗被踵顾晷影以促促然惊忧愁五内以觊觎也老懒者其知免矣夫必不以余为軋已且譁而论之矣记於轩壁以述优幸

虚斋记

万亿及秭之廩积不自知其容而储甌石者见之色动千门万户之宫室不自知其庇而老聃圭者闻之心醉君子行贤而去自贤之行故无远迹无小大虽甚憊庸犹知敬爱而推服天下所少者才也才有以应万事之变而所知有不至焉则天下所少不独才又常在乎智也智足以知才足以行而德未至乎忘则虽才智既异於衆人其究犹慚於逆旅是故古人之论诚贤必以俊而能厚为无以尚之盖长民者俊有余而不足於厚矜张脱略之俗繇此而渐成其敝岂一躬之薄而已临邛李侯之为南城抚事旬日而清俊明敏之声流於四境幽村僻落夫妇之愚连合之憺心游语恍然若令在侧莫敢欺莫敢违弥年之争直於须臾一介之善坐享安集其为政治底此则才智之具可知矣人盖知敬爱李侯而不知李侯之自忘其美也居无几何狱讼萧疎朱墨闲暇便坐之北始葺室以宴休而题其榜曰虚斋有请其意者李侯曰吾惟虚凉而领剧邑惧所未至故俛仰於此以致吾思若庄之生白咸之受人皆非吾敢也於是邑之人耸视偃听莫不推服李侯之厚真盛德之若不足者也夫自先王之泽亡儒者以彩饰相师其所论治己与治人熟其言焉耳亦何尝有人见哉李侯文史纵横伦辈莫敢望其屈於一邑为南城之幸会天其或者畀此邑之见见闻使一由於勿薄已乎读书以俟之异之时士若民克知矜张脱略之为可耻夫然见李侯之於此邑心化之矣元丰四年五月一日记

妙灵观兴造记

宋兴五十年天下富康上方虚怀瑞应展仪睢泰而黄老教术在所严崇祠馆之建彩饰相望有复有增如昭出冥如株斯荣彰明秀衍海内倾注徒患无志不患无地徒患非地不患无财官听民悦踊集就细大具作有见则立於是时也劳坊为观籍在而屋亡斋坛剥裂榛莽焉耳道士凌宗旦实经营之观泉陟冈图位像设盖卜筑三徙而後得今所据其昌渐矣备而未大也肇自祥符甲寅至於嘉佑己亥而宗旦下世又二十年元丰之戊午而其嗣孙黄世南始新而大之为寢室为法堂明年为三清北极二殿又为东厢又明年为西厢又明年为三门外门又明年为钟楼而屋之壮丽无一不备可谓大矣屋以楹计为二百五十钱以万计为九十三其役勤矣而唯三清殿费出於萧绩余皆世南以相墓宅取贄於人而致之初宗旦之师魏元吉者江南枢密岑之诸姝岑死元吉弃官奉道能词章居南丰之真元观章圣时被召入玉清昭应宫焚修久之以母老求归而时相许之盖尝有志於劳坊而力不足及归老矣宗旦为成之宗旦者?州兴国人有游艺善为人其得世南而教之尽其方曰是孙可倚以大吾教者也果如其责云呜呼有时如祥符有志如魏凌乃积岁如许而未及於成比及世南则閱五岁而始成焉夫亦数之存乎安得智者而与之言哉劳坊昔额也治平中改赐妙灵观旧无田以食故弗於祥符以前及改赐额而郡守吴绦将以寄房法废之世南讼於转运使得复存及新屋也贄有余则又买荒田为之地而居养之计足矣始过余述其勤曰愿记於石有告於後也使

之知继余以谓继非口舌之能致也俟其人可矣诗书所陈兴王之祖宗忧劳恳刻一言动不敢适已凡以有继为荣尔而果每荣乎其枯固已屡矣何况一观然则今日之记妙灵当如後世何无记可也若夫枯久而落落而亡不胜其残毁絶没然後有知荣之为美而作於中兴则今日之记妙灵庶几有想闻而感激者欤记之亦可也继乎继乎名籍之云乎继必若世南则吾为之言无愧矣五年壬戌秋九月记

茅将军庙记

将军之名不书於史氏而威灵福泽有以动人岂其知将军者不悟於可神之始而直悚於已神之後欤初熙宁庚戌年余过江宁借图经读之见溧阳县东有茅将军庙云将军俗或呼司徒其解引稽神录所载浙西僧德林说常至舒州遇男夫独薙草於荒郊者德林问欲何为男夫言家在桐城前自县趋州至此疾足不能进倒卧草间日暮四顾不及人烟唯闻豺虎嗥跼於时分谓必死俄有部从如大将过焉顾见吾卧为下马停徊又指麾留二卒曰善护此民清旦送之其家无恙语讫上马忽不见男夫病稍轻便强起问二卒汝主何人二卒曰是茅将军也将军常夜出猎虎哀汝或伤故使守汝问未既而东方日上二卒亦忽不见自是能步径归吾县今疾无恙矣吾德将军故从所见之地为庙以报之德林住舒十年比还浙西处处作茅将军庙稽神录出於南唐之末然则民知将军之为神正起於此耳建昌有庙在郡西城之外衢之曲旧无石记不知建立何时而民之钦畏归赖皆曰茅司徒我朝之福帅庙屋老矣而未治近庙居者太丘陈愈为神谋之神亦见梦於愈愈告衆曰将军庇吾人者盖其所以为神自其聪明正直爱人而已今庙向坏无以新而报之其过在谁乎吾儒者固将仕而以爱人为务事宜与神不异我不悦夫庇吾人者之无奉也为率邑之巨家共出貲而大新其庙起殿起庑起门及解牲之厨客神之位粉饰涂覆毕善庙成於熙宁五年孟冬某甲子凡庙之屋以间而计之盖十有九明年愈为余诵兴造之勤余忆江宁所读而示焉愈曰为我书并吾新庙之时岁我能勒之石以谢衆於是從之六年秋九月癸亥记

黄籙祈雨记

天下之方术有见者能为唯谨者能传克诚者能用自道而观世则消息盈虚若非力之所容致自世而观道则凡相靡相张相资相亡相终相始必有以寓乎常而适其变者此博達之家所以坐览羣学而捐情於弃絶也先王之盛时其奉天地顺阴阳於何弗至而於祈禳祷请有官有文委曲备具是惟为国之训後世教治政令有不明有不行积久而遗初游波而昧源为士者且不知领略岂论於蠢蠢之民哉方术之多满世其何怪且彼为之其有以矣爱人利物以本其志尊天敬神以行其言智不必能通天地而人皆準仿而揄扬之矣夫以闭南纵北紫丝抁土而救岁旱考之经尝着乎而用每得志则其传之莫御也固宜比及下流徙市禁屠歌呼奔走以至焚暴无所不至而固令不沮岂亦为其有以欤为譬则耕传譬则时用譬则力道譬则谷谷无不可养人者耕之方不必同而事同有耕有不耕而时同耕且时矣而心不专志不致则亦卤莽焉而已矣今世之论或鄙方术如弃絶之晚即或用之而不能诚是皆未足以言至理盖古之所谓克诚岂草草之云固有以尊其德性矣不然匹夫媼孺叩颡而嘖嘖亦可以蒙君子之感格矣熙宁天子在宥十载以海内登稔故易纪号为元丰而郡县溥率山川之

神所主异数风土之沴参差或见犹之十尺华坛非不温密而一毛不得理不无之三年时南城夏不雨弥三月县令为之尽室不茹葷夙宵出拜土龙舞巫如市而夜汉愈明彻当是时人以为雨果不可祷四年五年皆然六年时临邛李侯为令政事毕举是夏闰六月复旱閱两旬为七月朔旦李侯率其佐祷於仙都至则问道士亦有方术乎对曰教有黄籙道場是可以致而无信奉者故未尝用李侯恳然趋为之香烟始升晴昊忽微噎有顷四山云合雷作雨大至国野以达四境皆言沾足於是人知李侯之诚有以克而方术之足用雨非不可祷也李侯为余言识戒执作戒伪未克乎戒不足以言学苟为克之焉往而不善皆知道无所不在而方术之择皆知方术之可存而黄籙之忽其未之思乎为我记之以告能用者以慰能传者亦将有博達者雍容而评裁乎其知之乎余辞不获遂以记

普安院佛殿记

废兴有时乎吾不敢知而理存焉行为在人乎吾不敢知而义见焉知其可而进之能尽其力与心以不墮於悖夫然故事得而道顺顺斯行行斯立矣戛戛之诚自我茫茫之数自彼未之至而不忘於图前惟其分之循耳及其至也若非所以驯而致之者有矣谓丰年不可必而怠於耕非闻义者也谓不匮出於勤而预多其廩庾非信理者也未尝怠未尝预多而作绪其宜独安知所谓天同而神相者果虚言哉余少之时从闾里辈行往来鲤潭间入龙安院问高寨之名於父老能言者盖鲜或曰犁鋤之壠亩时时得绣鏃蚀兵则知其尝为战地矣其势隐坳显亢如卧虎如伏龟四陲所压皆以俯瞰如登楼而察市信夫其为必争之利也乔木苍烟萝蔓蔽亏钟磬不鸣或不知僧居之在其上於是时老屋数十楹僧三四人童子八九人晨夕旷适衣食仅给而事佛未尝有殿人不堪其嗟而僧未如之何也又数余年得唐书吴录读之按知僖昭之代所在盗据而黎汾危全諷之徒相持於此乡高寨之名盖起诸此时不见其为院之因其亦兵荒之後无可考欤治平时诏易寺名而龙安实为普安熙宁之季院之尊宿相继迁寂今仔扶师独主梵呗年少刻苦以戒律为己任民之佛事待师而足於是院有昌新之势矣元丰六年七月己巳院南居人姜君惟积初为之建殿凡土木丹青石甍所集费钱四十万其規制之雄工巧之妙皆絕常手殿之成香像亦从而具矣是岁十月辛酉又为之起僧堂起外门其财用不在四十万中普安为院壮丽垂全矣一溪之阳大路之冲平沙广野榛莽不隔巨刹凌空檐翼玲珑金辉碧彩灿衍於林端木杪不俟标榜而行子知其为如来之胜宅矣江君纯厚人也余尝从之问力田生财其语条达而不紊有见於体勤谷分者也其配黄氏能同其志於为佛事謹喜讚叹如恐不得为之其於普安尤懋焉夫武成之主不作而儒者言动足以导民长善者几希若今之俗弃擲仕学而袭蹈园庐其欲远离凶德舍事佛其奚所归乎江君是已传曰何有何亡黽勉求之深则方舟浅则泳游固其所也人有一钱之屨数节之杖曳而卓之必择地而置焉孰与多事之际物轻於钱不啻鸿毛之比大阜而夫妇倾心捐四五十万於佛僧不之彼而之此亦偶然欤其有在矣普安乎昔之血刃披猖孰知後日之香火焚修之道場乎昔之冥灭亡无孰知今日之轮奐渠渠谓之天欤则吾不敢知谓姜君之为善仔扶师之持教各能尽其心力以相遭於此时使普安为院勃焉兴且盛是岂特人谋之至殆亦理之会欤理即数数即天天即义义即理吾不敢知者以立乎人吾终及之者以进乎天以勉夫戛戛而或疑於茫茫者故书殿成之明年岁乙丑十二月甲申灌园吕某记

真如禪院十方住持新記

聚人徒駕師說其為奉養勸相固有法度立乎其間舉之存乎人謹之系乎官孔王之庠校佛老之寺觀所以芟廢興盛未有不繇此者蓋善衆以道明道以教振教以法法者事之成始成終小之不持大之安放維佛事滿天下而戒律之席為多禪定名門居其百二而已禪定之師缺則官謀之戒律之席則如不聞吾求其說矣非以戒律精苦不俟飭勉而禪定汎衆宜有所齊乎是為政者未之思爾夫精苦行之至難也人人能之則无所用乎師資矣然則相與易而勿治是縱蠹螭者假衣飾以醉飽膏腴匿形鐘梵以遂其私焉耳始制失之矣方來則不圖所以裁而革之其為不思孰若无政之愈民之鼓舞於佛視其所至刻食減衣自一而百至於千萬億足以供四海之僧而況於占莫限之美田誦書拜像自憊不慧至於仅有形氣莫不仰東漸之聲而況於值見性之達人維澤有水浚則為淵導則為川吹則為瀾而水未云自表也有天下者奉佛惟恐不足而百官有司不謹於為其徒擇師長考名實過亦甚矣余行人間覽觀大山長谷奇勝之地必在佛老所家其以禪命院有旧而師一非其人官適不之察則鐘梵余閑坐為盜寇屠博之林豈論夫草草勿問之聚乎哉真如院故曰地藏西距南城县六十里在应宝山之阴长岭之址天成三年闽僧惠通於此結庵能以精苦动人故归向者日加居老矣得文敢者继之盖自通初舍至於乾德甲子积三十七年而敢始建堂殿佛事以盛有田七百亩亩二获鍾一而贏其山林场圃池籩之利又从而具其為奉養裕矣惟戒律无德嗣故裕乃所以資其為????夫中下易流而勸相莫尸則亦何惡之不长何心之或回烂漫无稽果至於屋破田荒举債以度晨夕其敝可谓极矣元丰六年临邛李公在令位听采所及为之太息曰是亦吾民也呼其主者诘而诘之凡院之所有尝见侵者使之还尝致罔者使之止无稽之游党使之絕又告於上命以十方住持擇其师得今长老守讷而付之禅席曰其尔克举师唯唯後三年遣其門人介乘來請文以記其事初師寄廬阜与大知識惠顒游相好元丰五年建昌太守命顒以太平兴国而师与俱行故李公之择真如近得之余未识师也其請文則顒為之先夫虚心正意明不二以待羣迷倡宗風而全独有師其有以葆之是之謂舉使是院之興終亦芟而不廢系乎能得其人則必有令如李公察擇清平在法有嚴在教有明夫然故十方之名實无負是之謂謹若今執筆志叙則又余職也其何避之於是應其請而記焉是時元丰八年八月戊辰灌園呂某記

龍母墓記【在南丰县八十里】

熙寧間農夫游賦妻劉浴於溪遇黃犬迫之有娠產兩鮎魚以大缸貯之須臾雷電晦冥魚失所在後三日劉死葬於溪東硯阜之上數日雨溪大漲衆見兩魚循繞墓所疑以為龍也

卷十

钦定四库全书

灌园集卷十 宋 吕南公 撰书

上曾内翰书

内翰合下往在熙寧之初合下以令长进京官遭值圣君贤相留神至治而合下遂为参赞新美之腹心当是时某再以举子绌於有司去十五年间实见合下历省寺登禁近用直被谗出典雄藩逡巡拥节钺董百万貔虎士为天子镇抚南蛮扼制西羌功名资致秀茂显赫与古贤将相上下穷山越海能言之类莫不咏诵风烈想望声彩而某幸以褐衣事笔砚丹铅从诸生後薄晓辞章又有乡国粉榆可为寒晚依归之号乃独至今倏然未识合下顔面盖常耿叹以为士而志於道德惟无外慕焉耳若夫礼义之必行则穷達非所以间之闻诸前言三代之盛法度之行人才苟可以事上未有不闻於家邦其所为道隆德骏之君子位不止卿相其国而进乎天子之所则列国之臣皆得因治王会以走职而承训其虽各仕一国莫不有朝聘交相请觐之事盖不如是则义不足於己礼不足於人也孰有生长同乎四封之内学云同师行云同表而自壮抵老未相与者後世之道德不明是或一蔽故居而未及仕与仕而之他邦有邻不覲者维此之故穷则知有達者而達则於穷者或不之知乃势之常而情之不必怪者也昔合下之自桂而北也旗旌过故里道路为之荣耀巷儿间妇毕出倾仰而某不获伏谒导骑之前则以合下未尝还乡国其於不敏宜不知今且莫有为穷困之先者将以轻易得罪於行尘故不敢也及合下以哭亡来归而某又不得速往则以既未尝得见而遽以贱吊贵非礼之情又不敢也虽然某终愿一识合下顔面以慰岁久想咏之区区以稍异於邻不覲之徒以不尽废夫贱敬贵少敬长不肖敬贤之礼义而使合下亦幸肯降意而导焉以知乡国之寒晚有可与言乎否也是故来伏屏外窃以世俗之请见必先之以高妙无底之谭辞瀚漫沸腾若应鲁门之问然夫未见顔色而言孔子命之为瞽而曹爽所以甚轻王弼也某则不敏惟合下幸肯降意而终赐之见则某将有自此之继承焉

上曾吏部书

世所谓贤公卿大夫天下之人莫不愿见之意或不齐同则不佞之区区谨未敢以衆人自许尝观秦汉以来功名之士往往成於激昂或亦求而不得得而无立比之逆取顺守有妄有直其犹可议何则彼其内有欲行之志又有可为之才而外无乡闾书登之序以助其进则其矫首引吭岂不宜哉至如後世辟察有令科举有司而士犹争以躁竞熏驰是则为肉借皮苟求云尔曾何足以居激昂之後哉无可议矣乃若某之所意则以为富贵之享否听之天功名之有无视之时充吾所养而无所待於物不亦可乎然则所愿见者道德文章命世之士而已其於公卿大夫为不为非所问也昔者食於逆旅盖十五年尝再至京师而未尝得见所谓巨公贵人非无所见者也方天下之人皆得疑於借皮而已则非借谁能覆按哉不如勿往以使气焰之閤人无我恶也夫读书而尚友古之人於悄悄之牖间孰肯同于尘俗致见恶之纷纷乎

惟合下兄弟言成文而世莫能加动成德而人莫能择价满乎四海可谓命世之豪杰而先墓高粉宛在此都攀援睽附可以及识而尚以隔远未及也又况其他往岁舍人屈於洪州实获一见其後自福还朝又见焉而翰林与合下至今未识也夫南丰为邑着於地志千载而未有一人以文武勲名书之史氏至宋兴且七八十年而後天下称曾子固又至熙寧而翰林与合下俱鸣於时而事业条绪邕伟光衍特未艾也使异时载笔之士踊跃慰藉如得夔夷稷契而序之一门三人并驾方轨何其盛也圣天子在上所以图维缉治方将跨轶三五而合下以太史知选部上之注待其将尽得天下英材以完万世太平之基则合下之所成就可坐而知及今未也乃使某得望风采於苦庐松柏之次岂非天也谨以穷贱姓名干诸将命者某求仕於科举而不得则无所道矣去老於邱园治田桑以饱煖残齿耕稼暇日尚能作为诗书以歌咏太平君子之声烈百世之下或有传焉则曰合下之旧乡农圃野夫乃有功於文字也则今日之蒙赐见或不辱焉昔韩退之负高世之文已出身於科第而三上书宰府不得见其自序始来京师拜马燧於马前知李实匪人而溢言推美之局局然作释言书唯恐失三贵之意也窃尝为叹息伏惟合下贤德幸不责某以此则既赐之见又降意而导之观其在衆人中为可议乎否也则某老在下风虽无元和侍从一官而死见退之可无愧色

上徐龙图书

龙图明公合下夫势利俗成而道义之交鲜复见也岂唯隐约者不安为士之分而用諂失已亦其贵显者之器识未必真贤则骄渎不能忘也惟贤者乃有以大过人而後能不以外荣殊其内得是其於天地造化也师友之矣略去僥来之富厚曾何暇於贵贱而辨之山林之瓢褐廊庙之章节俱为寄顺之影迹而未始以入其胸在我与人易地一也夫然故贫有以忘而卑有以化视德之存焉耳若乃所知所至未有以彷彿乎此则亦衆民而已其穷之所灵习之所成肌沦骨浹动息觉梦无非光华之慕侈厚之美也则恶穷贱如污秽好荣盛如云汉患未得则舍性命犯礼律以僥求幸而得之则满盈怠傲谓显荣之极致具诸已也为下佞伪为上难事其於中扃迴然戾矣夫惟天下之势不能一土无民则不能一日无事而公卿大夫之位岂容或虚位不容虚而贤人则不世出也而欲以大过人之事责於昧昧之衆民其将有可乎无可哉古之人固有倚于执政之门者矣其於人也盖自知与我甚敬而不怠有所不愿则趋而避之彼诚知所以处择然也汉魏以来贵显之名载於史氏盖已不少考其行业之所就自非有抱负不羣未易至尔然其初终之所践则不涉諂屈者少矣即其终以緬其初虽比之不墮泯泯辈流而悼恨慚耻之踪瘢瑕而烛映矣不知悼恨慚耻而唯達之快是亦衆民而已呜呼诚有内得之真贤而不幸在野适无必异衆民之公卿大夫则亦忼慨老死於布韦之下安能俯仰取辱於势利之尘哉某农圃寒绪稟受孤耿读书为文辞不肯止於苟售则探高究远以圣贤之阃奥而笑讥谤怒造次遭蒙盖尝随俗应科举而不以为嫌也乃特以书姓名於富贵之门谒为羞岂曰能贤亦以不负古人云耳京师之朱门小而多者犹当列郡之旌戟其大而有数者可知矣不以吾身之两掌周旋於彼而紆回刺促愿见明公某此来则非卒然者也窃以承平多士三尺童子皆挟进身之学而怀台袞之達长养收成往往遂心顾唯所以履藉异於汉魏以来贵显者之步武则几希也其犹有负矣明公襟蕴博大命世之豪而三十未仕优游下国文雅辉光泰然无不足之色一日抗言九关不赖先容而直取万乘之知遂与黄髮宰相均承体貌使四海含气倾想风采倚以为臯夔稷卨是真无负矣向非有大过人者奚以致

此若某之蹇拙何足以言道义之存然而所操特不諂之区区非日月而至者及今残齿未尽一识特起之贤可无骄渎之辱也亦可以言平生不失矣虽然尚有所患盖当天子未用明公之时某既能少知贤人襟蕴矣而愿见之请乃伸於四海倾想之後使势利题评致疑於随俗纷纷也此鄙心所为自怜伏惟明公肯赐亮察知其未尝自轻於朱门则明公今日之爵位非能使某去彼而就此者也如是而羣疑息矣某著作未成今所存者乃闲常应用之作适可观其言之工否而明公以为可也则献之屏墙良有厚幸以为不可则前所云云悉出所虑之外矣

与杨次公书

某顷年同诸生録乡先生王补之文其中送行序一篇道合下於三礼之学用力敏强悉能考正崇义旧图以成一家书最後又闻合下作极书以攢纠太玄之所不尽於是兴叹声以为苟於学事短阙安能遑暇於斯沾沾举人检韵商对偶以临徼进取之文常若不及彼於先儒之业是非乎何有夫二帝三王之治嘿?而复行於世凡有心识莫不知之然则陈迹余文存与不存知与不知於当今世用何所关碍况於汉人陰阳星气律历推步之学而足讨论扬雄在时笑者颊辅已疼到今千载士虽间有读者而玄之道实无寸刻得行是以太玄三礼之书其度数是非不为进取人贪爱亦有由自但博闻多识先王之所以贵夫穷理则六合之内苟可以为说者詎容不知韩退之称欲尽读人间所有之书盖非偶然之意农翁之善蓄稻也层藏累纳有淹二十年不发售者红枯自腐童子知其不任炊煮然而莫敢以不富谓翁则夫合下之用心纵不能助功勤於今然亦足以对举人称富夫富非家常人有之事也则补之寧能不以言补之且不得勿言则某之区区方阙然而多识博闻能无赏叹日者会承合下来掌敝邑之簿书私怀喜幸以为平昔之所听闻正遂亲见二书所至冀将得以借读而就讲之而不自知疎惰之因仍谒未及陈而合下已赴台符之选愿往而莫之前於邑何尽自车马之去邑且半年矣虽不尝参奉神锋而传览合下之辩论文辞亦既良多念二书已足传世而士流所说复不止此皆称合下精達老佛之书有底之论以备諮諏嗟乎合下之富其遂不可极耶何其力之丰也昔者孔子门弟子下及孟荀扬王诸公皆无力於鈎考继传数制之异同与夫掩袭星官历伯之所失顾其有以易此则亦未易言耳今合下悉能诸公之所不能而又收功於老佛则夫未言者某知乎哉知赏叹不忘而已自抚去洪次舍不远方以拘滯不获亟造谭筵二书之讲求何时适愿况於老佛之论而敢蕲於侧聆北望下风钦悚钦悚

又书

某惟合下之所有足以从之讲学以助多识博闻昔者奉书言之具矣念之勤谋之久卒不得焉命也自过鍾陵始获奉拜风表而从容承论不克久次北浮湖波并到枞阳私心叹慊戚戚不自忘已近乃蒙達理者相宽譬焉其言曰学非名数不立乎应曰是宜知耳即杨秘书罢今官遂高超远往不可望见乎曰未可量也吾子之乡人事学者特吾子乎曰五百人也知杨秘书为可贵者谁乎曰罔不然也然则从之者寂无人乎曰否苞橐就洪而师事者四十人矣曰若是吾子可以勿忧以叟闻之器不大者响不洪求之诚者应必露未有拍麝而香不扬涉涧而足不濡者也信以秘书之才俊温良在秘监中不失知闻可语士矣而子之乡去洪三百里

士五百人并知秘书而从之游者有四十人夫四十人者之为是行岂悦其声容跪揖而从之耶必将有以求益矣彼知以益为请则杨必有以应之以克副求杨之道者自今满子之乡子可以傍观窃听得之如其反是也吾为子乎可吊矣今何戚戚为也伏惟合下有乐育人材之志又当推仰之资开明道达投迷以悟则区区南城将多学者如某之愚或亦有望以不为达理人所吊岂任幸甚谨布襟私幸察幸察不宣某顿首

请见李宣义书

今日?内财赋充羨中外帑积贯粒朽腐弥漫相因宿史老府之所褒叹以为承平以来未尝有之可谓富也威械壮旅云布营壁且作且增训练之精诛赏之明黠羌悍敌之所疑畏以为和好之世何事尔也可谓强矣然而丁黄之籍月益户日益名比方盛古曾不啻累十百倍而晏安之俗未大成憔悴之志未尽平则是民安之未至也夫为天下如黄帝亦足矣而书传其事不过国富兵强民安而已以今廊庙之吁俞精锐十五年间该通委备坐致富强如此而民独未得其安则惟贤才守令稀罕故耳无土不家民无位不置官西北徼乎彝汉东南穷乎海峤郡邑相望如晴霄之星见而谘访其人求无屈恨则百不一二焉以为高材美质不容世出则蔼蔼多士之时其三光五行将非今日之天地中间乎以为搜?委任有所未至则褒厉之玉音荐扬之论牒屡出交上岂其皆虚饰伪报乎使善评理义之士考镜于此则亦有衆人常多君子常少云云焉耳盖尝闻之古者道德邳明之代其法度既立则有以使人人自尽也其人之才有所不逮犹得勉强以成其务以不为旷?使民有所依倚也後世此道?裂而士之所以自养与自期莫非苟焉则入官之计主于丰亨利達而已自非贤德异才卓犖挺特不淹于流俗之习慨然以忠诚为己任则休声和气何以有见于聚落之苍茫乎于斯时也有身有家得一日滨近于休声和气之地既可以庆幸又况乎居游作息三载于其部乎某困穷无所可用者独能推?贤人君子之用心自合下之屈于敝邑于今盖垂两月而私窃快忭乃至居行梦寐之不能忘夫区区一布衣亦何所不容哉以为四境之内奸诈遂息善良遂无患则百里之安非细事也固为廊庙之福矣是以不自知其咨嗟慰悦之深也夫求合下之所以贤观合下之所以得民亦岂如天鬼之不可测度必有一言可以尽之则忠诚自许焉耳推行明智以听断于事物之际而操心耿耿未始以一邑为不足屈我而?芥于胸次此之谓诚古之人所以深山天下无适而不自得常不失为圣贤也夫道与之貌天与之形人与之名其中不可揜者至诚而已使合下而得志愈尊于此位则民之庆幸愈广大而衆多岂唯一国固将兼及四海矣盖贤才之所在称慕于千载之上而不为久重跼于万里之外而不为远以南公之不佞而卧于田庐乃得与为合下安静之民岂可不一识贤人君子之顔面而闻其绪言乎非不知布衣分邦君之庭为末俗之礼也以为读书想象风采之不足不若涉末俗之礼以遂识贤之志为轻重有所措也夫是以竭来谨伏署庑唯所以命

上知县书

士尝叹悲以为见贱于世夫世亦安能必致贱于士哉顾忧所以为者或非士而已矣道有内外而势有崇卑此其所以为世今惟学而无所得于内又何望贵我者于外而必欲有得则望固不足以言之而势之所居又自有常何足叹孟軻子思穷为布衣所过之国争馈而竞礼直

将以为君师而二子当时于馈或却于礼或藐此唯其负所贵于内故耳及其势在宜屈则虽州闾之走吏操檄而噪于门其必悚遽摄?而从之岂不以我之所得不足以废彼势之所崇欤今夫以士自名而其实或未有以彷彿昔人之毫末然而乌冠素袖相望持谒皆足以抗礼貌于势位之前夫专谓之不我贵何哉特未之思此而徒缩缩乎慚且病者皆不足以语为士之道而其叹悲亦自苦耳安能动世某不佞少而愿学长犹未之有成是以未尝轻望于外亦未尝不以孔孟为之依归昔者先人有户于此邦而生是寄焉则据之以为家方缘贫苦之故未免随应举觅官之後则虽食无田而栖无山犹不可以舍而之他也又况乎坟墓族亲实存此地哉伏承执事以贤来宰而聪明详敏之器韵方将发扬仁风德政于兹思同邑毗均赖涵养之赐不敢自匿而不参诸生以进拜堂下称庆幸于为贤大夫之毗於心实有戚戚也若夫叹悲之与见贵皆所不以为意惟左右亮之而进退焉

与傅公济书

公济足下羈旅无恙一别八年无由会晤思慕悬殊音尘遂絶间者人自西归能言动静闻颇近利伏惟庆快早岁参陪游集得观辞诚何尝不以名教自居相期恳到没齿以之不谓一客边方遽丧本心割徙情爱轻忘坟墓二亲白首孩幼满室只字不寄逢人不问嗟乎公济乃及尔乎庸衆之人不讲文墨不师圣贤然其骨肉天性各怀种类抚循依聚今古无变寧有齐鲁门徒三试礼部志取爵禄临涖小人而肯?裂家累了不顾省古人有言青出于蓝而青于蓝冰生于水而寒于水公济日交外蕃辄亟过之能为世俗之所不为青寒远矣公济岂以故园贫素不足存活乎则父祖宗支嗣庆緜衍非不足也自公济辞乡以抵今日朋游零落死亡过半人老多慈陌路犹悲寧公济固无悬念耶若刘氏妇翁夫妻继逝尚无幅纸以申吊问则于他人不论可知嗟乎公济亦四十矣岂其未能不惑乎其亦放而知求乎身无李陵之罪又无苏秦主父之怨而甘心异域如处清都古人可作公济孰与女当结褵男可就学公济弃之谁宜收之祖夫人九十尊公亦七十有六矣父母之心养老送终天下一致公济非无五内而不以此念是独何也客有诵公济矢死不还乡之语者曰身可没魂不可归嗟乎公济生于空桑者欤犹宜有抱哺之情也忍为此语闻者酸鼻仆不佞默观公济程躅自惟不当更以故旧奉望然尊公相过睠睠在谈聊申憇言以备切偲听之怒之唯命而已公济勉之吾言不再

卷十一

<集部,别集类,北宋建隆至靖康,灌园集>

钦定四库全书

灌园集卷十一 宋 吕南公 撰书

上运判书【代鲍久道作】

昨者再奉台符督以进所着文上中书备差择充学官事自初承命至於今日思之勤矣而终不愿应者未能无说於此盖闻士之所以善於行身也以其能不近羞辱而已矣知夫羞辱之不可近而求所以道之则誉不足得而咎无自来往者某惟势未容於不仕而义又可以出也则持诸生之业以干有司之见收干之日久至於四上礼部而三黜乃得一出身为选人间尝内悲以为虽趣时天下之所同然自道而观之则彼未之信而我尝请试彼未之与而我欲以取是皆得辱之道然则某之所近不已数辱欤数辱非所宜堪此又惮恨平昔之无能少道者也今夫庙堂之虑将以致风化於同文而推择贤才司其教养此其意岂不甚善顾被举之人犹有不宜轻动者举未必信而信未必用也夫合聚数百口之辞章而待一二人之去取此其与应试诸生岂能异哉就如见取或不足贵及其不取则是三黜之辱复增为四岂所堪耶幸沿下局得居明公察临之下禄以养亲官以庇身行法以俟命可矣践非所宜以近旧辱正恐一日自悲之不暇所不愿也焉能知其余图所以行身不失於善而已伏惟仁明当赐矜谅

与汪秘校论文书

往者辱示勤勤之意使以鄙文进礼几席承命既久冗琐未能即呈乃今不免献矣犹愿以言尝於左右盖所谓文者所以序乎言者也民之生非病哑吃皆有言而贤者独能成存於序此文之所以称古之人以为道在己而言及人言而非其序则不足以致道治人是故不敢废文尧舜以来其文可得而见然其辞致抑扬上下与时而变不袭一体盖言以道为主而文以言为主当其所值时事不同则其心气所到亦各成其言以见於所序要皆不违乎道而已商之书其文未尝似虞夏而周之书其文亦不似商书此其大概若条件而观之则谟不类典五子之歌不类禹贡盘庚不类说命微子又不类伊训至於泰誓洪范大诰周官吕刑之文皆不相类也盖古人之於文知由道以充其气充气然後资之言以了其心则其序文之体自然尽善而不在準仿自周之晚六经始集七十子之徒虽不以诵经为功然其尊仰孔子盛於前世及孟子荀卿相望而出益复尊孔子而小衆家故秦火既冷而汉代诸生为辞不敢自信其心而曰我歌颂帝王盛德与夫论述世故皆出入六经峻有师法不可庇類此西汉文所以见高於世而东京以下学士不易其说也虽然亦其说如此刘向之文未尝似仲舒而相如之文未尝似马迁扬雄之文亦不似孟子也张衡左思等輩於道如从管间窥豹故其所作文赋紧持扬马襟袖而不敢纵其握自是文章世衰一世几於童子之临模矣繇扬雄至元和千百年而後韩柳作韩柳之文未尝相似也而前此中间寂寞无足称岂其固无人其患起於不知由道以

充气而置我心以视傲他人故虽劳犹不能杰然自立去元和至吾宋又数百年而有欧王之盛宗其学者文辞往往奇特然至今者又已少贬盖文之为道由东京以下始与经家分两岐其弊起於气不足以序言之人耻无所述因乃琐屑解诂过自封殖且高其言以欺耀後生曰文者虚辞非吾所取吾当释经以明道而已疲輒人喜论销兵是故相师而成党嗟乎从之者亦不思矣夫扬马以前文章何尝失道之旨哉今之学士抑又鼓倡争言韩柳未及知道不足以与明不如康成王肃诸人稍近议论噫又过矣夫所为知道者果将何为必将善於行事而有益於世也不识康成王肃之行事有以大过人乎如以为行事因时难相比责则所以去取重轻者无乃谓学经贯穿衆说难於立意成篇乎是又非吾所信且天下孰有能饮千鍾而不能三爵者彼解诂章句三爵之才而已陆澄非不能说经而当时有书厨之讥此足以见为文难於解诂夫使韩柳为澄之解而有不能乎彼韩柳者盖知古人之学不如此是以略其不足为者精於其可为者耳说者又云吾不论说经为文之难易但经术明则道可行吾故趣於此此亦不然夫康成王肃之时大乱数百年而後止此时学者岂不知宗本王郑经术耶道何以不行也孔孟以前学者未尝解经而言治者每称三代且先王所谓明道者岂解诂章句之谓乎後人欲追治古经而按此以进焉吾不知其与捕风者何异矣天下治乱有常势也儒者之才不务见於事功以助为国者之福而希世沽名苟为家说以乱古书自称高妙此何所补陆淳岂不明春秋希声岂不明易祝钦明岂不明三礼然此徒於当时治乱为有补乎否也而後生方倚此论功不自信其心以思自古文学道德之变而更纷纷轻视文人且文章岂足为儒者之功即能之固不必恃然解诂人轻之亦错矣是饮千鍾者不自以为能酒而三爵者反笑千鍾之醉也某不佞少年时浪事慷慨欲以文学自立二十有余犹不得其绪以为能事止於时文而已盖至於二十四五然後克有所见於列庄见道之书於六经见道之训於百家见道之所以文而文之所以得於十八代史见道之所以变沈酣而演绎之窃以诚心自许私尝以为文学之事虽使圣人复生不得废吾所是而遭时不偶有前之云云天下滔滔未易同志唯当勒成一家俟之百世焉耳秘校才高而识敏亟从时俊之列超拔入官而问学淹该如不自足方用谦屈乃以及於鄙文且某何敢爱哉但窃有所疑者当今文与经家分党之际未知秘校所取何等之文耳若尧舜以来扬马以前与夫韩柳之作此某所谓文者若乃场屋诡伪刼剽穿凿猥冗之文则某之所耻者往时尝为之矣然未尝以之比数於文也譬犹美女时花细丽艳妖朝盛而夕衰焉目虽偶游不足以为荣观必若黄河泰山峻厚高简浑灏奔注与天地齐同而日月不能老之者此某之所以究心未识所取亦在此否旅贫而力夺心气有所不专下笔超超或未了意秘校取之在此虽一言可以致亮如其取之於彼则又何言谨録书陈正事以下若干篇以复盛德惟试览其如何苦热烦汗书不状心

上时相书【代鲍久道作】

相公合下某窃惟之天下有慰悦不在乎分之必得而志之益通自足以为难逢盖儒学之徒吟思文字之间识见经纶之方而轩然欲以有为於当世者古今有志之士宜其不少然而必得有为与为而克成者抑几何人顾令有为而必成亦自天下之福耳於有为乎何有要惟帝相君公获任所在当必如是乃为得意而已彼夫不在其位者何哉然士无用不用皆知以太平为心则虽草茅之身岂能无意於当世自昔庙堂康靖而八表晏如势有无穷之宁而计无一日之患可谓盛矣而於此之时人怀一不急之言野兴一自得之歌有沮而止之则悒悒不

快夫志之各通者果天下之慰悦欤而分何足以言之某顷以布衣诸生同波仕进之业其於世道亦何足以当损益之毫毛而窃有志焉异时名忝一官更从趋走之事尘劳偃蹇固应无所复望而於今日若有所喜者岂非大人君子有为於上而下之无用亦犹斯志欤天开陛下登倚相公于四海喁喁之际而兴除大计一将刷荡有源之弊而扶殖甚大之功若今制兵悯农用义正恩以材考官察刑书革贡举皆先代名臣所不尽明或虽明而不敢为者而相公既果为之为之且又垂成也但令当今剩有可大用之人不过敛臂称是耳若某之不肖力不能効戈殳以助扬不战之威名智不能精计算以翊弼制置之权宜故平时所工唯在於先王之遗经与诸子之传言而今也英奇辨正之士又纷纷而衆起则某者果不足以当毫毛之损益哉然尚有言焉盖闻天下之治必成以岁月之久而君子之行事非持之以泰山不移则志不立以唐太宗之明而辅之以房魏诸公然终贞观之世犹有可恨处假如当时沮惑於封伦等辈之言则安可知故今日之必致太平不在乎有为之难而在乎持以不移而俟以淹久也凡人之识虑多不得齐同所以相为是非往往未定方汉武留心匈奴时朱买臣卫霍之徒九十其羣翕然赞之而汲黯公孙独知以为不韪及其拟议封禅则倪寛诸人倾意称善而卜式专以为非不识为当时人计者许谁者是且定谁者非耶母亦各顺其识见所同而已矣晋武伐吴吴主具舆衬而廷臣犹有乞斩张华者宪宗取蔡李愬已入元济卧内而东方诸侯尚飞章请得罢兵故夫论议之异同何足依要当察夫事体如何而已矣今之天下治势垂及如此而论者或以为言愿相公之勿动以就有为之福也且夫天地之间五情所以不异者唯人焉耳则小人臆虑何尝出乎君子之所知然为某者必区区於斯言盖亦愿通志者欤譬之不急之言自得之歌闻与不闻曾何足道然而必欲者幸上之人勿夺其慰悦而已伏惟赐亮

又书

某闻君子所学当博矣而其要不出乎仁义仁义之本存乎人之心而充积之盛得以立天下之道大之为王者小之为匹夫无加损焉学之於仁义岂不重哉自古圣君贤臣其所以相訐谟暇豫寘天下於熙平而儒生亦以隐约之身扶持此道使不絶者其事业可谓神明矣然语其立政皆不过广吾爱以立天下之爱尽吾宜以底天下之宜如斯而已耳故夫仁义者学士之心所当汲汲也自始学至於终身自知之至於能行百日放之而一日由焉则得为善士百日由之而一日放弃则又入於小人某之不肖有闻於是久矣窃尝自思以为道无所不可致唯其得势者致之於天下为甚易势之所得行无小大之间惟其才全德备者为无难方今之时有命世者出乎则足以勿论尔矣必如势不在於命世则我何能知求知吾志於仁义而已矣自试於场屋以至为法曹旦旦以是诵之而遭会亨嘉亲见相公登庸其经纶措置莫非治古之能事而前王之难过者也则以书先容於合下且自道其慰悦曰愿得持久以俟化成勿为异议之所沮夫某岂专病谀者而然耶以为今天下之望顒顒于熙平而言者或无益於行行者又无幸於成则道何自而立化何自而成我知慰悦与愿持久焉所以志於仁义而已矣不虞事兴虑外台阁诸公乃以固陋之名上闻谓宜备员教学之一官而诏旨下临使陈所业决可否於有司是举也某所能堪耶德不足於有闻才不足於有何修何仿而取名於师资名出乎此矣实将焉责哉是固某之不能堪也盖惟学而不仕则无以達乎义也则某之所以在小官而不自以为不宜至於仕而不学则亦岂某之心唯其所言所行未之能信而遽将仕以教人则於义滋无以達之义无以達则不敢苟进焉某之志也伏惟相公道德全尽当大有

为之世得不世出之君周公以来所未之见若今辨材任官各当器能大者制权而小者役职治化之序凜凜於垂成矣若某之愚尚何所效尚何所论然而鄙心所汲汲知所悦愿而知所不敢也则犹不为放弃仁义之小人以辱盛时使今天下之士其德优於某者被用而不得辞则世已多士其荒庸固陋比视某者又不敢妄进则庙堂风化之意某或不为无助伏惟相公矜而勿罪谨布区区以尽愚忠

上执政书【为人作】

相公合下某尝闻之为士之道有二患而罪恶不预其间唯其力不能学而才又不适於用则皆足以自患其身二患之不免焉皆不足以践人之形而充士之名然则小人而已矣小人矣则罪恶何足以少之故论之世以观之士则平学不力之患易而平用不适之患难何以言之盖今之士其学有非所以学则或不足谓之学此已甚矣而上之人又正因其术而定宜收可弃之名於偶然忽尔之间虽屡弃亟收何足以标题彼此之是非哉平昔之空疎一朝之合格则得以陵厉资迹於显设之涂虽知其学之犹非亦不足患矣若夫効官揭职则必有其状文不乱法而武不犯禁大者知要而小者及务无崇无卑无久无近无繁无简壹当有以慰塞乎人之期望是乃可耳十年领要任而利泽无影响三月亲一局而理道得以称此不亦才用之所露欤宜称而莫之称名可任而实不足任焉使若人殊无心气襟灵则姑置勿论必如未至於此则慷慨媿耻诎有已时某之所谓学不力之患易平而用不适之患难平者时固然也自某之少承父师之训励日为求进之事艺以幸於一时既例荐於乡久遂得第於廷亦有年矣顾惟平素之所治已不必问然由入仕之日奉法律只教令窥寻明天子贤宰相所以缉熙经济之意余力习耕战书相方略谋利病以辅养不敏之才而备当途顷刻之指顾虽知浅特不敢不勉亦至於今者而犹不见取於在上之人尚不自抑於无用之场而区区更复有言於台屏之外焉岂亦有说盖闻人之功业所就虽各因其才智之小大然唯其有事则愈足以见其所收譬犹丰宫巨室之已成小大负畚箒备洒扫毫翁坐阼下司谁何便为安家於此之时虽有工师百身无补於参涉及其岁弥而舍久有宜修必葺之势然後匠石辨材弟子运斤陶甕眎覆甃夫详髹丹手漆人交臂合声各致其能乃见所功故当天下之无事也内外羣司因循轨检无不可者虽至有大所负於功或未易图至於治具不得不事更张之际则寸片铢勺之能其於入用皆所庶几伏惟相公道德之望朝野一心倚之隆平周公以来所不得拟方将器使才类俾无不伸代腐以坚涤污以清以烁前光以尚後声以还二帝三王之盛如某之鄙才纵未能大固亦有志纵不堪为之工伯颡将备诸其徒愿尝效焉无状而後已功业之盛岂敢言之至於或免不适用之羞而少平为士之患则荷相公之赐无有涯量伏惟高明矜而亮之

上参政书【为人作】

谏议合下夫知人与见知於人古今莫不以为天下之至难而某则以为二者虽然未若知人而有其势与夫见知而会其时之为难也何则夫所谓知人者亦小人之事顾必有君子然後可以责此云尔以君子之事君子而曾以之为难乎彼小人者於己尚不自谕奚暇致察於人若夫我未足以取知而固以望人此真不易但士之於世其才能各有所适则亦不必全尽乃始必闻是则凡见知於人者有以可知而知则谓之以义有以未必知而知则谓之以命有

义有命兼以俟焉果不足以称难於天下哉昔者顏淵见赏於孔子而生不免於贫贱他日身死则从之乞一车以为槨犹不可许淮陰侯紹介蕭何一旦坐诸将之上而人主莫之违夫四人之圣贤文武虽不同而其所以知之与见知则不异然且一终穷一速達者孔子之势不足而蕭何之势足顏不会时而淮陰会其时故也夫势之与时其所系盖如此谓之极难岂不信然自某之得仕於今十有八年书吏八考而犹未出於州县前年以常调詣銓阶缘舛慕望拜左右则容显受提挈之赐於舄履之前内惟无状岂足以上污高明君子之门身非韩侯顏子之器而承值赏拔冀或似之岂所谓以命者欤兢悚犹未定会麾幢出向太原盖尝自悲以为区区之命岂果无幸於吾公欤叹辞未几而合下既受召节及今之来则合下实坐东府某是以欣愉夙幸思复倚於门牆也窃以当今庙堂之论一新天下之政政之纲维既尽举张农刑士吏科任其职职足其人事且成矣其尚奚言抑尝闻之太平之用士才无细大之择唯各周其器之为宜任无始继之异唯可其事之与委若今之大务犹在二边蕲安而未之全筹谋指顾利用感奋某诚不武愿以犬马余年尝展荒穷之力於有为之秋庶亦自勤以不辱高明之知伏惟合下德业之盛方将形於久大仁明所烛何隐不彻何微不彰若某之愚岂俟陈说乃以卜宜知与否之如何谓今合下之势正某所以取会之时憚於极难以重无幸之悲是以不嫌於献歟即蒙矜亮何望如之

卷十二

钦定四库全书

灌园集卷十二 宋 吕南公 撰书

上提刑郎中书【代人作】

某闻之君子之道有见於退而终无意於进则虽天下之大不以关乎已如其心未忘於有用之境则一身之行止尚不得不借资於人亦何言天下哉盖尝观书见唐虞之盛时其世道已隆其治具已张上之人孜孜以亮功若采为务而百揆四岳亦既在善而宜同矣而巢许之徒方矫然以立异于是背睨而掩听疾走而避逃以为是笑而可羞求若人之心盖以箕山颍水为无尽之乐耳顾曾金举之涉虑哉士唯识愿不必于均壹是以咸熙庶绩其必以人钦俞试命黜置之所系则下之所扬岂不重于上之所咨且以共兜之无状而不决于弃斥虽以舜禹之贤圣非由衆与则未拔出于羣工又况乎碌碌之庶职欤举知之所以重轻甚乃如此世衰道隐士稀勉勉之修而盛佻佻之习皆知奔向于进仕之地而不思人之谓已何如也而已果不为人所信求者不以思而应者不以信故举知之风自此寂寞而无闻矣士而不幸出于寂寞无闻之後其行若止亦知奈何必能遂志于退藏则嫌于未在中道将以区区于适用则必进之助难容借之母已焉亦有端我以俟人而已矣凡今之在于下者其路正轧而其势甚惊也位与言乖则事与力违唯乖且违此简书察责之所为惴惴而何暇望知己之人而举扬之虽然犹有说焉以为各占分所宜以自幸焉斯可矣盖仕而愿达苟有名于禄籍莫不念之使今仕而得愿之人尽已俊良则无所复议万一不尔则失所以蒙称而被荐者尚非各幸于分所宜乎一人真可而誉之者二焉衆犹未允也一人未可而誉之者四则衆既服之夫某亦安识若人之为可未可哉姑以时世之所同占而言之耳某不佞少而谬志于进故为进士之学诘曲于荐试者先後十载盖四覆于礼部乃克有成缀名于选科掌法于山川在衆人中诚不自知某尝所蹈籍与今所莅领为果如何方思端以俟焉而幸出于不图前守张公与今守刘公及运使徐公皆有言于甄借自惟孱陋无所堪于进用而获助于此则始之以骇而继之以喜而中又自疑审以某之行身为真不足用欤则三公者何为爱之而不至于失措以三公之贤而措不容失则今宪司之重如执事者何特未以为怜乎是某之所为自疑也伏惟执事有才甚巨有德甚明当庙堂咨吁讲求治道之时思有以网罗器使仿像二典之光英而亲承注委出振使者之权以照耀于江表其神之所达精之所察十郡之休戚良窳盖无不在术中者矣如某之鄙必有所处即蒙嘘及始末遂以成就则何但使某不见笑于退藏之徒必将扬厉庶职以宜已分使三公者皆免失措之讥焉敢布腹心唯实处之

上运使郎中书【代人作】

某以下才浪从诸生课试之後幸备一官守掾局于远方而属当明公察临之下自以无状恐不能胜称事任而劳执事者之放斥乃不知大人君子惠顾所周存细而容愚委此不议已为厚赐而间更被以书教以所不能而又责之以其所见闻来访于左右焉嗟乎此盛德事也顾

虽不足以辱问然区区之心亦由是而兴感盖惟士之从于此世也苟未居乎顽钝不灵之魁则几乎而不有心于行事少而学焉长且试之夫孰不欲而稟今之法则势有所制盖之上之人将大有为而欲尽宜于下下之人喜于所逢而思有以伸于上然或不能也何者位望之有分而崇庠之地辽则幸夫言论之协符事权之相与亦已鲜哉今以某之荒庸无所取类虽亦有所怀而志虑盘礴曾何得于明公之意外而于此过蒙谕逮焉将奈何而复之母亦因今所欲陈而取鄙心之所谓尤足备用者致下僚之忠而不虚辱于明公之被及冀高明亮之伏见今南城知县著作佐郎叶谊端厚俊明有巨人之器姿其当官所试盖未显久而事业趣致超然无流俗之风莅职以来事日以简而政日以优不察而详不厉而肃奸势害闻命而沮熄蔽欺悖盗之伍藏怒于讼机欲以犯死而不返者初从庭所得令一言而曲直醒解舞踊谢退而不俟刑平至于申飭所加未尝不本于仁义而无依违顾惮之思方其有所弛张虽有挟泰山疾雷之势不能挠夺于毫髮也南城故冗剧盛有难宰之声而某访之士民政理尽善近数十年来未见可与若人比者唯是往年苏秘丞絨及近去吴秘丞审礼皆有能誉于此县然犹各有短处盖苏君喜土木兴造故或涉于烦苛而吴君之政乃独不尽于理税科徭二者民事所先而缺闭如此若叶君之治则无得有是盖今时世所称为贤吏者多以其能奉法循令而已矣然奉法循令而已者果不足以尽吾叶君哉凡令之近民威可以使其有畏而爱不可以貌得也事可以心了而政不可以言辞善也今坐公堂临衆务恬声暇气终日不形于喜愠而理道整整使环境之俗謹荣戴赖如倚父母非夫政以心化者其何及斯比以吏格当移蜀官既已拜敕则郡之士民相与惊起列牒愬于守公且幸其飞章请得终任以悦饘编氓而或人怀其初无阿谀顺旨之事即遏沮之到今叹者未已闻此邦之人无富贵老小皆拊髀怅惜譬犹严冬大寒方温席快饮而忽有欲褫夺其衣碎其座而覆其醪饌者孰不懔懔乎其忧哉昼阳夜漏修促以天未有可淹而返遽者今民之情牵于所爱也以吾令之行有日乃恐其即去以至于嫌恨景晷之不我迟留嗟乎何修而得此也某诚不慧行于天下未尽极广而所以见闻实无尚于此者且夫人才不易得而君子之器能必见于事为难与之间今南城之贤出此谁当赏之乎伏惟明公位任方振当大有为之秋公忠所达朝野所为矜服盖将收引贤类揄扬养导以备辅熙朝之光如谊之贤宜蒙省录且无使其居衆人之後则非独长茂明公之德抑足以称咏于太平之时拟之福禧古人有言得地千里不如一贤盖某之所以衔荷明公之赐也厚矣富矣即图忠报効于左右莫若称贤之为事故辄以是举为之先焉虽区区所陈或涉明公之已听闻者于某之忠犹无害也伏惟加察

与傅亨甫书

十七老丈秘书合下伏承车马至自北方去国三年称遂成名得财得官跋涉无恙归覲亲庭银髮万壽并邑亲朋无问愚智莫不謹夸讚叹迎拜捧拥譬如买臣露綬季子腰金之年伏惟君心亦在优慰某区区于老丈下风知审颠末自以为最深侧闻今段喜与感并窃以往昔庆历皇佑之间世路靖康廊庙大臣以洗拔文人为先务布衣起茂材因以至宰辅其下或为列卿至尤不幸犹不失禄养于此之时盱江之湄辞学渠魁声动天下者有李泰伯而陈汉郎与老丈为之流亚志气轩赫掩盖褒博物议钦悚率以显达奉期而天不契人都大落寞泰伯晚蒙收召俄亦死于郁郁汉郎不及脱布衣以早世老丈独存而穷悴无双艰危万态险不自济比过五十而羈游万里干戈戎马之地辛勤暴露乃蒙一命补吏于海上此岂足以为老丈之

福哉黑头公卿秀髮御史回首怵然雄文好诗填委篋衍传满吟口曾是劳神殊不得力然则今日衆人所以讚夸讚叹者见老丈一旦辉彩而莫知平素之襟蘊也孔子録诗有取于淇澳緇衣孟轲春秋亟称彼善于此不得于其卓卓则次而又次者亦所咸收顾不为充尽而已老丈之贤不得大行其志于当年而迟晚绿衣初随趋走之後较于汉郎则全胜视泰伯则稍过之若向宰辅列卿论焉盖欲然矣士之抱负出羣而遭遇不优如此虽世道有不相与而亦区区所为感叹也河湟关陕旧事每从纸上披见恨不如太史公周流纵览故都遗迹以快心目老丈留连其处日月多矣想无不熟于指画冬初去书社且展谒高堂以谂世变迹日惟冀自重不宜某载拜

与傅商容书

三十四丈秘书合下季夏极热伏惟尊候动止万福往在城东幸得参拜行馆过蒙引接至于忘年出示所着易图口谈手点不爱再三某虽愚未能悉悟述作之意然恭敬德美比之亨遇不啻百感岁穷走洪都仲春却还旧山到今困于多故酬酢不支因亦不得驰送尺纸请问安否倾企媿负交战无已秘书风谊峻洁须向古人中求之流俗卑污知与不知盖不足计某亦未超脱流俗方且与之同波而就中检校尚能商订文行不为衆人好恶所蔽此一直耳天下之人不限古今皆以能贤望于儒者而儒者亦高大其说如必允蹈及察其迹则不类市人者少矣农商鄙人眼不识字耳不贮仁义之辞然安其职分贪不至墨美不敢窃虽甚劳苦不缘侥幸而布衣书生以士君子自号乃由少壮至于老死胷中扰扰不离嗜利矜名舍性命犯礼律而为一慕十慕百慕千慕万万慕亿亿慕句股夕桀力不必破蝨而自许回天智不必卫足而自许穷神盖读周孔书之徒于六经之言未克躬行一句而开口即骂老庄方其骂时颇似不堕人短及察其迹则知足不辱知止不殆此八字者千万人中无一二人践焉此所谓稚子弄影不知为影所弄者也一语骂老庄尚系毁谤况终身讪笑者哉夫少而求仕进至垂白而不达亦可以卜其身之穷矣顾乃撑衰扶惫一步五喘五步三息趋涉长道以冀或近于利名此当世之人所同欲也于未必得者如此而况于可必得者谁肯舍之秘书三荐登科补吏大县一跌于冤诬盛年拂衣归卧林野不复动念亲旧敦譬诏旨开示一如不闻被服饮食粗素薄淡不啻屠酤俚儿而安若八珍重锦鱼轻鼈忽兔谗猘吠相因而进而蒙受理遣不为之变考经论史日作清诗取次胜人而不为时名此皆千万人中未易?者也而秘书以为士固当尔夫流俗何足以知哉夷齐不经仲尼评品止于蹇拙饿夫而已李仲元见知于扬子而人更置疑近者吴孝宗能为出衆文辞而邦人呀呀谓之可怪至信都公以诗褒赏然後笑者口吻乃斂士之蘊藉包蓄惟求名实相副而外誉不惟其实徒?于名故世俗纷纭如此秘书风谊岂以有求于世而为之哉某所以叹嗟切切者感古人而已矣亨甫新慰远归想旦暮聚首吟笑之乐良不纖细漳浦三郎久不见消息不知有谂覆上左右否某坐山间亦漫销日夙闻东岩幽名尚未投足冬初思一往并得上谒户外起居全望珍爱谨奉手记不宣

复傅济道书

昨许秀才经过连得吾兄夏中两书伏闻官下诸况平裕太夫人壽康不胜延跂之思所示古律体杂诗一轴辞致良佳如白云村篇殊有作者之气视今日之赋讽胜前远矣方又屡进不

止则古人何必独能哉闻有解周易及论语孟子文字甚善虽未得借读然观答徐生书可见别来道学所造虽然济道用此趋时以致及物之功业则可果以为儒者功业正在乎此则吾恐未也古之人有大勲名不少顾不必皆能解经而善解经人亦未必利泽当世汉以来学士可按矣盖古之所谓学者非汉以来之所谓学也孔子所繙之经天人而已其言虽有详略要之可以心通理察非有虚荒诞幻凿无出孔之致三千七十二子所以服膺不舍而终无事于传注者诚不以不晓期後人也孰知其後日解日昧如淖淖块而为之者转称第一难能且争为者相望乎哉夫一经而数传亦已足矣终之又有疏释则滋足矣贤者虽不见此当自晓之愚者虽尽读焉犹不可晓也然则汉以来经师徒以口耳乱学者之性灵耳如使其言具当则後人何必更言之如使吾道不失于圣贤则何必专以说经为效此始为传者之过也今之人有心智可以通理义犹昔之人也彼後之人亦犹今耳今吾不尽信昔人所言则後人不尽信吾言盖可知矣不蘄力行诚身而以唇舌纸割相乘此争为者之过也吾尝取譬解经之家正如水乡渔户方其垂纶合纲而有得也轩轩然见喜色似他人莫我若者不思自古习渔之人屡得此也及其挈而之市也苟售而已不计人之贵否也故有以昔人之陈说为吾之新立者有以衆家之同辨为吾之自得者叫呼而逞诧突梯而希誉欲以厌服人心而反自彰其寡见浅闻其可怜如此往日宋咸注周易自以无比及欧阳永叔取郭京说照之然後论者笑咸为盗翁虽不笑者亦曰纵咸不盗京孰知京非盗昔人者乎是则宋郭之所负未有以变王韩之解而徒以取盗名于世耳士诚欲学经用先儒所说而发我之神明见于行能可矣先儒虽有短何必力毁我虽有长何必衒人不闻夫传注能致益乎哉则益宜不小矣其书既多故也嘉佑中诏求遗书其解经家学名存而书亡者每经数十家而新唐书艺文志所録解经之书存者每经亦数十家夫未尝尽见古人书而遽以我为独得也其诬孰御今日解经人极多大槩不出于介甫之书与皇佑以来题府韵类无异也先时王补之解论语衆甚钦仰俄而皆曰是得之介甫云耳然则为补之者孰若静坐熟眠而听介甫自说乎介甫未尝不开说也则天下之士苟已心服介甫何必区区各鸣喉吭哉仆诚怪为之者不思也或人谓彼非不知可以勿为然不为则无以合世故已显者以此示其可贵未显者以此希其见贵呜呼若是则滋惑矣夫今天下之待介甫不过如周孔耳周公至显而作六典孔子至穷而繙六经然当时无人傲而作且繙者虽传解之文皆不为之而何害其服周孔乎如以为直希利达则不必更称深知道德性命也济道未三十而得官在仕途以材敏见知于上之人地虽单平而势亦利进今所为书特以抵当路大官趣为教授直讲可矣如盛心初不为此则吾儒功业当重思之济道不信吾言乎请约自今十年远至十五二十年间视今日解经诸书具传不熄则吾饮墨甘罪可也萧统所集繆多而是少如王俭任昉之作祇以污人耳目济道读而择之老氏师资之论可以喻矣新诗继有作不吝寄及幸甚幸甚

卷十三

钦定四库全书

灌园集卷十三 宋 吕南公 撰书

请见张太守书

布衣之侥幸乱礼也为日盖久治古之时道德致明而上下之分正贵者必尊贱者必卑无所容於轻犯士之未命者有庠校以观其才有物论以品其行可献而官然後宾於乡老其礼甚严其义甚修人虽欲以跬步踰其涯分顾不可得至於後世此道稍隐则唇家舌户挟其放僻欺傲之智以游乎羣争汹动之间招权而害势纳安而出危使夫在位之君臣一以宾师弼相处我而在位之君臣猝亦无计以杜其所犯盖卑者之有亢於尊自是后矣人之心盖有未足于得而妄於求者是以益衰之俗相与趋於其谬而一入於侥幸之乡无忌憚焉由今之习有毫毛丝粟之得者则矫矫然急人之取己至自洗拭必曰古之人固有被褐而交公卿矣且命虽足俟我何能自滞於斯而本无知者又嚣嚣然游於公卿之门亦曰遇合时耳礼何足遵又其甚也则假窃文辞沽誉乞援以羣行於造请高之有天子之相庠之有道使州侯其门无不可登其庭无不可分其礼无不可抗也侧卓其冠斜曳其衣执刺而怀书九十其流以幸上之人莫余察择而上之人果亦不暇察择亦曰士而已矣周公尚且礼貌今何用靳靳为哉而布衣由是益不逊平参直诣一不得愿则大者釀怨谤小者藏忿恨至於得愿则固未尝揣己之为何如人也呜呼此其儒者与曾谓儒者而果侥幸以乱上下之礼乎论昔之贤盖莫贤於孟子而孟子则曰礼不为臣不敢见诸侯孟子之於诸侯虽或见矣然而未有不由於义而出於礼今惟贤如孟子乃可以当此耳而果然耶其未必然也先王之治盖未尝不以贤贵行成然後宾之夫岂轻士而不之重哉举今一郡之地广狭所不可较而以进士名者动至数百人数百人之中其不敢希礼貌於其上者少矣谓数百之人皆贤皆可宾吾终不信而已矣事惟有此是以知其谬者常至於惻楚而形叹虽然叹而已矣欲遂矫而夺之夫岂容易哉不容易也则有不欲与不敢焉而已矣往年陈烈居南闽愤世途之浇薄则一切躬行三代之礼思以庶几革正然烈口一开步一迁而笑骂之声暴於风雨夫欲革正悠悠既乱之礼於卑贱已亢之後岂不殆哉古人有言千人所指无病而死今布衣塞满天下业以侥幸相师而为人上者又罕暇於察且择焉则屡叹之家非不欲与不敢而何所处某亦布衣之士於古今之变既幸知而叹矣而今者亦未能脱迹於郎中典谒之前岂所谓不敢者欤士惟无衣食之忧然後得以安行其可愿顾犹不欲戾衆以撩其怒今也饥寒相迫资文学以乞借於人而敢戾衆以自危乎哉故虽某之不敢亦郎中之所宜哀矜者也郎中以文学取富贵其声华势力足以表率衰俗其教令刑政足以弹治所临而犹降屈州侯之重以礼貌诸生其亦不欲靳靳於礼文已犯之日与是固某之所以望哀矜於左右也某少疏愚不善学既长更束於贫穷而尚从道德文章之後聊得所见亦冀乎有成郎中不与之进某固无所谤恨与之进某犹熟自知量伏惟高明下亮区区处之以非侥幸之徒亦已幸矣

请见蔡太守书

郎中合下古者谓泯泯无闻知者为民而於民之中命其问学才智足以事上者为士则士之为人品异乎衆矣方其取之也有俊造进之序及其任之也有中下之等阶而升之察而责之德益进而道益充则自士而为大夫自大夫而为卿为公贵於是乎尽极而实始於士且孰有轻而贱之者此周已前所以有治也世稍下衰而教非所教养非所养人各自谋而理有不循义有不由然後天下为士之名多违其实贤者羞与不肖伍而不肖亦诬贤者为不足用羞者未必显而诬者未必晦也於是混行杂居口舌沸腾而上之人始疑士而恶之矣此秦以来所以有乱也夫人才有所长短而事待贤而後济有识者所共知然士有见贵与见贱世有称治与称乱则亦岂特君师之过哉学为士者固有罪矣不足以为士而不肯为民已未有一二而治人以十百持此以干时且焉往而不露其底里底里露矣而犹窃借声彩觐幸际会嚣然銜耀与物相伤呜呼罪宜谁属也士之名既不足信则又变而谓之秀才盖指其有以过人者云尔而秀才之名益不足尽信波流坂降日滋久远至於近世则尝捉笔吟哦摹写文句者其自列於公府皆曰进士而题号於民间皆曰秀才高冠华服秦楚一概孰能辨之亦曰儒者人耳金有不离沙铁有不留矿夫何必审究姑听之而已矣万千百人各兼周汉之贤名而至不能免秦之所疑恶此其果有可辨哉有司按言而不暇详行则去取偶然而已邦君大夫之势可以详按言行反曰非我职也彼穷达有命而进退因有司固非我职也是故君师之任与学士之名俱丧其实虽有不丧者已如晓天之星宿矣日者郎中以仁厚端平镇抚此邦岁既再满而某不赘之身幸在照临之下可得参逐诸生尾末以望拜堂阶预闻议论以警补所阙然终未敢者岂专为异者哉单平特独无以杜混杂之诬则为士之实有时而未信於上况当不必审究之日纷纷造请於守将之门何所云补即勿往焉谁以为问此某贫贱之姓名所以重烦典谒也虽然以郎中贤德之所存过听之所受明察之所及固不俟终日而参观毕亮矣方又久以再岁之镇抚则郡邑之人才长短何以隐遁但今不事进退耳按言详行未必脱然无意也夫自治古而言之则不为臣不见诸侯非罪也自後世承俗而言之则衆皆先而一人独後有不免於訾矣因从俗而识邦君之面何憚而不为此某贫贱之姓名今日所以辄烦典谒也若夫宜为民宜为士名实之所应虽不敢望犹愿郎中诏执事以疑否而定赐见焉谨伏旌戟之前俟命

请见叶太守书

今之公卿大夫莫不接士而士有不愿於其间何也得非所接不在至诚而所蒙接者有不足以居为士之实乎闻之李唐以来布韦所以造请达官其事极卑其恭极至失已踵门不敢期必见得见则不敢数数往一言之酬唇齿之借更投文以称谢其屈如此然士不憚且未尝以为羞则贱有实而贵用诚故也遐方寒人徒步蓝缕以入京师久不过十年必因文字致成名遂享富贵惟其所有如何焉耳羈旅之卑恭终身之行志何憚而不为方今内之二府百执事外之牧守使副下至一命之吏率门有宾次承俟谨飭白衣朱紫羣行例进苟纳谒焉未有不得见者虽数数焉无拒也顾其相与无恳恻之诚则亦纷纷徒劳而已以儒自号而行不若市人谓之才俊而笔语比俚儿献诗书上名刺非其可则以为苦海万一仅似或曰安知不以假窃来乎其相位待如此所以有不愿於其间者也古之人以十室之邑为必有忠信而今郡国广大进士动至千百乃无鲁邦之一人哉自其在势者不加察择徒不吝於礼貌以收接士之誉而士之实否何以明之彼澹台灭明徐孺子司马相如王褒之徒亦幽鬱自怜而已矣郎中

以才学起家致官郎位据古侯伯之任既贵重矣适屈於此而治效余闲特有接士声名与之分庭抗礼者凡几十百人矣高明之鉴以为可用至诚待之者又几人耶母亦泛为位待以行谦厚之德乎伏惟盛心宜不止此某不佞耻为世俗之儒犬马之齿三十五矣盖尝愤叹士无以取信於人而虚伪相与拜跪往来非荣幸也故再三至京师经由郡国不啻十数未尝以名刺轻试於朱门诚恐其未必察择而徒劳取羞无穷期也今乃愿见郎中则岂无说夫以一郡之衆太守之尊而降屈於布韦诸生与之交际而其心耿耿患所得非其人亦羣士之耻矣辄不自匿试献杂体诗一卷於几席之前虽未足为述作之盛而可略观其实也或赐之见而有以照其不为假窃则岂独郎中不愧於鲁侯亦敝郡庶几十室之邑矣谨立旌戟之外俟命不胜惶悚

请见郑太守书

某昔在举場十许年间经见五守令乃至苟有位在此皆纳谒而造请非病谀也以为自此而得仕则资适如此无所可择也其後侵寻失所拟望而揣测衆情颇以无用见期而某亦年渐高心气日以衰耗自料不材诸诵读之伎不足复争则易冠裳濯笔砚而去耕於田野非病狂也以为求进不得则当退不足踌躇返顾於造请之纷纷也夫岁果时蔬人所日待而存养之过则滋味坚重不足以动人而狐豹狸犬一失退藏之计则不免人祸深其根善其实安其室则天之岁时地之山林守之以自然谁我訾者此不肖之所为远引固自处以世之忽忽必不吾比数者矣不谓邦君重位天屈以明公之贤而听采广远亦下及於寒微昨者南城令尹告以明公尝赐齿牙余论且有不过门之恨是以某伏谒戟前敬谢德颺而负薪有疾久未承稟内讼於田庐非朝夕而已夫以郡太守之尊一布衣之卑螻蛄丘山不足方其悬絶而叨蒙顾录良出虑表辞章贍语孤耿拙行何足以尘瀆长者门墙窃以浩渺九州二天在此两县瞻戴均受雨露久已三岁不为不幸今值明公解符有日而某鼎来愿一展敬虽不敢必犹俯伏以俟将命者进退焉

上知郡郎中书

某郡之诸生也贫贱而无能是以善穷穷久矣而性识所见尤忌憚於纷纷间尝有言以为天下有至乐独在乎无所於事使知履地之民皆知有喜於静而无妄於动则宰相可以常才居而百执有司遂得晏闲之趣盖古今之人间世所以多烦而少佚者正以不重於动故耳事未之无理而物常各有分安我之分而循乎理以对之使凡事先不在我焉则上自上而下自下何求之有哉道诚出此而有至於不得不动则亦可以逃名於妄耳矣日者郎中屈旌车於敝郡既成简肃仁明之政而又优礼於士人儒冠之徒莫不进拜堂皇望见舄履而不肖犹不欲焉岂特为异者哉以为分之所居适出於寒下殆不足以妄犯威尊则亦可以致妄於所安焉耳且夫守邦之贤侯有美於治术既足以胜称委注之任而布韦举子何事而必相勉率以行曲拳擎跽於其前耳夫曲拳擎跽岂亦果为贤太守之悦与四坊二县十六乡之人莫不安游定息各无纷扰之虑譬如黄童乳孺时值清夜虽有祆歌华烛之居亦且舒愉然默寐於姆褓之怀顾在布韦乃思反是即起以纷纷耶盖某之穷迹所以晚干典谒者凡欲以致鄙昧之见安寒下之分以庶几无所於事之乐如斯而已矣嗟夫事之变有出於不图而理不得以勿循

循而顺之则自然私欲有所不容意必者顷繇北归初寄食於县郭而谬为大夫所哀收而抚之谓必有成以至於掖借孜孜而郡佐诸门尝纳谒焉嘿而虑之已怪已之异昔而忠谋之友乃因是而见语以为今业不能专於伏藏孰若遂拜邦侯亦冀薪於教赐也天下之去取有所同有所不同其故在乎贤不贤者见知之间而已矣大夫州佐在邦侯之侧其相与乐交意亦甚渥而俱贤之闻蔚煜久矣大夫州佐常肯不弃庸讎知夫郎中之执事者亦不同取耶且果肯下教也耶是某之所以不自疑於妄动而有今日之来也谨书陋意以呈并自解其不敢为异焉伏惟矜察尘瀆尊严无任悚栗之至

请见韩签判书

寺丞合下今天下之所知者势而已矣其次乃以德论然莫如向势者之多也上自王公下至乎一命之吏权在则门如炽炭权去则门可张罗此不学而能不占而自现者也儒生学士平居放语非德胜已未有肯以一辞为人屈者比其行之则常谬戾视当时之事苟有毫发可冀则不暇顾其人之如何夫今独以衆人问焉何也青袍紫服旁午衢道朝与之接武夕与之聯鑣德虽若渊骞未急於致敬也明日移而据临庇之位则扬裾探謁废寢食而往虽有不为此者少矣某於天下终不能以衆人自许正由贫苦之故迹未有以愜其心虽然犹有所在也寺丞以文雅进身官已离选曹位已佐军麾今日之势虽未克称盛德然衆之钦戴既已悚肃公堂趋承客幄不虑无擎蹠之徒而某亦鳬鹜进焉寺丞苟不赐之矜察则某何人哉区区之私惟此之念谨先以告典谒轻犯清尘惭忤惭忤

卷十四

钦定四库全书

灌园集卷十四 宋 吕南公 撰书

请见蔡签判书

夫学士诸生所以安其素践而无意於人之知不知不屑於上下之交斯固足以得贤名於衆若夫莫倡莫从与事同波内不伤真而外不异俗则亦不失於能贤论二者之所趋可谓戾矣唯其所存皆不违於道夫是以安而不屑者足以立已而不害自爱本不异俗者足以行礼而不为自轻日者闻之常夷甫在汝陰闭户而静居郡邑之工僚非亟款其门则不忍出见而王深甫则异於是凡得位於汝陰之人无不纷纷而造请上自守侯下至樵征之吏适来则为之出郭以迎适去则为之出郭以送举以此为常两人者天下之所谓道德君子也而行身不必同如此且夫儒冠之徒苟为心迹所经不在於罪科则亦焉往而非其所宜然觀今世之人工造请者常蒙才具杰出之称而喜静居者或谓其无能而引分悲夫士人之出处固不免於悠悠之口欤盖尝观之天下之公论仍未可泯也自其存之不充是故有趣而人莫我信若乃弭乎盎然无所俟於外则其所以举而措之谁敢妄议虽然道德之君子不可以人人望其声华则日可贵而纷纷无能则日可贱皆事之宜然其尚何悲若某之不佞上未之配列於必贵而下不当自弃於已贱初缘冻馁之急不得即求其志於山田旷荡之中则亦投足於举場以近卑摧是虽未能异於俗而所以自爱者犹在故常愿立於常王之两间且安且同而无所苟焉事容已而已之所以庶几不屑事不容已则不强已所以致其行礼之心寄食以来盖六载矣贫贱之姓名虽不足以关士大夫之听采而郡县仁悯往往赐之哀矜每惟造请之非工重以劳善讥之口则迹在公门终非所宜顾在位多贤则汲引之公而草茅承值或有时耳伏惟合下才德兼茂取称於时寒晚诸生所宜归附而今者位望实佐军麾聪明发达粉社比邻将被福泽则一介之微虽未能贤犹不当以纷纷之後自嫌而不思进拜以谢穷乡之幸若夫哀矜汲引如亦在愿而何敢望哉谨布襟私小辱閤人以俟进退之命尘瀆清崇不任愧悚

请见曾签判书

寺丞合下书生以造请有位为事其承习旧矣其言无不曰敬慕贤人君子是故竭来不敢後然其心未必契口盖人不能皆贤不能皆不肖混同其衣饰九十其朋曹尽儒之造请者也魏之人官於赵犹不必遽谄其士人才品况又远而官於秦於蜀於楚於越其不必遽谄固可知矣其声迹地里初未尝谄而各以敬慕为言其来也则亦浮泛接之而已拜则答问则应去则送数数焉则谢此有位所以待书生而常杂以猜疑者也夫有位诚贤而敬慕亦皆诚贤则何至论此唯其有不肖而伪者在焉则其趋奉之心亦侥幸利泽而已矣而造请之徒自是日贱见贱矣乃後有知耻者不愿行焉而不知耻者阳阳莫自反也指其愿行者以詈之其人才则曰是其作傲其人不才则曰是其无能詈之不止而有位者愈形疎略矣夫以布衣而造请上官既非盛古之法方又遭承疎略其何足愿然为之者未尝不多则侥幸之风振荡故也某亦

此邦之书生盖尝承习於造请而亦不免於冒矣唯其颇知礼义之分是以安焉而不蘄避动焉而不忘悔顷以寺丞屈佐麾符蔚有贤闻则攀援随衆固宜不後乃及今日始往则亦不敢率然以取猜疑者也生长贵富而自将勤俭蘊负文学而坐占情伪此寺丞所以过人而衆所以不敢忘於敬慕何特不敏而敢忘之诚恐左右未赐察虑而待之以侥幸之流则得至坐隅非所光益而区区悔恨无自洗释也谨先有辞俟命屏外伏惟不吝指顾

为人请纳拜书

某闻天下之所以有道者以其事不违於义也君子之所以异於小人者以其由义而不俟乎教率也盖礼生於义而义出乎道则先王所为以义望君子而以礼约小人夫所谓天下之达尊者岂必为体道穷理之士言之贤有以过於人位有以临於下年有以先於己是虽寻常人莫不知为可敬孰谓身为学者而莫之知然则先王之所以言此为待教者发耳自世道衰天下之人或不明先王之意往往放一身而弗率弃一日而不用有国家者耻焉是故持之以刑小人而违礼则得祸於刑谓之君子而有不由乎义其自省也当如之何伏惟郎中清明端厚贤德已盛名在郎位列爵已崇年踰知命计齿已优维是三者自宜先敬於时而今日之职又居郡守之尊为之下者当如何而合义莫不致恭矣而某以縗麻之艰伏於室庐而获参於士人间虽望拜舄履然执事者犹守以谦未即听遂某心惧焉窃以当今仁人在上廊庙公卿皆命世魁杰方将修明道化以复治古而郎中承流在事当亦终顾匹夫乃过常之谦而必屈礼数以外一治部之鄙人万一闭拒不纳使某区区不得在义而遂列於待教率之小人谅非郎中之意伏惟俯顺卑欲赐之允纳且使先王之道一明於天下亦维贤执事之职岂特某哉谨叙诚辞蒲伏宾次冀所以命之

与王梦锡书

某?首城居搔冗故久不为乡友之问然时时谘访往来颇知体候清安用是自慰吾徒幸能以道谊相存当不於纸札之数疎遂分勤怠以不肖之奉倚在此固足下所宜加亮也近於季源处见梦锡新文一卷读之庄然敬爱不敢少损如对万乘圣君然至矣文之高也尝与季源言今同辈中求其识悟理趣如梦锡者为不少至於思致清拔每遣词设色即便过人未见有如梦锡也仆不敏而游文之日久凡尧舜以来作者之辞皆得占次其要知其所以立而所以得也譬如湖商海贾虽未必尽专天下之富而天下之珍奇怪伟无不熟其品致而中其光价者若梦锡之所出诚不易得也贵重贵重观古今文人所以论着气质不齐要唯才之高者则道益宜足彼才之卑者道虽不足无所訾议盖才卑则气弱气弱则辞蹇为文而出於蹇弱则理虽不失人罕喜读人不读矣则谁复料其持论哉梦锡才高仆是以区区矜裁愿慎将於道而一期於足适观义解神怪记所叙详悉掩卷而思之不敢遽以为无但就中而议则未免於諛诡昔人有记王辅嗣注易事者云结茅为人目以郑玄特因郑注之缪则挹之他日郑见形恚责辅嗣惧而毁茅人此言亦怪矣世间事变累累有出於怪者人常对之恬不为异至於文士叙述则动见检责韩退之作一罗池碑到今好事者以为诮陆希声志一梦於易尾学士指以为笑且罗池之事岂足惊耶希声之梦亦无足疑者令希声而不志梦则何害其易传之佳耶然世论终未肯如此以新记所叙过於罗池希声数倍此安能使人帖然无声自仆见梦锡此

文闻外便有籍籍之语间时以所虑对之则彼必见复云信如若论则当今善解孟子者莫如王介甫学者多称之若奈何不与介甫而独与梦锡耶天下之理未易以唇舌究正为梦锡计则姑毁此记未为害事盖以涉世而言则梦锡势位不幸未显故不欲从未显中得好怪之名於衆口使欧阳介甫而有此记人或议矣然守教者更云欧阳介甫必不以此流扬也人言可畏愿梦锡自思之今仆决劝梦锡毁之则已得罪於穷理之士不劝梦锡毁之则又得罪於守教之家劝与不劝仆俱得罪若梦锡则更在乎思与不思之间耳又观言道颂亦窃以为不必作何者道本不俟多言然後显也自孟子之後有荀有扬有王有韩四五子皆空言而已论天下之治平则汉文帝唐太宗两朝已耳时皆无孟荀扬王韩之贤而道化亦盛且四五子者固不幸无位於尔时乃涉寂寞但均不幸无位矣则孟子之言道不过於孔而扬子之言道亦不过於孟重叠焉而已矣孟子之言守仁义荀扬王韩亦何曾不守仁义哉故圣贤而不幸无位则重叠空言千百人与一二人无异也孔子之时儒教备矣虽经秦火犹不害於传盖教道之出乎人心非简牘多寡所能轩轻吾尝以为四五子者有之适无害耳如使絶然不生与有扬无孟有孟无荀皆自不害且孔子之言具在宁俟余人乃可明乎今梦锡所颂乃如此仆固不敢从同也衆人方駭颂序所说以为太怪此亦仆所不敢同者以经教所言多有推天援神事且求当时之迹亦安有与上帝授受者天乃锡王勇智帝谓文王文王陟降在帝左右此岂与之接足乎退之称李杜诗亦有天公呼六丁之语盖文之奇变或用此仆不敢从衆以此怪梦锡也饶处士墓铭云时节宴集必以文甥坐衆宾之上此言适足以彰处士之失德世道自有尊卑疎戚之序安可因文以乱之若处士有婿如退之则当为之执鞭结轡乎恐梦锡俊於文而不暇思此也茨亭记理意最佳而率用佛经中语此亦似过当仆尝爱元微之镌经记云佛教之言僧当为我说我不当为僧言也此段尤精不知梦锡取之否世之文盖有用佛语者要之不足比数则无用谁何梦锡宁自弃於此乎仆於梦锡相知最晚然一再观文遽有论请盖主於敬爱之深而不敢以面朋相处且使梦锡才气寻常则某何帛哉今世之人未必皆知梦锡之文正亦悚听於知者奉称而已至於叙述一有未安处便陰哈而嘿议此固不能伤梦锡之贤但亦不欲及此与季源商略梦锡文义亦与仆言不异梦锡即不信仆应信季源矣思之思之秋初爽气苦严早夜定辄清冷东平斋馆虚旷文学有余乐更希将重书不宣怀

与张户曹论处置保甲书

某再拜三五日来野人争传景倩奉符文体访保甲利病於诸乡区区闻之不觉謹快窃以官所行有未免於民之怪者至於再攻而尚在也今乃遭承景倩临之庶几息且已乎请为景倩言其故凡今保甲之病有二一曰离之合之未适其愿二曰使之责之未出於忧此皆不可不察也大约今之居民客户多而主户少所谓主户者又有差等之辨税额所占至百十千数千者主户也而百钱十钱之所占者亦为主户此其力岂同哉力不同也而例聯之责以知觉应援则百钱十钱者忧矣又使之承受县之期会诸文凡异时耆壮之职分皆移於邻伍之家矣此其所忧宁有免日夫所忧者非力厚之家也正在百钱十钱之家耳百钱十钱之家名为主户而其实则不及客户何者所占之地非能给其衣食而所养常倚於营求又有两税之徭此其所以不如客户今乃有一句之间再诣县者有两旬之间三诣县者然则营求之力夺矣其家不得其人营求则既坐蒙饥渴而其人则方以期会不整得挾刑於官而归然则诣县不及营求而得挾刑以归卧又不能此百钱十钱之户所忧也而客户之忧又其最重何者客户之

智非能营求也能输气力为主户耕凿而已则其一日不任事其腹必空而况使之与主户共分一旬再旬之忧乎此正所谓使之责之未出於忧者也今之民居无常定也有团落之间杂数十百家者有五里三里寂无一家者有东西相望而阻以山川者有悬絶之聚止於三两家者此皆户名着在官书而其远近疎密则官所不能知也知之者其里之长正而已今不以责长正而使胥徒坐庑下按籍而列之盖胥徒能以主客户参杂耳安能识其所比而聯之是以一版之民有相隣而属异者有极远而属同者皆按籍遥点之效也夫所以为之保甲者为欲其有事则相知觉应援也今乃割近以附远引异而配同其能有及乎西邻有急而东隣坐听也问之则曰我版属异矣而使其遥遥者来来何益哉南北亦然此所谓离之合之未适其愿者也维此二病其原非自一司也县稟州州稟台台稟大农大农稟政府然则其民之或病汪洋於荒村僻里之间岂今体访所能治之但恤急而计则使责之病虽出於轮差之文而可以稍至於简离合之病虽出于客主相参之文而可以稍至於便此则体访者之能治也夫保之之法长正专领其聯比而官直明其督责则民以所愿合而便矣虽主户少客户多然束於不相参不得已之势许其私意之相与则纵有差远亦愈於按籍遥点矣此所谓稍至於便者也村耆之役犹未除去而新条所列亦谓伍中自有事起则责其关白耳岂必以越某伍越某伍而期会他事哉诚能不责其越伍抚事则所谓稍至於简者也幸今无事民无凶荒兵革之患而保甲法行数月间民且怪而忧之仁人君子幸当其任可不悯欤悯之斯救之矣救之之术非使之稍入简便而何为乎或人以为长正专事则患在俶扰此又非照情之论也凡人所以不爱其身者皆衣食不聊生之人也彼保之长正衆户之豪贗产可恋宗姻可怜其爱身之尤者也平日小民犯分於觴酒肉睡眦之际而臀肤屡破然不顾者自以虽死无所睠惜故也若蓄利之民则鲜有视刑诛如无有者矣方其有所不免则厚赂以求人其心岂不吝财哉爱其身而已矣今为长正助役之不免耆长亦为之而坐因税额之强辄得无穷奉官之勤其见歉矣上有明宪一陷其科则小徒大黥彼何苦而不避也此固情之易照者已往者某自洪来过郡下而季源法曹颇以輿言未利为说当是时季源被符将以体访故也而某亦欲吾民之勿怪而思有以忠告之盖自东出邑门行百三十里历四乡境土而後至吾山而住山中又以六七旬而所得于輿言者未有不病此也季源虽以家祸去官而景倩实来岂天使吾民之怪遂息於此乎以景倩之仁明宜已尽察此等而某犹尔云云者顺野人之所望也伏惟加之览而亮焉

又书

前辱黎滩回示以所议保甲事为未尽知新法之意景倩以此语处我非不可以受也但详景倩所以发语之由则犹可以勿受何者景倩亦未尽知吾意故也夫聯邻伍为保甲以检责奸偷讥诃逋逃此熙宁以前县大夫间亦行之而民间晓此甚熟矣何有今日旷然大变吾君吾相之盛心推徧海内而书生犹不知乎盖奉行新法者有所未当时措之宜则弊所以形弊形则民之所以怪且忧景倩以使责未出忧离合未适愿谓皆法之所无此何言耶使法而有此则何以谓之法也法无之而行法则不免有之景倩岂独不闻且见欤前奉论之时县所下期会诸文月数十於保正所而耆长所受或十余而已盖保正虽豪而其职则总统衆长其受符於县则退而关付於衆长衆长又轮转而付之其属户此官所许者也而且越乡跨里责其办事事未必办则官不得无惩艾之威此民瞽所以流丹相照也某岂妄议哉嘉佑末年今河北

都运吴公为南城亦行保甲矣联二十家隶一长而不问主客户取於比近势足以相及而已当是时领事者唯在耆壮而不闻有扰民之患盖唯不委耆壮而屡以官临乃所以致民之扰也彼以为平昔聯保甲官未尝临而今则临之此其不止於检责奸偷讥诃逋逃必将有以勤我者其所以扰也而况不能无离合不适愿之怪乎今保甲所在有相去十里者甚者至十五里有隔山阻水有异保殊坊者而并居一聚之民则都大析碎宜合此而反附彼者矣某岂妄议哉景倩以为上官谆谆开其申愬有未适愿则为改正此非某不知也使官不许又不改正絶无纷扰之忧则官犹不失为烦民犹不失为勤况乃胥吏检治陰求微索情所不免保无忧耶视今悬远必愬之户率百改其四五十而後可耳然则上烦下勤其有遽尽之日哉夫民知远虑者寡矣是以未遭急故则未暇愬其离合之非便若知思者则遽愬其然耳然则今之未愬者非不愬也愬在後日而已景倩岂不念此盖为政而不执其要未有能善者也今怀未必敢之疑而使民必愬无已岂要也哉某虽在山乡然非日无野人交论者顷以季源诚托故因行而问知其说既未及告而季源去窃以爱人利物君子之事而景倩君子之英幸当体访之责足以使民已其所怪故不嫌屡渎而私以书焉诚欲裕民恩力出於景倩车马之下焉耳景倩乃云然吾岂风波之徒哉景倩处我过矣数旬以来县不下期会文於保正所衆户由此泰定皆以幸脱丹臀相庆若改正一事官更垂意则受赐因吾景倩岂曰小补如之何如之何

卷十五

<集部,别集类,北宋建隆至靖康,灌园集>

钦定四库全书

灌园集卷十五 宋 吕南公 撰书

上曾龙图书

知府学士合下某南城之东野寒人少时自虑其智力蹇薄不足以参农商工技下风故妄意於文学盖十五而读书二十而思义以为文者言词之大美以天地之化四时之运人物之成世古今之无穷其间变故显幽治乱盛衰贤愚劝戒一切藉文而後经远其所关系如此虽古之人处之以力行之余事然观书契以来特立之士未有不善於文者也士无志於立则已必有志焉则文何可以卑浅所见既尔故自唐虞至於近代经子史集说解志载闻无不求得无不读若是者数年於是探索短长补缀同异隐以心灵之所明尝奋笔而书之所获多矣犹未敢遽以为至也益取古之作者所成反复熟烂之期於合似而止盖年三十余矣其所造诣粗若有就而遭值时变当路者以能文为贱工方且推崇马融王肃许慎之事业以风塲屋而剽章掠句补拆临摹之艺蕩然大行以韩柳之显传宜已不可掩然而後生脱略往往轻之况於未显传者其何以露锋而出彩君子之道有得於中则外之贵贱无以损益於我也则某於今岂有所歉而若有焉何也窃以自古文学之兴其人之所出隆污不一然其必有合比也有大过人者立乎世则相望而宗师之孔孟之门是已世无大过人者犹有以致交游之乐建安七子梁府十友与夫兰台之聚乌衣之游是已近观李唐文?盛於元和而退之所与一时文士毕在相讎之地若张籍欧阳行周东南之羈人贾岛刘义朔北之异类而皆收拾引掖使至有闻而况势迹之亲者士患无所有而已不患无所依归惟此时为然国朝文先有柳仲涂倡率吹嘘预其曹者各有声实庆历以後有欧阳永叔而合下为之流亚海内诸生出入门墙倚赖辉泽者凡不知其几人矣夫生而知学与学而有文皆离伦之效以某之不敏亦何敢以此自张然方之今昔得所合比之徒以不辱其後生今乃孤行独息若无所容则其所以有歉欤仲涂欧阳闻而知之者也惟合下之命世可以见而知之而攀援仰望又幸有今日之密迹此其所以愿於纳谒也夫中国之有江西而江西之有洪府其位任亦重矣人莫不知趋重位希贵势而某十年之间七八过洪未尝纳谒於府门非不能也则今日之愿拜光仪不为省合之官牧伯之权而来也伏惟赐亮谨献杂文一卷幸垂览焉

答李讲师书

前辱见过又示以周易余义五十篇翻读竟帙欣喜不能自停老丈之得志於经功效固自不浅以某之不肖智识谬陋何足以快睛睫於此耶多幸多幸某於易尝学之矣而未始先於求言言之不敢先求则所以学者特岌岌乎师心而已矣盖尝以为使天下而世有圣人则易虽不作乃无不可使天下而世多贤人则易之传解复谁倚赖何者道可以心行故也今惟世数

不幸每希乏於圣贤而学诸生又动拘率而按道於文字之间宜其易惑而难通也奈何世而无经学而无传斯不可已且夫道非出於圣人也盖其用亦明於圣人耳是故资道以作经资道以作经於圣人乎何有而纷纷之徒乃欲拜经以为道母此其所以駭眙於经之所言欤孔孟以前学者不务传经以见道鲜至於疑惑由汉以後传经之士相望而道益不明岂其经不可以传耶有心不师而无言不疑故亦自困於狂而已矣何由见道夫道之所以为易也以无为本而经之所以为易则文有以助於无道一而言之二焉岂得已哉修乎教而已矣然而未始不一也起意於先而立言於有是非一耶得意於言而忘意於道是非一耶人能知夫一之二而二之一则是不足以明之又况於駭眙乎其言哉唯夫知此者寡是故苟有以知之则宜蒙敬慕昔者某尝读汉以来衆家传易之书矣方读之时或笑其狂或怒其恣或悲其暗及其久矣则遂以为不足烦吾笑怒与悲焉因辄忘之乃中心所以敬慕而有加无损者王韩氏而止耳为其能知一之二而二之一故也他人未及知此则虽千百其徒何能为易之轩轾乎听其自暗自狂自恣可也故天下业不可以无经则衆家之书作与不作存与不存皆不足论若王韩氏则不可容易视之读王韩氏书而尚不悟易则终不足以学易矣易且不足与学其又可与行道欤观余义之所申知老丈之所以设心展才当亦为此方之衆家有不愧处至於未免排斥王韩则为难允老丈岂欲求异於经家耶将以行道而废经则异不必求也又世所传子夏学者亦尝读之盖借名甚高而持论特卑者疑其汉儒诈托果诚出於卜氏则不已辱孔门哉彼穎达则唇舌家之役徒耳何足参涉然余义所非往往并及若輩如令譬拟於王韩似亦不伦也成人与成人谈於堂上而先生或未是之即駭孺子戲於堂下而謬言焉又何足怪愿老丈尝试察之

与饶元礼论史书

借示十国志已略读终篇此苟作之书也得在元礼藏中何其优幸试为左右说其不足收之略盖史之作以才过人为主其法必合於春秋然後当司马迁为史不甚合春秋然而号称最良者其才高也班固之才不及迁而措置谨密则过之故亦配迁流传范曄以下卑乎陋矣陈壽以史为志论者或谓之善以余观之犹为未尽何者三国皆汉盗而曹操先篡无以服人心是以袁刘诸人睚眦竞起其事与战国无异不当以秦为宣传周也况曹氏威强比秦不侔远甚然则壽以史为志者犹言三国不足以优劣姑并记其事云尔虽然壽何知春秋之法哉春秋虽据鲁为内而尊王之外未尝谓诸国为盗贼亦书某师某人而已壽以魏为纪吴蜀则不为纪而其次第则以建号之先後列之虽不类据鲁为内之体然犹无害至叙魏事则往往名权备又书吴贼蜀寇此无谓也若以曹氏为宣传汉则是王莽亦无罪乎春秋之意壽固不足以知之且其才又弱则其为书不尽善也固宜李延壽为北史各自标建无姓名贼寇之误其叙事才致亦优於壽此粗可也魏徵刘昫之徒皆壽之罪人日者唐书遭会欧阳诸公商略法度其措置文采遂与班马争路可见吾宋文学之盛高映累古矣前年初读薛居正五代史病其有刘昫之谬思见欧阳公所修书而无由得不知永叔如何处五代之乱也大概十国之事皆如孙权刘备而五代则曹操司马懿耳但汉末天下为三故吴蜀之势视魏为弱魏力固胜吴蜀也唐末以天下为十则五代之力弱於魏而十国之弱又可知故力足则与汴洛相持淮南两川是也力不足则伪辞聘贡广南闽越是也力最不足则苟占地利借臣幸活荆潭是也吾以为使孔子记此书不过以五代为鲁耳必不谓十国为盗也盖曹操之谋篡也非不欲速

也以其天下未易服故隐忍而俟之若当时无吴蜀袁刘则建安以後无汉历矣然则吴蜀非愿盗汉因魏之篡而自度不能臣事之故不获已而成国也十国之乱何以异之黄巢之後唐力不振而朱温首怀曹魏之心何嫌英雄不服乎盖如桓玄侯景安史勋巢然後谓之盗十国岂类此乎永叔书未可见然使不能辨此则未免不合於春秋鄙哉十国之苟作也其文不及居正其标建不及陈壽扶惫强行而已矣书此国之事则皆知称我而其君则姓名之又以盗贼名彼国至於书彼国则又以盗贼名此国此嚙?背憎之人耳司马迁所谓世家者谓其诸传世有家也其体与近世实録同今为十国世家又为列传此何等法盖十二诸侯有因上世得封者有因中世乱而盗国者方其称公亦书公称王亦书王称帝亦书帝所以不没其实与春秋所书诸侯皆称公同意然春秋生不名唯死一名之葬复称公此孔子之深旨司马迁於世家名次其爵盖春秋有传世家无外传不得不然今乃题某地某人世家而首尾则又姓名其人甚矣其无识也彼既建号改年庙祖宗陵坟墓矣而犹谓之衆民乎若以其乱可贬则春秋战国非不乱孔子司马迁非不知贬也其余措置文采一无所取而世或传之疑好事者欲见事迹故尔虽然此书事迹盖略矣尝以吴録江南録江南别録江南野録等书校此吴蜀二志可见其略天下大定録固略然此书往往遗其所载今新唐书杨行密传最有功凡行密之善可道者毕载於篇中又於京师见永叔所作钱鏐传亦甚核详盖永叔多收野史记传而去取从容也但不知永叔书尽载十国君臣事迹果否不尽载则又未免阙遗矣春秋之法要当一肆吾力但犹俟尽见永叔书乃为之吾能论其措置不疑其文采也元礼博学好书且广收藏异日不怠则修选之功当靖共之自今可访索十国野史记传庶几获广记备言之益此外未须议某不日南行矣经过当面见驰此故不宣悉幸察幸察

啓

上知县啓

伏以执事才刃优长而屈於一邑一邑之人情物宜固已无所不照若乃原田之沃?闾比之蕃耗陂泽之涸盈山林之童茂工之良窳商之通滞农之勤惰士之贤不肖皆莫逃於政术之中而某之事业实在辞学下风谓之贤则或不足谓之不肖则太妄盖亦执事之所有以处之矣夫未仕而交际於诸侯非盛古之礼意然而世变已久则违衆不足以为高也视今无事於造请之人唯不能学与未尝学而杜门者或愿之耳而某区区之姓名犹未免於举子科防则非杜门之时也非其时而不見其所可见则旁口将傲慢之相伤是故不得不畏虽然使某必进执事之门乎徒上谒则庸衆常为之徒贄书则怀假倩之疑畏傲慢之谤而得纷纷之疑益非善计故当少露文业以致夫贤不肖之情状谨献杂体诗文一篇虽未足以究平生之所长然而细流土壤可占其高深之万一伏惟探赜余闲尝赐披览亦以验其非偶然而前者也

代人上知府待制啓

伏审知府待制抗章天陛得郡海滨辞南昌之要藩就东牟之外地有将相之业而不谋事任当风云之会而乐处寛闲此盛德之难攀维羣心之所服恭以知府待制懿文经国鸿藻揆天温温大德之基慥慥中庸之器早轩翔於册府实表映於书林献可纳言简在之心屡沃出藩

入侍具瞻之望良高仁宗以獎拔未终今圣以知闻亟委魏舒领?上目送以为荣和峤栋梁衆神伏而咸待一昨镇临遐徼安集殊氓垂全文武之勲俄被均劳之命盖许国虽坚於志而成功亦在於天矧眷注之方隆竚登延之非晚岂繫千里能滞真贤仰祈抚字之余茂养保调之福某钦风有日拜德无阶侧聆旌戟之临遥深桑梓之庆限紆铜墨阻侍堂皇卑情无任悚息依归之至

为人谢举知啓

学者入官所以行道於世君子荐士所以报上之恩盖将成天下之公非止遂匹夫之获惟其事出而弊见故有名丰而实凶求之者无慎终如始之思引之者有深情厚貌之患贤若葛亮而亏明於马谡勇若魏勃而取诮於灌婴岂徒乖立事之奉期又以起称人之深戒大者有是下焉可知尝观艰棘於来今固已倍蓰於治古夫合衆人之性行而责在上之毕照用此日之保任而定终身之不愆熟而思之既自难矣而况员以岁限例将法?顾惟所借之私信乃不轻之务向非富有於德业何足承蒙於品题以某甚愚於人不逮幼为待试之末艺晚得徒劳之小官方兹效莅职之勤詎敢望当途之援不虞遭值亦预褒扬此盖伏遇运判明公岂弟存心寬平遇物深为国简才之念切视人如己之思茂惟采菲之仁曲成推轂之赐敢不凌兢教意循服官箴庶几尺寸之长不负高明之举

为人谢举知啓

君子所谨莫大乎进身人臣之能尤见於知士士未尝无而知或不至身孰不爱而进或非夫惟难能所以发则哲之慚而不谨亦以取自轻之累贤者之论由是观大臣之远近先王之治所以考硕德之伪真盖义命未尽则穷达易迷其初志尚不齐则赏拔各从其类究观世道之既薄鲜见抡才之克明惟自逞其私心遂不符乎公议言行由是而相戾抑扬以此而多虚以宗元之俊而诤诮於叔文以房琯之器而销声於刘秩故獎鉴之得失系亏全之始终深惟古今何间上下若某之鄙趋时实疎偶从禄仕之下风叨?刑书之末局依明公之敏政惧不肖之瘵官蚤暮凌兢忧未逃於责察智能寡拙敢非望於提携熟知天幸之来辄预幕僚之举以几旷之职而免简书之悚畏以最下之才而荷贤德之甄收恩辉甚洪物议更骇嘿循涯分岂乏阶缘此盖伏遇知郡郎中乐易存心寬平待下不以己长而弃人之短不以己备而责人之周譬如匠石之於山岂刊焚於朴 亦类冶师之於器各顺任其埏熔故使孱顽亦邀题饰敢不激昂学植只服官箴使高明无过举之讥而愚陋近立身之域

卷十六

钦定四库全书

灌园集卷十六 宋 吕南公 撰传

重修韩退之传

韩愈字退之邓州南阳人三岁而孤养于从兄嫂自知读书日记数千言二十五登进士第再试博学宏词不中三上宰相书激昂无所合郑余庆颇称之稍渐有闻董晋镇汴州辟为推官晋卒又为徐州张建封推官一府言其鲠亮岁余入补四门博士俄迁监察御史上疏论宰相不专机务天旱人饥官不矜恤宫市罔民德宗怒贬连州阳山令东南学士多往师之顺宗即位大赦移江陵法曹元和元年召为国子博士分司东都三岁为真改都官员外郎历河南令迁职方以使事过华州会刺史赵昌劾奏华陰令柳涧前坐法为刺史阎济美请停任未报而济美罢涧教民遮济美索军顿役钱为挟怨逞私谪涧房州司马愈上疏言昌济美刺史相党宜有辨白诏遣御史李宗爽即讯得涧贓状以闻再贬涧封溪尉愈坐是复为博士自以才高屡蒙摈绌作进学解以叹其穷宰相见而怜之以为比部郎中史馆修撰转考功知制诰进中书舍人言事者指愈在江陵日譖事节度使裴均均子鐔无状愈为文而饯之是时宰相方与中丞裴度计议伐蔡不同而愈尝献计於朝稍与度合於是用誉鐔事罢愈为太子右庶子及度宣慰淮西奏愈行军司马愈请先走汴说韩弘协力蔡平迁愈刑部侍郎十四年诏使迎佛骨至自凤翔留禁中三日乃送诸寺王公以下奔赴顶谒争委珍货至灼体肤以为供养愈恶之上疏历陈黄帝至周穆王十三君壽高者余百岁少亦七八十天下未有佛也自汉明世有佛而人君壽数益促唯梁武在位四十八年年八十而国乱身饥死不足依循请以所迎付之焚溺疏入宪宗大怒欲置之死裴度崔羣言愈诚狂讪然究其心实忠款宜蒙寬貸时百官多为愈请虽戚里诸贵亦以为言乃贬潮州刺史到官上表陈谢痛自咎责恐老死瘴海不得重望阙廷无以罄竭平生所善文辞以述太平功绩昭示无穷宪宗覽表语宰相愈固爱君惟犯易耳皇甫鎛忌愈介直遽言愈狂疎且当稍移乃授袁州刺史明年召拜国子祭酒转兵部侍郎镇州之乱牛元翼被围诏愈宣抚衆为危之既行穆宗亦悔追诏许愈度事从宜毋必入王廷奏闻愈至严兵以待谢曰适为纷纭诸甲卒尔愈大言曰天子以公有雄材故以节授公何意乃与贼反耶奋而应者曰先太师击朱滔血衣犹在此军何负朝廷而以贼见名愈曰汝乃记太师乎当知安祿山史思明李希烈等家各有世食已乎田公以魏博六州归朝廷官中书令父子旄节刘悟李佑皆大镇汝等闻之矣曰田公刻故此军不安愈曰然汝等已害之又残其家复何道衆稍謹廷奏虑其变麾使去因谓愈曰今欲廷奏何如愈曰神策将如元翼者不少但朝廷顾大体不可弃而公久围之何也廷奏请即出之会元翼突围去遂不追愈还奏穆宗大悦转愈吏部侍郎李逢吉欲逐李绅以愈绅俱褊忿可激乃除绅中丞而荐愈为京兆尹兼御史大夫特诏勿台参绅果奏论与愈交刺有诏两罢愈为兵部侍郎绅观察江西辞见泣诉得留愈亦复为吏部长庆四年八月以疾免十二月卒年五十七赠礼部尚书谥曰文有集四十卷愈善与人交不以穷達易情最喜延誉朋类专容其短後进经愈指授往往成名存抚内外孤遗始终一意其为文自视司马相如太史公刘向扬雄不録班固已下而世不敢不服

也愈在潮州闻其俗苦恶溪鳄鱼食人畜无艺乃投羊豕以文告约三日不远徙即以劲弓毒矢从事是夕风雷起溪中鱼徙六十里自此溪涸民无患以为愈诚格所致

论曰东汉至于元和学士辞章日以衰落敷宣叙述仅就而已只字适安篇句偶全世以文士许之矣唯愈畅達雄浑峻丽严明肆之不踰约之不迫脱去凡近且趋作者之奥落笔擅美出口同书下视秦汉以来俨无愧色虽或裸出嘲笑而其归致犹与荀况相如并驾方轨後世虽有追踵愈不可过也盛哉文乎人不称於耕耨而名农不善於通贸而名商妇人?子知其忝冒可羞至於文不足乎言独非学士之羞欤愈文盖高亦免羞而已矣惟其未免者衆故可贵使愈当诗书之代其能独步乎哉昔者水土失序大禹平之同宅涂陂迹在羣目功不待赞而孟軻好辯排墨辟杨愈以为功与禹侔夫行之与言难易孰若水害去矣而为我兼爱之风千载煽荡天下偃靡然则愈之区区攘斥佛老思以追踪孟氏其气则强其功烈异於禹亦明矣唐之人前乎愈则傅奕果於言後乎愈则李德裕果於行其於佛氏未有以摇而药之世不咨傅奕李德裕而愈之推则组染胜者帛价闻故也愈之於学明仁义以守教者也议不出入故醇文不袭蹈故高夫如是足以为愈今之论者乃曰愈不知道德然则必若柳宗元刘禹锡涉略元幻乃为知道德欤愈文既多固无不工者其间有补典训如丰陵行谢自然诗季千墓志诔辯师说丧服议等书皆人伦之药石也

元佑初内相陈公绛谪守建昌尝病新旧唐史载韩退之列传一意褒拂颇乏抑扬因属灌园先生稍加笔削将以闻于上先生承命芟夷曼衍着为确论果出二书意表内相覽之击节称赏函以副呈文昭曾公肇文昭亦歆?叹美复援紫微兄巩之言谓吾乡姑山之秀宜世不乏人惜乎乙夜之观未達而陈公被命易守灌园随亦弃世故前此板行灌园集偶遗此文今得善本於其子郁家用刻于集终以广其传绍兴癸酉冬十月既望天台奉祠蔡延世谨题

孙甫传

甫博学强记最熟唐书准荀悦譔唐记三十篇衆咨其该要范仲淹荐甫可任馆殿遂为校理久之鬱鬱不适白宰相求外官文彦博少时师事甫於是参知政事为甫从容言朝廷待君异常流幸少安之俄用为三司副使甫对彦博吁怅曰朝廷见待不同乃以此耶吾宜去矣愿知陕州彦博曰学士资望出人陕何足得但外戚有先求此郡者政府已可之矣甫曰政甫固以吾为不若外戚乎何必陕哉取次一麾吾去矣得邓州而行范仲淹守杭甫为二浙转运使仲淹礼貌殊厚甫每不快谓人曰希文为不知甫则尝荐甫於上矣希文而知甫则樽酒道旧必使俗物参同非美意也尝至仲淹书合见其亲为尺牋甚多甫曰何事於此仲淹曰畴昔单平游分今日不欲弃絶且礼无不酬故尔牵勉甫曰已矣公知不忘南都教授时交际情地则足矣自公官達则相於者皆佞人挟诈图私何足报复论者以仲淹甫语皆得理诣甫为人清率平居对客纵论忘景晷之迁屡掀幞头搔其痒发松然被面不加修正也陈绎为西京留守推官过甫叙别甫欣然接膝自酉及子语才罢乃谢曰家人病无能具酒者谓君非餽啜徒亦不自歉也天明不设饭自録小诗送行而已彦博既显甫常少之与人语及必引袖掩面曰天下可羞谁若文十四者乎遭时得君其景迹乃尔辱吾道甚矣嘉佑二年甫卒官止兵部员外郎

赞曰德尚容而心戒褊修性之通义也然容之敝常以和易至乎卑污而褊者虽难与并为要之不违乎清直故君子之道不幸而不足则与其污也宁褊何可忽哉陈绎曰庆历时文学士如甫者多矣至於允蹈耿耿不肯毫髮苟合於世未见如甫者也

颂

静惠处士祠前芝草颂【并引】

万物一气而无丑好昔人之论盖已至高必该徧而说之则物与人俱育於覆载中间而後事生焉则美恶存乎事存乎人而物每因之岂偶然哉古书瑞应何限互出所见以为说唯君子为能考之以其时与其人故无迂蔽之失也跽跽乎尧庭师师乎鲁郊按此足以知麟凤乎非邪宋元丰元年邛州静惠李处士祠前紫芝生於盘石上大如双笠蜀人嗟异以为高洁之应故绘图而传之五年传至江西建昌之东野人实寓目焉想绎徘徊曰果哉说之可矣夫厚而升气以为和者土也而静为之德石者土之英其质磐则安乎静之至也毓乎秀而不可必致者芝也其事似夫贤人其味泽足以养人则似德惠今芝生不于土而于石则洁其本而远离尘杂者也处士之贤不系乎芝之有无而适有之所谓因之也余故说之如此所谓考之也盖贤非处士则芝虽大於车盖秀乎千仞之冢其孰能美之处士之心迹宜有史氏为之述今芝有图则其曾孙宣义君文能志之野人方为之颂焉所以勤勤於说释贤德也颂曰

有伟其英自天发之孰被孰嗟于此贞石载耀彩泽延昌秀本用晦之章协矣其祥子孙维显扬之

钱邓州不烧楮镪颂

呜呼士诚知修耶内不欺诸已外不欺诸人可谓修己已呜呼士诚有立耶上不愧於天下不忤於地中不负於神可谓士君子已凡唯知修至於可立而不欺不愧者其备如此虽天地神明我斯天地神明已岂又恤恤於诸余哉世衰道隐士心险惑稔匿自危则区区於祸福以壮其毒闻古之用币以礼神祇後之罪士为多则假之以请祷禳祈假之不已则翻楮代焉而弗支是故罪者满世而莫救其非肃肃邓州唯道之繇识超超於衆?行不徇於时流孰巫祝之足因而禱祥之苟求盖清修而不媿则万福之来酬是何楮镪之不然而名位之优优呜呼岂弟君子求福不回谁其嗣之宋有人猗

赞

庐陵徐俊和画像赞【并引】

庐陵徐俊和巡检于南城之石陂元丰四年秋九月秩满其所部百卒谋曰异时我徒室半空官来为我节廩赐使有以娶月受米蓝田运费常十二官为我请于台得寨有仓是皆无穷之利若夫训治兵武至不以机肉临敌又义之明明者也官今去我不能借而留之盍图像以慰

永远之思乎皆曰然遂图之又告其寨南十里之灌园人曰独不能遗我以文题而赞之乎灌园人曰可无汝拒为其辞曰

吾谁之归维父母之裕兮曷日忘之时丹青之顾兮

宾卑聚赞【并序】

文信侯书称齐庄公时有宾卑聚者少好勇以不辱自居年六十无所挫挠一夕梦壮子叱已而唾之面惕然寤焉终夜坐不自快明日召其友物色衣冠而索於衢将以报也立三日不得因退自歿云吕某曰诋辱之於人甚矣哉大人才士有不能违者岂其知违之不易欤将事物之既交则势不容追欤今横目之民举知虑此然虑而能违违而能必者几何至於必而能常者又其难也哉是何壮子多而卑聚之少也余悲世之人动近于辱而辱亦自甘也求一日之莫我辱且犹不能况五六十年乎幸白昼之莫我犯且犹不能况宵寐乎意名节之渐衰实本于此思古之人有可以矫激而得卑聚焉作赞以揭之赞曰

谊重於身君子或亏一毫不挫通者难之耿耿宾公白首不曲生乃可舍梦不可辱谁能接物不困于机正昼之强暮夜之羸吾贤宾公气节之师

铭

东斋六铭【并序】

某来枞阳枞阳之大夫埽斋於厅事之东以馆之日给之食又借之书以养焉斋之东北有室室纵二筵横半之某居其中偃然与文字起居不知此世之多淫堂僭厦也室有窗窗之右有户户外之左有方池方池之前周而限之者土垣土垣之外林之老高流之穹紫萧然漻然皤岩野者某时厌坐卧则挽旧编循池依垣以步耳目垣外之虚旷亦自宜也旧常多感感之积无以纾发则惧夫抑且蔽也少纾之为窗户池垣四铭又为书篋酒壶铭皆以自警也某曰铭之作吾不忍效昔人捕影迹以图附其说至於沾腴事伪苟耀文笔者吾又免之若斯六铭其可了然无媿也已

牕铭

有明勿恃有隙勿啓资尔天日保尔虚室朴而棖素而幪不流于华不荡于空映书映文通乎晓昏尔明可尊

户铭

阖足以晦辟足以明若枢若扃顺而勿情呜呼得汝由而非罪疾也者非户之祥也耶

方池铭

池如之何去流取定方如之何去圆取正胡能不盈有岸斯广胡能不竭有源斯养维风及雨或激其平尔龟尔鱼勿污其清事常感人人感或蔽勒铭池傍以辅吾志

垣铭

表母甚高以蔽余见质母不厚以亏余限中亡失宜孰踰孰窥中亡易言尔奚属斯咨尔垣兮其安其支

书篋铭

岂无弊囊伤於束勒亦有高架尘蠹侵食猗斯篋兮方而有容不华於外以完其中行可以携坐可以隐君子之器用无不顺容不在多贵於能達蓄不在固利於频发不发不達伊篋之孽

酒壶铭

富而分人贈愁以喜贫而居中立亦不倚能分能立其象君子杖头之钱方外之宾交招世逸莞掇天真作熙作淳资汝蒸人何千万春

举业囊铭【有序】

余来桐乡之明年当有司请贡士之春同居争治举场事业时以率余余不得免也稍强为之置囊壁间以积其文暇日又题囊腹为铭以自悲其辞曰

孰干我才以乱吾学薰冗绮丽成此脆恶岂不有效腰金曳朱岂不误事饥肠白须咨尔囊弓蓄我穷欵聚吾通乎

庆来桥铭【并序】

熙宁六年富人姚靖作新桥于福山某月某甲子桥成长老文字师与衆僧坐其上语曰山险且深游人至非偶然天下真爱山者少而游人必以爱山为名吾岂以其非真爱而忽之盖将有真爱者在其间吾并喜其至非偶然者有来吾迎于是去吾送于是吾一以庆待之庆者吾为山而寄喜焉者也濡尔笔来吾且题为庆来桥衆僧唯诺声讚遂题之题已使来请铭文曰

有奔者流界我淨宫为桥絶之自昔言功既坚既良坏亦无穷我谋新之上覆以屋夭矫完固平骛礪谷马来彭彭车度端端我将我迎则庆而安谁其谋之维宇师建谁其资之维姚氏愿匪谋匪资桥奚以善物不无坏恃後之人铭以告之俾旧而新

卷十七

钦定四库全书

灌园集卷十七 宋 吕南公 撰杂着

吕氏家系

开宝八年王师加金陵兵官樊若水至城下晚请於帅以燔民庐而吾家毁焉曾祖王父君抢攘挟其二子轻齎南遁至江州遇其故人有禄者教以宜走南丰於是從之明年复遣次子返省金陵且谋复旧居而舍址券籍皆灰荡不可理辩遂定计为南丰人有屋于县郭之东逐土宜为生居二年曾祖王父君卒其长子是为大父大父君有二子其季先人也先人生於祥符戊申是岁大父君卒先人生才十月家贫不能自存大母栖以襁褓挈而嫁南城人傅可忠故先人初养于傅氏长因家焉嘉佑九年正月丁巳先君卒有四子云系曰尝语水乎水之行也作于天会于源溢而放蹙而悍淙而为瀑激而为瀨曲屈而为礪平漫而为川遭潴者池被灌者渠熬漱浸漉披枯突润名势错综已多故矣而不离乎水通于此意者其知姓氏之所继乎不然牵荣而结显务以自光亦何异坐江海之上而繁引絮辩语人以此涓尝瀨此涓尝川尝潴尝渠渠已尝漱漱已尝熬又浸又流流之在吴者为如许湍其在楚者又为如许湍乎引辩如此亦几妄矣夫吕之为家吾知其得于佐禹治水而已彼周之侯汉之王吴之将唐之相者吾岂知其必祖必宗哉吾不敢好牵结而自诬也详夫耳目所及事得以徵之者今有一人其嗣实三然一人安生一人夭化一人浪游则是此人嗣系唯安生者可以审定而其夭者则絶游者难考矣万一着系而悦引夭游则其为谬奈何成败存亡其迭如毂况乃假养易冒兵燹饥荡杂发於其间谁者保其如綫而不有紊絶乎盖帝公之胄参附史録君子犹有以窥秉笔人之荒况彼臣民之微着无常者哉呜呼可悲也已先君之死诸孤露懵然迷所志免丧之五年始诂於南丰得其略焉曾高之迹母得而述矣茂惟先君其可言之先君少孤不及仕学为人端慤易直居游脆软之俗克耿介无点染有屋西村不能足食然戛戛自守非其力不以尘芥望人接乡邻以忠正有?常諄戾得先君一言辄为之沮辍好读农田书曰吾所宜也耕殖造葺必有法初教其第三子学悬刻督励不容髮闻人有书必为求借从之屈请忘勸常召语之吾家父祖学儒汝能绍之勿坠吾望塞矣嗟乎孰使馘集而帅亡乎初曾祖王父君之次孙既来南丰忽被中旨趋京师到阙得官属三司院而其兄尚留白舍之河源月割俸以资之既又以书归戒令尽室北来未及行而三司卒故其系不得详河源有五子曰骧渭沔晏顔者是也西村四子伯欢仲旻季南公其叔留也曾祖王父君讳大亮大父君讳戡三司讳渊河源讳务本先君讳文宝其後系具别谱

读孟子疏

学者之於孟子能言则以诵能问则以疑及其老也顾有所苦焉此世所以不能无也盖先王之道其至虽存乎吾心而其达必自乎吾求夫莫思则弗求莫求则弗知莫知则弗达莫达则弗尽学者之大戒常在乎此而此书语约而意深易见而难穷固夫未出于戒者于苦乎何

逃昔者三代之英内无传注之害而外不应科试然则讲学不以一日置者夫岂恶佚而愿劳凡欲以明吾心而致尽焉耳士而出于三代且不得志于讲学而况出於秦汉以来哉解说之参差甲信而乙疑人莫必明焉我其能勿以定之则夫讲学者果为今世之所赖自赵台卿作传其後既专行然望其遂尽而无苦果然其未然也日者士大夫往往善得其所未至且纠其疎繆然而必以逐赵于学亦未之能完则为今之计宁可以俟彼之显而缓吾之功问以辨焉所以达也闽先生徐某老于道德之学于此书致功良深今其税驾在郭余偕诸君相与叩观其说以庶几亡深约之苦而心得以明何善如之故尝为诸君道此诸君倘不以余言为否幸书之名以见复焉

读亢仓子

治平四年余见此书於今集贤邓校理家怪其旨致不伦不及文庄列老远甚其辞又最鄙陋令人懒读常疑有好事者诡冒为之然儒之长老不启余疑每用不悻後二年在淮南始见唐史新书乃知开元时王士源者造此又四年於汴京见李肇国史补其说与新书同盖新书肇所记而言之耳因自愜快以所疑之不妄故也益知心之可以师嗟夫在我者之有以照彼安在乎占文按迹然後进哉世固有喜以浅托高人其功用短长虽不能使智者兼惑亦其谬意期成恩於世耳闻羌儿与越人鬪者越人乘象羌儿患其难攀即刻木为狻猊首而绘之又傲其皮而蒙以前驱象猝遭而惊也为之奔败盖畏狻猊者象也非越人而象之所为奔败者惊於伪而非惊於实者也彼羌儿何所能哉今夫以浅托高人何以异此往时王肃出孔子家语近世丘濬解论语而题以韩退之两人之见皆济繆以劳而通为羌儿之罪人呜呼岂以为有益而为之欤凡士源肃濬异世而同揆者予又焉知学士之又无似此者欤柳先生尝论亢仓不宣传解而不虑为唐人诈造其辩盖犹未尽余方自怜不惑之早故为之志以佐柳於尽焉

读白虎通

白虎通譌惑聒瞽书也非特作之者有是学其说者亦足以致之学者不可不思也闻楚之王有喜起怪以为奇而作异以为新者於是国中之人衣冠宫室君臣族亲之数名制度皆羣然而更造之旁徵外引以快谈喻他日王问焉曰孰致尔孰致尔於是俊舌者进而列焉曰是新某制是生某名是有某义云云王大悦连室而旌之鲁之端士骇而往辩之曰古之制君臣主於定上下尊卑族亲主於辨戚疎次序衣冠宫室主於便利乎起居服用昔言足矣今不宜复哄汝纷纷且非益也楚之君臣勃而否之曰非尔所知也不如是不足以矜识见而新谈说也鲁士不自得而去白虎之作其类是耶而未闻当时有鲁士呜呼吾不意夫譌惑聒瞽者日多多也自西汉时学者说经已积怪蠹至是而甚焉又总括之说儒之弊盖至於此学者不可不思也

读字源小说

余读曲台经至学记篇曰发虑宪求善良足以谏闻未足以动衆於是废书而叹曰嗟乎先王之深意秦汉学士亦有得之者乎古者以言明道而以文正言又以书致文也致因欲正正因

欲明其事固如此然而意得道忘则未始闭滞于言彼字以致书何执之有趋于达事而已达则得得则忘字虽有体义不以害也六经之文备于晚周而孟子荀卿与夫百家诸子之辞相与援引而句字未尝同彼盖知夫在理而不在字也自六书之名起论者槩之以为分张本末顾亦是矣而後儒之生患无以成问学更从而为之辞欲废其五而归其一牵合之风从是长矣盖康成之学得於求善良者也而许慎之学得于发虑宪者也皆不知先王之所贵不在於此林罕区区出其後其亦勇於謏闻者乎呜呼先王之深意亡矣於罕乎何诛

读李文饶集

余与凌云先生论立功立言先生称有道者必能立功而立功者不必皆有道余独论立言以为士必不得已於言则文不可以不工盖意有余而文不足则如吃人之辩讼心未始不虚理未始不直然而或屈者无助於辞而已矣噫古今之人苟有所见则必加思加思必有得有得矣而不欲着之言以示世殆非人情然而伟谈剧论不闻人人各有者此非文不足故欤先生不以余说为非余读李文饶所着书见其汲汲於论譏患无以传诸世也而文乃浅近卑粗不能挥斥其意不知当时何以自谓为可其亦虽吃而不能无讼者欤可怜哉若人也文饶未在相府时事业已有可称羈排蛮夷而按遏僧巫皆已非常及其遭会昭肃奋然有刷滌寰瀛之志於是倾胸写心以就经纶会昌之政危全於雅矣虽天不相其终然文饶之功既自不细而不能自免於朋党之非及一不幸身被窜抑则焦焦无以自安穷愁着书至於非望诬僧孺焉甚矣文饶之不足於道也夫惟全才足德之士言而人不得加损动而世不知违从意文饶之所以为文饶者有未肩於此欤

题尔雅後

尔雅非三代之书也其作于秦汉之经家乎郑康成以为出於孔子门人者妄也三代之英其学在于持气正心充德性於神明以为行业彼尚不贵着书不尚传经而曾形名训诂之肯为哉世俗之儒善望影以象形见孔子云商可言诗遂以诗序为子夏所作且孔子亦言赐可与言诗矣今独何爱而不言商赐共作诗序乎盖孔子之教人学诗而以多识鸟兽草木之名为足以辨之要将由此以究观性命之理焉耳今夫谓尔雅为出於孔门者非据此而言之欤嗟乎幸而论语所记此段不明所告何人尔即令明之说者肯舍之耶甚矣说儒之喜妄也余考此书所陈训例往往与他书不合唯对毛氏诗说则多同余故知其作于秦汉之间今世所传五经正义者引用辨证每取此书然反时时破毁焉原作尔雅人之意正欲以定形名道训诂焉後世之宗例是故传合经家而陈之乃合不果定又或不通则谓之何欲助说儒而儒随复攻之借盗粮而资贼兵尔雅亦有是哉

题论衡後

传言蔡伯喈初得此书常秘玩以助谈或搜其帐中见之辄抱以去邕且丁宁戒以勿广也嗟乎邕不得为贤儒岂不宜哉夫饰小辩以惊俗充之二十万言既自不足多道邕则欲以独传为过人之功何繆如之良金美玉天下之公宝为其贵於可用耳小夫下人偶获寸片则卧握

行怀如恐人之弗知又兢兢或吾寇也而金玉果非天下所无信以充书为果可用乎孰御天下之同贵有如不然也邕之志虑曾小夫下人之及耶

书卢全集後

世之论交以器能名位相若且合云者斯不然也周孔顔孟当世无二人则高身独往没齿无与而已乎斯不然也明矣盖生同世术同学迹相於志相依焉斯交而已其才器之小大参差固不足间然非大贤莫能并容其间以取全也庸常之人不足以论此唐三百年文儒为盛然莫盛於元和以来韩退之其名教宗主欵而恳恳推道柳宗元皇甫湜李翱李观张籍孟郊侯喜欧阳詹卢仝辈逊服卑卑如不足者退之岂真宜坐其下哉斯以见韩之大贤也数君皆能自致於有闻然各有终身之蔽又当时於韩各有轻倪处不闻韩以为间益见韩之贤也已数人中卢仝迹独不着然考之仝於交中为劣者盖仝荒纵怪傲人也仝之文章今犹有在者四十余篇歌诗铭序杂焉自其文章以观其所存有所照已其无足可道也顾无退之则仝亦何有呜呼交友之难时会之难道学又难徒使吾重叹於今日也古人吾不得与矣安得仝交者而见之哉

书长江集後

岛之诗约而覃明而深杰健而闲易故为不可多得韩退之称岛为文身大不及胆又云奸穷怪变得往往造平澹者予考於集信然今世之人皆知赏识岛诗至论其所以为岛则未必知也彼徒吟之曰西风吹渭水落叶满长安又曰鸟宿池边树僧敲月下门云云以岛之高妙在此嗟乎是不害为不知岛者也安得真知岛者而与之论哉此诗有许柳为序者其篇第与今衆本不同又特不多盖余所收集本已三百八十篇云

书赋编後

十四五时随羣儿诵今体赋日欣欣焉比十七八遂工仿之亦不多厌二十以後稍不喜尚然益知赋之态状革萌自吾出江淮行橐齎书絶无赋集或时同辈谈及往往收睫闭听等之恶畏今年旅穷加忧同居辄让以理旧习谓可由以求禄仕吾贫穷甚果不免此因复借其文以读读之久撮其善者得四十余题手録聚之资技痒云噫亦足以自笑矣北人与南人会京师相与置酒独设橄?为盘具南人纵啖之甚美核几不免而北人初啞齿未加深嚙蹙而投诸地南人默笑焉已而酒数行他无以食者北人 燥起从地而复引啗之顾谓南宾天下味良于养人者宜不止此当今之时我急无以慰喉牙尔借吾有八珍五鼎之享则今日之举未为不知味也呜呼吾真类若人矣古人有言不遭者可无不为若我者非不遭者之为耶熙宁己酉上元日桐城南牕题

王祥对

或问王祥其有道之士欵用孝悌为闻人出处视时治乱尊荣克终为晋臣冠非有道其何能

此对曰祥而有道孰而无道者当东汉之微曹氏窥觐不得天位不履此匹妻孺子所共知祥於此时避地隐居似有志义者一日幡然起就臣位岂以为身能轩轻於时乎吾固疑祥以孝友为尊荣资其後高贵乡公立祥以定策封侯司马氏贼而杀之而祥熟视未有以如何也方枕股而哭以为忠矣司马氏之逆其根株与曹氏并起迹其强悍盖非祥所能遏顾为祥计则义不仕焉可也而祥不去异时晋王受册祥方与郑冲争一屈膝此所谓与人巨舟而靳浇斛者也夫魏晋之事祥不得为不占始末者苟以为义则不当哭且受拜矣苟以为不义则白首公卿之位无救其亡区区哭拜为不为何益或言祥非不知宜去以为亟去则掇祸於奸雄之手是以全身隐忍此亦非是盖奸雄之所祸者祸其可忌之人而已若夫材谋气略非已之敌且不与之较则无事忌之故王莽不诛扬雄宋武不逼陶潜而近代朱全忠亦不杀司空图也以祥之恂恂在野与在朝每无心於忼慨彼固揣摩其无能厉已矣虽去之保无祸然则祥虽以孝友取尊荣终之一无益治乱之人而已祥之哭高贵乡公也曰老臣无状嗟乎祥亦自知欤是真无状者也安得谓有道

卷十八

钦定四库全书

灌园集卷十八 宋 吕南公 撰杂着

书刘瑾事

刘沛公当国时进士裴煜以文艺往来门下公称爱之使子瑾与之游友好甚渥煜试南省奏名第一声誉暴振其交瑾益谨愿为姻家瑾莫逆也公之薨煜在修书局自虑可致富贵於初心颇怀去就瑾觉之而未尝问比瑾仕稍显而煜老蹉跎得扬州未行而疾病手书抵瑾愬穷蹙以後事为托且寻昔好其辞殊哀瑾方与客饮大醉夜半乃见煜书起叹息未五鼓而诣煜煜见瑾欷歔不自胜瑾曰勿疑矣归遣其子往拜煜即日成婚煜遂死瑾为经理其家甚备其後瑾为淮南转运使郑獬舟过广陵疾作而殆使客讽告瑾愿屈使君一视我死可以目瞑瑾闻之辍食而往獬曰必死念妻息无归非公孰能抚我瑾以尽力许之獬卒瑾悉橐买田宅郾溪上以女妻獬子使奉母居焉瑾儒者有雄豪名於天下士论所畏而其所以存待危亡乃如此

达佣述

淮西达佣传者逸其名氏佣不习书未尝知仁义礼乐之说翳茨为居与物无竞力能以所工日致百钱以给炊烹或时得美于常则尽推羸易酒肉以归夜同妇子宴语又自知吹钟管间辄以度曲助嬉笑其声隐然以为常其篱後居有富翁者或夜寝不熟厌闻之一日召佣来前语之曰吾宅室层复京辇棋峙一岁之息计簿至积案吾生可谓优余矣而夕夕笑乐有不暇焉汝草茅之子宛转不越丈尺地日仰手眼者奈何资以尔乐也佣以实告翁曰然尔裁足致百钱遂得尔安必加得焉乐宜亦多者今吾貲汝以百千恣汝所营如月献息而已佣然之取贐以去自是稍不闻管乐声既而笑语亦稍贬旬月以往声如室矣富翁初怪之未及问而佣来有蹙容以状问之则曰不主多财偶学之而虑所营失其方故甚忧已营之又苦其或亡故多劳忧劳之兴始吾一已尝之是以管不暇吹继而家共患焉笑乐并失矣顷与妇子计以为求利於外则甚难苟得优游以终老焉人生至乐也幸彼未可知之外营而废吾难得之内乐宜不可为然请遂归所貲以保吾乐於是妇子相与负贐至归讫讙呼而去东平吕某曰生非财不养然知养生而不知达生其为蔽害深矣不灵之夫厚藏广掊譬为奴者彼亦岂能纡金褐而咽珠饭哉通之饱暖而已矣及其墓以丰而见扣子弟以侈纵而鲜若人倾败遂基罪戾或?而家破世辱矣凡以不用达故也诚知聚不足益而害有以根於以安生而率教则何破辱之有乃惑一身而复畀其後以鲜若人不祥莫甚焉达生知道至矣闻古有羲黄氏之民者其人化之而千载不作其後有列庄氏之书者其言尽之而知者不以行孰意淮西之佣而得此也世指不知书辈为愚夫岂果然哉余在桐乡客有道佣者因志之是为达佣述

平凉夫人传

平凉淡夫人讳修小字婵娟不知其先所自来或言其族当夏禹时已盛於林邑其支庶往往显闻於荆扬之间曰簠曰簠皆名载帝籍岁进其子弟待用于京师人到今称之为夫人大父叔清位宜春长其别子居余干者曰编实生夫人夫人初生胞有紫锦纹家人异之及长翹然出其类宜春公曰吾子孙亦盛矣以今视之莫不适於用顾用有贵贱则所遇为不可知安得吾修不参於用之贱耶异时将作梁生闻宜春语以告於翰林文公以为宜配君子翰林公曰淡氏妬乎曰无之又曰淫乎曰无之公曰然吾固闻若家之富清风矣当今之时吾恶夫温柔而无节者吾热中盖久生谨为我纳淡氏为吾室人亟之勿缓於是将作生请於其家议以法度成之翰林爱焉常曰此吾股肱之任夫人不苟言笑平居未尝下榻人或怪其似息妫翰林曰不然是全於顺者耳上有事於南郊翰林以夫人请於朝初得封郡於平凉世皆称曰平凉夫人自是贵豪争求配如夫人淡氏之嫔遂半天下他日緇黄之屋亦窃有之翰林太息曰嗟乎吾不早获南郊之请险使夫人与狗配齐号且宜春公之所惮果贱於此欤夫人侍翰林常半岁不离次必天霽霜乃退就别室其见引抑无所喜恨时以为难翰林宴休夫人必与俱其在风轩翰林醉且睡熟搯夫人堕地稍伤翰林惊起援而抚之曰怨我乎夫人曰不敢然由此不自任时时不免嚙啗翰林曰我於子乎非附炎之偶今惟不幸故取困与伤使召将作生曰夫人疾吾重劳之若为我选其侄娣之宜者以来夫人始退闲翰林犹顾怜不忘戒家人勿或妄毁岁久乃亡无子以火葬其後事在表文

赞曰吾於平凉见守道之福焉汉氏以前文字之传陋矣简籍所寄淡氏之功最大然则修之享封顾不宜哉初修有兄佳靚略等而刚塞过甚故将作生以配丁氏丁氏苦家也日蒙椎斧之忧唬其顶者数矣终不蕲避其顽忍盖如此其季弟亦转妙然以輒薄乘於时贱与薪刍不异唯平凉在枝叶中静正丰闲作配文家虚而不诎亲而不?荣名始终嘉爱无极呜呼盛矣

义鹰志

盱南陆氏世雄於貲子弟矜玩好往往以之易学问售奇访异以为常他日遇山夫卖猴雏取而蓄之甚驯纵其游息门内外毋复羈检岁久矣猴益老意向类奸然猴牡猴也见妇女必跳梁悚拚如将近之陆氏患焉谋搆死之未施手而猴先惊畏登屋僻去以避祸弹石不得中人力不能追凡夜寂猴辄潜下取饮食人动则引遁无如之何会少年自?来臂俊苍鹰陆氏之弟往从之郊视其搏掇无虚向因就与语薄告以猴害少年许诺为擒之即俱还据高隅发鹰鞬已发则逞逞摩空下瞰得猴处猴犹坐不动伺鹰垂近隐举瓦以扞身鹰不能得也奋焉穿云以逝渐眇默不可见於是主客不知所为方相慰以壶饌未敢议所以谢少年也明日忽闻空中有铃声少年色动意其鹰也舍盃啜嚼疾趋昨日立处仰瞻之果鹰来也方复搏翔下击猴仍用前计以自全鹰失攫 扬翮以过後一鹰继至猴不疑也遂中其擒少年招得所臂鹰而遂擒者委猴而去盖少年之鹰往招之而来助者也吕南公曰羽毛之居生也纵横乎林莽之间而顺适乎天地之内同而异异而同彼其鹰类非一种聚而已也何少年之所养适当攫之不胜而遂能招夫助己者耶夫以通昼夕之奔逝盖不知经涉几千万里之远而几十百之羣队彼岂有响响之语言沾沾之势貌以相讽动者耶至其见助者又未必并栖共育者也而辄相从乎所未如何之害彼曾人之与耶今人生同州聚同乡上之人防之以政刑而端良博厚之士尸其教观其平居束冠衣媚声气以相翕习有谓之为无志气行义则起不平之色亦

从而恨之惟其一旦攫介患害则人人自苦也曰吾爱髮肤又曰吾力不胜也埋头缩手背嗟而斜睨以阳托於畏慎之名此一门之内有之矣况嫫族耶嫫族且有此况州闾相识耶是曾二鷹之无知奚志气行义之各得耶呜呼人禽之所以异者形名而已矣就形名以索实吾岂敢知治平之末年初出山延陵刘县尉扶为余道此余耿叹焉刘君谓余盍歌之如少陵所诗鵲报虵事余辞以未能也姑志之亦书其所叹於後矜玩好者可以戒而不如鷹者可以慙及其戒且慙欵刘君与予皆幸矣是夏六月志

善学说赠蔡升之

善学者行身循乎故常不善学者行身俟乎显光俟显光者得亦失之循故常者失亦得之故常不害显光而显光有时害故常其理然也人之生日两其食则不羸寒暑得其衣则不悲事父母养妻息睦其族善其邻各视其力与资此成世以来未之有改而天下情所同宜者也是之谓故常食不止于饱而已至于备水陆之珍衣不止於暖而已至于穷女手之奇炫爵禄娶右家气势足以盖州党声称足以耀宗姻此成世以来未之必得而天下之情所同好者也是之谓显光故常有义显光有命义无所俟命不可意古之所学者勤于因义而已矣非所以先于命也苟为先命而後义则是饥寒方迫而坐须水陆之珍女手之奇然後御耳几何其不相率而乾槁哉于娶于养皆然几何其不相率而灭絕哉人道之大原有所兴矣不知此而言学吾不知其能学矣昔余客抚州州人有语余以周先事者云先至道咸平间进士连被乡荐俊誉沸然先亦自负以必达或劝以娶妻治产辄怒以报之曰不晚捧桂枝出宸廷而贵人女争于东华门上结我矣何问下里人哉久之先不复得志于科場而俊誉日消蹉跎空屋中年五十余鰥卧以死死之日家惟病母头白齿缺无升布勺米自活先既死而母亦卒于饿矣此非俟显光者乎吾乡先生王补之弱冠已议婚是时家甚贫或怪其汲汲者补之曰堂有亲水菽虽菲淡要有以奉承之或论之父前父亦曰官可无也婚时不可违其後补之起家以经术为天下宗师非循故常者乎夫先与补之其终皆命也惟其始不肯俟显光与不肯循故常为异耳较其害不害何如哉从余游而旧者陈留蔡旼字升之其人齿壮尚未娶今乃有言曰二亲皆六十矣而旼之室无妇欲娶则患贫不娶则忧失时如之何余不欲其先命而後义也作善学说遗之

贫坑说送傅公济

世有贫坑其名甚古而其地日新相传上皇之时曾未有此疑其帝鸿以後稍?而倾经延秦汉乍虚乍盈而莫可填坑之所在非远非近非幽非显谓之并包而不贮谷帛金珠谓之偏发而周匝天下皆见非广也而无边非深也而无底非尽焚也而长焦熬非尽淖也而长濡滯无封疆限禁而在者不容轻逸无王长啸结而来者不悟其多无舜禹之德化而土风自俭陋无战国之从衡而事务自勤烦人之堕其中者辄失故态昔之辩者反哑前之勇者成怯身虽大贤而不必见尊先虽甚贵而不必见畏盖有一人堕焉而家随之者矣未见家堕而身独免者也盖有未堕而忧虞者矣未见已堕而謹欣者也是故智者薪避而愚者以为讳为人上者惩此以勤政为人长者指此以戒祸恶之如鼠防之如虎而堕者犹纷纷而莫胜数由今而论坑之所受可谓盛矣而盛不害乎穷嗟乎天岂不仁乎奈何兆此以梏民於穷也或曰人而已矣天

何预焉然则何以薪避而有免者耶虽然已堕而终能脱去者可谓得天人之助矣顷余适堕之初正见公济随其父亨甫占次於其间则交参居游以数年尝相悲矣而未知所以相安顾视圜坑之人莫非失意而各能以力仅济於衣食唯儒其名者独艰焉则又蹙然而推咎曰坑之山川固不利於儒乎坑之鬼神固不佑於儒乎今又其文章笔墨为之崇欤俄而亨父愴兮茫然若寢寐之回然望西以奋时则以为若人也奋而已矣今且焉往而非坑乎未几亨甫震其譟声殷然若在云表坑人惊而索之莫得见者徒觉其音辞畅亮舒愉而已於是始知亨父脱迹此坑而莫余告也皆曰亨甫贤哉谓之得助於天人不亦宜乎方是之时公济亦轩轩西首且言贫坑之毒也吾儒谓之威极而浮屠人谓之地狱今吾父幸脱去吾家既随之然我将佐吾父务令去之必远无使两耳复闻坑之呻吟以动吾心余於是而美焉为之歌魏硕鼠之诗送之曰逝将去女适彼乐土乐土乐土爰得我所曰公济乎勉之为我谢亨甫吾愧无以从公游然相悲之言从是息矣

困蚓说

时雨既休物类如醒蚓之壤潜者亦覩然而腾於垤蜿蜒以恣游俄而造乎蚁聚之间蚁衆初为之辟易以惊已复欲有以尝之乃追而缘其後颇觉其不能自救也则又驰而跨其颠转嚼其肤蚓不胜其侵震缩而已於是蚁徒识其果无威能也相号於穴倾老小以来环而伤之蚓困於战跋几死嗟乎明不足以对物才不足以周身而恃已长以恣其所之其不困於侵侮也幸哉

蚊蝇说

蚊之近人童子知欲扑之为其毒之足以伤人也蝇之近人非能致毒也而以其生长之污亦争灭之与憎蚊同呜呼行身之曾不善也不在乎术之足以毒人苟为素所由者未免於污则亦足以害其身而已矣

忠戒

余馆郑氏书堂一年其朝夕飧饗之所陈残賸滓沾擲狼戾邻之彪日游索焉舍而安之无复知故主者堂之僮逐之不为沮其家呼之不为闻也夜尚卧堂间妥妥甚安异人至则起而迎吠不待噉遣嗟乎食之移情乃至於此彼岂以为忠适然欤余於是而有感盖古之所谓忠者必由其道忠於非所宜忠何道之云阿衡不幸而五去五就後世翻覆儼人更援之以济其幸视一己之利害而定其趋舍不顾社稷民人之存亡也而曰视天而已且天安肯命人为翻覆自利者乎余以为由余陈平之迹恕於乱世可也用盛王之法裁之则有所不免伤人臣之有已而无君感厯事作忠戒

卷十九

<集部,别集类,北宋建隆至靖康,灌园集>

钦定四库全书

灌园集卷十九 宋 吕南公 撰墓表

傅处士墓表

故处士傅君家於东岩山之阴实南城沙溪之上村传术聚书教子弟为邑里讲学倡始才名学子相望得科第惟傅氏人衆处士少而承训既冠有俊誉而父病失一目明因自惟念无兄弟奉养回阙即弃进学业而专治耕稼以致其旨甘如是者二十年父无後忧足不出户庭族人谋并其同产土地者虑不见酢故羈处士父名而讼於官县摄符下处士察父有难色乃驰诣县请以身代病父县怜而许之已而谋并地者辞穷犹诬污不肯置於是处士泣曰大夫言彼讼者志得人地耳诚令病父免吏议则愿推吾产畀之虽行乞养亲所不憾也讼者大慙无以遂其奸衆皆叹息其为人子槩如此至自有子则亦尽义教之其言曰学优而仕非成人已乎文辞而已非所谓学也苟禄而已非所谓仕也必也德充乎已业利乎人然後可语优焉其为人父槩如此喜奕棋工为近体诗居乡以和易为主而不诱於非义其心盖不徒合衆而止也治平二年梦游山观至石室间有羽衣人延之坐俄探桝上青囊得白字碧简示之其文曰四十五日而病五日而卒寤而异焉明日召其子於学山至则饬以家事且促凶备当是时处士称孤久矣母夫人在堂闻其语而悲之而碧简之文果验十一月丁卯竟卒寿四十二将终涕泗谢母以不能终养为忧且曰夫人所倚者孙耳语已端坐而瞑明年卜葬於屋东之河源卜吉遂以二月丙午窆之处士娶邓氏女生二子其长曰权教之仕学者也其次早夭矣後处士之葬五年权及第调漳州浦县尉秩满移建州观察推官待次来归展墓内外宗姻邻曲父老皆会於松柏下杂然诵处士之德其幼壮者谄於长老以後生弗及闻知为歉曰盍表以文刻石示来者乎衆皆曰然於是命吕南公曰唯子宜为之文某曰是文也当何爱於论撰虽然以处士善庆而有子如此腾跼翔抟高远坐致则追荣不晚而後书之岂不可哉亦曰贤在德不在官焉耳夫宗姻邻曲之志固亦得之此乎处士讳某字世长其曾祖讳某父讳某熙宁八年秋七月取文後三月刻之墓遂有表

讲师李君墓表

灌园公曰自唐衰亡天下文鄙学谬积百许年极陋且羞而士未知变也中间有工俚语即见推为辞伯有知记诵经疏即被请为儒师承习髣髴如此又数十年而後奇特之士相望出焉其变遂臻乎大若建昌之曾子固李泰伯则肇荒一郡者也其余号乡先生力通辞语以是非予夺传注为事以不墮於路听耳剽之浮则蓝田李君亦其人也君六七岁时闻占毕之风而悦之不俟父兄敦饬而晓夕黽勉盖家愈贫而志愈笃既壮则以讲劝取贄衣食其阖户方且承顔竭力躬行孝悌衣无定主甌无我粟而没齿安之乡人叹咨以为不可亚其於人也和而

徇礼信而附义喜扬人善如恐不足少时应举梁京中道同袍属疾衆皆舍而前君独守之不忍去君於经无所不悦而尤用意於诗易尝着诗讲义二十卷易统论三十卷孟子讲义十四卷书成不远千里以献当代闻人呜呼盖耻乎无得而称者也君讳彖字材叔上世家临川之青泥其迁蓝田见三徙矣熙宁九年十二月乙未君卒寿六十三明年卜宅兆得吉於大源之邓言阮某月日克葬有三子七孙子曰平仲择之琛而择之能嗣业云後之人固有考评宿学以稽君者乎问其家则子孙存焉问其墓则告之以在此

处士陈君墓表

建安处士陈君讳某生於景德乙巳死於庆历丙戌哭亡暮年卜葬瞿村之丁阮山食告後三十有三年其子某某以母夫人棺祔之始议刻石表墓以状来请文某於处士世故也故应而不辞昔天下既休兵数十年间民惩丧乱趣求安居乐业各尽其力得所以尽而奉养愉逸有非礼律所同则亦远荒之常情而声教所未暇者也处士当此时薄食陋衣极其苦淡不恤衆咻而以有常自许盖已异於浮沉之俗矣方又钦慕儒学延致时名进士训范其息如恐不及至以婚援结之则其存心岂徒安乐之得哉其配叶氏能助其力行故处士寿虽不过中而家检继循不违文艺子孙皆以举人命於乡类能不墮家声谨承先业处士之为人可知也已处士曾祖讳某祖讳某皆不仕为建人世久不知其先所自徙也处士有七子某某实举进士五孙皆率教云

墓志

饶寺丞墓志

故卫尉寺丞饶君讳怀英官以子贵得之其先世家金陵祖汉仕李氏为散骑常侍唐社既屋君挈其室南迁初来抚州买薄田数十亩力治耕种遂有其居君天资强悍智勇人也略知文字而不务仕学自任严整不畏凶犷人莫敢以非意犯者尝以公役如城南镇镇据四野茶盐诸盗骛涉之冲奸人挟禁货舞肘而过无所顾君使人邀责之盗怒索鬪君起与战战三日并夜不饮食而鬪无倦色盗不胜弃其橐以遁尝泛鄱江夜泊荒浦旁有游舟若行贾者君潜察之意其贼也出揖与语渐相近叙说不使疑即相往来以致熟亦出酒肉为饌君睨其舟中有官器?愈愤欲图之一夕贼来君所复饮以酒贼大醉仆卧席次君使分钥闭贼船诸户已即叱醉者起痛诘数之因断其头又呼奴尽缚衆贼搜其蓄得诰敕十许道或蓝褙袍犹在者君杀五六人生束二人明日列於官盖名盗购而未得者也君尽献其获取其购以归抚人周僧聚辈据险山乘隙出抄掠经岁官不能捕故事贼大难制则用金字牌以招之然及其出则杀活未可知以是周僧蓄疑州守两以牌示僧僧辄杀使者而不肯听君告州往焉贼闻要於山口拟刃彀矢向君君袒而诃之曰吾非汝较者漫赠汝以不死耳贼臂稍缩因前揽手造其庐諭以官家威灵本无不擒之贼贼感泣拜谢为置饮宴君食之不疑贼益听信因相率赴官不劳一人而事定其强锐敢为盖多此类有子三人力饬其长进学为求师博收篇籍恳激不厌及其得官起声称荣及亲时君仍康强暮年或为诗多忼慷悲嗟之气有句云人老壮图休劔灵中夜响又曰胆斗醉犹动气虹晴未舒又曰太平不见英雄事忠胆长随日月闲其大槩皆尔

平居里閭岁时盃酒相追攀与故人父老语身世事时召其子弟戒切之如己嗣或时酒中耿叹嘘叱拍髀取胡桃当接拳破之神色森凜若有所负者尝夜卧堂中有偷人入其隅君寤寐觉之起援戈追击中其腹偷者脱走去明旦视戈棱有寸肠焉盖戈而絕之者也吕南公曰虎豹之威其精搏噬固天性一至穷山渴陆圯垠千里无人烟不见毛类则无所泄其豪毒然犹跳踉号啸震草石以不忘於奋发盖雄奇勇伟之士出而无所用则功名智力泯泯不发时之所系大矣自古豪杰抱负不羣而睽离溘落不耀其施者不少何特寺丞哉寺丞之死在某年其寿七十三墓在临川南六十里凌云山之东背冈面阳松檟盛焉其处也熙宁元年夏五月初为之志

李进士墓志

熙宁四年正月乙卯黎滩李至改葬其先人前期以状来告曰维吾父幼而事学事之笃以至於破家年六十犹以不得意死夫生而为善一无所遂已尝兴叹死又莫相吉穴以归其棺斯嗣人之罪忧感不忘焉惟君子幸暇志之於是某亦楚然起悲乃不辞而为之志志曰君讳某字圣源其上世为建州人危全讽在抚州时有李蕃者实佐之盖君家之来南城自蕃始曾大父讳某大父讳某父讳某皆不显君少游学弱冠补广文生在举場四十年当时多推其锐且勤既而无所遇则又多为之惜初余为儿童时犹及识君盖康然谨厚长者也虽今间井犹知谭君之端善曰急人之急而讳人之恶者此吾李圣源也哉嗟乎坎壈死矣君娶邓氏有子二人其长先君卒其次为进士今至是也至亦良令士党称其象君初君之死以某年草葬舍南之万松山今葬招贤里之大窠云

墓志铭

亡友黄公墓志铭

南城东诸乡其距县百三十里者为丰义之马村有宋熙宁四年季春某甲子乡之儒者黄君实死即葬之其友吕南公铭其墓亦叙其世属名壽於铭之端其辞曰君讳某字道原远祖居闽七世祖彦始迁以来为乡蓄户道原生数岁晚解成人论说其大父爱之处之以学问苦讨严搜无夙夕之殊以致其知功危力悍譬弩千钧政善引满莫遏其发则累扎不难贯而果遏焉命之於材其戾亟哉虽然其器资亦可尚矣是夫人之所以宜惜且悲也道原能饮酒为清丽诗其读书博而益求其为文速而不芜而三十二以死死三月以葬呜呼徒悲何足以待之谓一家乡邑郡并不幸焉而惜之可也道原妻姓陈氏无男子有二女其叔五龄伯九龄铭曰孝悌足於家仁信足於友而年不以久呜呼

宋故抚州临川县丞李君墓志铭

丞相晏元献公之妹适李氏曰靖安县君生六子其次子曰亢字伯起幼而端谨元献奇之至和二年元献公薨遗表以李甥为言有诏官之为试将作监主簿南郊放选补饶州安仁县尉书一考丁父建康军节度推官忧服除司户於泉州秩满司法於台州书一考丁靖安忧服除

为抚州临川县丞书一考以疾告寻医归丰城之正信乡新城里宅至一日而卒是日为熙宁七年二月之丁亥後二百五十日为十一月之丙申葬於广丰乡三峰里之天堂其季父修睦责铭於南城吕南公曰而余兄之孙倩也勿以辞於是论次初县丞君在泉泉将贪墨其所顾待视僚属之进贿寡多一时在位皆曲媚厚献以取荐称而君与州司法独无所奉泉将怒且恨之提点福建路刑狱使罗公拯按部至泉问状曰是二掾不从衆益可知其为人即并荐之未几泉将以赃败连郡县佐皆得谴而君与司法独无害及在台谏议详平台将为之特论其至临川抚缺狱官抚将以君掇之遽有能名台使者过抚抚将言之会建昌之南丰无令事久不治即以君权知南丰县居数月被疾请於台求还本局台使者曰听之则南丰复不治矣不听久之君益病乃听至临川遂告寻医及卒建昌抚之人皆叹息焉讳承从曾祖也讳彦珪祖也讳修永官节推君父也君娶清江廖氏职方郎中询之女生三男子曰传经传师传正皆幼生四女子长嫁金谿吴鼎其三未许人铭曰

君为子弟三族爱之出为参佐其上赖之五十而死其位则卑有材无命哀何已时

傅岩墓志铭

梦弼讳岩其远系无从详知五世以来始居建昌之梯云坊曾祖宣远咸平间与乡贡继又与王府贡竟不脱布衣以终梦弼为儿时秀穎轶羣学问不劳而工弱冠践词場下笔成语惊衆自是连五贡於乡一时同辈钦畏推避莫之敢望邑士至隣诸邦邦人必问傅岩容表何似何尔未富贵时之处待盖如此熙宁六年最後试於南宫之岁也试不利得疾出南薰关三月庚戌次蔡州困甚州将龙阁陈公遣医官为亲治且命走吏敦劝宜力饮药然疾滋不堪及壬子而死同里夏翱趋临洮已过邵店闻之为返轡主其棺殡讣至南城无村郭贤不肖皆嗟叹失声其父涣哭曰善固不可为也哉命壻龚翌诣蔡得其骨以归明年某月某甲子葬於某所之原友人李莘请於涣曰必铭其墓遂买石取吕南公文刻之而莘自书丹梦弼寿讫三十四初娶同县陈氏生一子天麟於是年十有三後娶金谿张氏生二子一女皆幼铭曰

刻意励行以依循仁义非以干禄也而禄不至则世道莫为之劝惧呜呼如子博茂雄奇而止於斯其谁望猗萧萧者原有鬱其窆曷昭其鬱维铭之验

乡丈人黄君墓志铭

呜呼世人尝知按学文以求君子而不知君子之盛有不由於学问者其於所求可谓与余异矣盛古之时道化成存是故学士之所行人多称之其所知与所言虽有不尽犹不极谬至於後世已一变而所谓学者有非学矣乃求君子於皮毛色响之间余之不同世人终不敢而已矣自余能读书爱古人端窾之论每思持以察世及其既察不能十二堪可若乃其名称职业不在乎学问者考其心迹往往能贤又颇至多夫然後益以不同世人为最宜吾乡丈人黄君所谓能贤者也其讳某字某其上世不治儒术止相受以治生而丈人事亲睦族竭尽情谊与人忠信和顺教子孙以百行不亏其处心行事率悃悌慈祥下逮伶厮亦有所不忍闻人有善欣称如恐不及其於恶徒虽嫉之而不以挂齿牙专赴人之急然诺信於官令里之人勃诘交

争丈人为处平之无不听服者富屋以所藏骄衆天下之常而丈人财多於泽国之蚊乃克恭敬第一余尝论於人为难也知者以余为允盖其履蹈如此岂非贤士君子哉然其未始弄笔说经顾能使弄笔说经人羞愧於妄名而已熙宁五年丈人春秋五十余七年素康强鲜疾乃七月上休忽病卧数日里之人卒惊忧既望稍危後五日复苏是日里之人聚朝虚闻之相与讙庆俄顷又报不起於是各涕泪罢归是岁季冬余至自汴值此惘惘弥月为衆伤惜既哭吊於其家明年其孤埴塤塤使以命来曰卜以明年四月五日遂葬亡父取若文铭於丘某让不敢承曰文鄙恐不足以扬丈人盛德埴等又使来曰是不宜倣俗儒驰伪也促铭之某即撰次如左方谨按丈人前系七祖彦始自闽迁於南城曾祖某祖某父某皆已讳名丈人娶姚氏有贤德成助於家生四男皆令善而埴以文才荐於乡诸孙多秀茂其後盖未易知丈人宅兆松树阮之坡其穴直丙其窆熙宁七年铭曰其论不高其行不佻知足以知鬼神之卧内而不躡仁足以济衆庶之逼乏而不骄呜呼此风万世之謠

亡友曾君墓志铭

吾友曾唐杰为人刚简厚直无险伪细谨之行以取合於人其视世俗之毁誉是非如衢路之涕唾然而为子不失孝为兄不失悌为父不失严为友不失忠虽知患其异己之徒尝以憎嫌相忌者犹不能有以少之也平居大饮歌呼若不就事至於读书商讲文艺则愈多而愈得筹策世务愈大而愈当人有所长无问识不识罔不力扬之遇有可恶虽在世戚亦必为之切齿盖其不类世俗之儒远矣而年尽以方壮而已此余所以叹悼乎君子之穷也先时其父都官公罢江东常平使者得知楚州而命其干私来鍾陵既将复命而舟次大云仓遘疾进次芜湖遂不起是日为熙宁七年之端午明年归葬建昌南城之行春门外真空寺之西南以七月甲申封土焉唐杰讳景初妻刘氏有三子曰时保京郎宣郎二女皆幼云铭曰

庆历生熙宁没壬午甲寅为始卒万千五百十五日孰令匆匆居此室上空洪蒙难致诘有咨其贤在铭碣

卷二十

钦定四库全书

灌园集卷二十 宋 吕南公 撰墓志铭

故袁州李君墓志铭

君讳冕字某处士彦珪之孙建宁军节度推官修永之子弱冠与弟茂元省其舅晏临淄公於京师至数月请归临淄公曰迟之比上郊天吾奏尔一官去君辞曰幸在举子後足以俟时茂元少失学问舅必恩之於义为允临淄公叹息从之明年诏补茂元太庙斋郎而君就养於家盖数年乃调建州崇安县主簿县民谢叟无子养他姓儿儿长大能相与营图起什一贩为蓄户晚年婢生一儿叟垂死戒曰吾家故窘今所有皆汝兄佐吾所致汝後勿忘少分财而优汝兄可也叟死婢儿少壮乃诣官乞还兄姓县令欲判可君掣令肘诘婢儿曰利货费至此乎汝儉人也不服更诉於州州议哄然疑之是时莆田蔡君谔为转运使闻议径之崇安君迎辩曰法缘人情今与人同苦淡致富足而终夺其食使数十口遽冻馁何以处情愿公论其弊君谔曰微主簿吾几误任法即具奏论朝廷是之遂为续勅建於闽为剧州崇安於建为剧县吏乘剧相要为奸无已君在持之使手不敢展台?君受县仓吏无所得进曰官为察吏不敢私谋然岁结簿上州须赍吏数万事乃乞愿官恤此而已君曰簿我主之汝何预既而封簿上送州吏果驳拒且诘县何不遣仓吏来移促之吏涕泣而往君未有以夺也无几何民有讼仓吏借马不还者君喜曰是可因以除害立呼仓吏疏之即疏曰贫无赍故买所借马以纾急某吏受若干某吏受若干疏本末尽备君为翻三状一上转运一上提刑一上州州将怒曰膏粱儿敢尔今破之如灭虬耳旦日君谔檄州曰尽缚受赍吏送崇安委主簿治狱於是郡诸司为一空吏到君痛鞠之尽服辞上台君谔命君括狱来决有役有流建人大震君出市人聚语指之曰此崇安李主簿也去为舒州司礼参军怀宁令上囚称一时获刼盗十三人君时在告疑徒中有自首及为从宜减者以为必县贪赏典而匿其辞乃请覆讯果当活三人是时临川王介甫为州通判私於君曰果尔而令当抵罪奈何君曰活囚而?令非我志也听怀宁尽易狱辞可矣介甫喜曰明且仁者也舒大饥日开常平仓饥民竞杂相轧有老嫗踣死衆躪其屍脱面皮州闻之怒议劾仓官不能约勒君请见曰按皮生而脱则既死必挛缩今嫗皮柔伸引覆无缺然则嫗饥死而屍仆衆不知其见躪非躪而死之也介甫曰司理说是州怒乃息司理院月平物价君持绢直高於市平同寮患之会庆朔介甫对衆诘君君曰有之今岁凶饥民为盗无数诚知市卖一绢钱七百然必高之为千二百者以计贓难满匹可以缓穷人之死故也不然三绢杀一人矣吾寮有禄俸欲得绢则準市平取之谁敢厚求於官今何用患吾平乎介甫曰吾虑不及此去为兴国军通山县令县去君远官岁赋蚕盐遣吏受於军而主给之民常受虚数而吏刻其实十七人君为请於台得县置仓而官自领之民乃不苦去丁父忧终制为袁州军事推官州将有不谨事为猾吏所持噤不敢整而吏益横州将召君屏左右言之泣下君曰此易剿者数日撻其奸而窜之吏有年劳应被优獎而将死者临终乞以子自承州通判欲与他吏君争曰优獎所以待年劳吏勤知为其家而已今不幸死而子不得承然则吏无事於勤矣彼他吏独无年劳可俟乎於是君从议萍乡令不职转运使以君易之君至县囚数百旬日平决之

狱遂空萍乡狱未尝空也转运使讽君发前令罪以逞君辄谢以不能而为救解之曰不敏人可恕前令得善解数月君疾病以治平元年十一月某甲子不禄某年月日归葬於先莹壽四十君为人恺悌端厚内外无间言至所宜辩则亢?无避已所允蹈不以顾慕少移也在舒时王介甫躬尚俭素僚佐皆强傲之君独鲜明被服如常介甫滋重之曰不骄伪以失己所以为贤也自君谪介甫南都蔡子直诸公皆世知名巨人而各荐君其余使将爱君盖又多而临淄兄弟未尝以君托大吏或问之公曰是甥有才当自显何赖吾言言之乃所以恩甥君之见待於公如此自为布衣时师儒有所乏辄力济之寒而解衣饥而分食歿齿不怠至今士大夫及识君者言至必悼惜再三君娶南城危氏有一子曰孚为进士四女当君弃世时皆未许嫁盖葬後十有若干年孚用相地师说改葬君於某所之原而南公为之序志其略亦铭之曰

异哉邱乎有穿斯藏而不宅乎愚万亿之年叹其贤於此书

临川王君墓志铭

临川处士王君弃世即小祥其孤择?持援拟以状来言将葬先人得吉地於郡南五十里大科山之阳占以明年某月某甲子封维志有石谒子文刻之余与择等游盖久故不辞而为之序次初违命底亡大兵岁临江生人困於赋调则散徙以蕲脱祸於是时闽平已久抚建昌间无边檄警扰故徙者依焉处士之鼻祖实始挈家以来临川讳某讳某讳某者次鼻祖以至处士者也好善力田为邑良民处士讳旷字若谷为人端洁静恭事父兄尽力与人交以信常年饥减谷价以予民不为财户挽挈治药剂赴穷疾不幸无以瘞则具棺掩之里之人以是衔恩特敬儒生教子学必附豪杰士资遣之惟恐後制诰王舍人辞召卧金陵天台王令弃官从之游日讲文义士子归赴如市处士命?往焉既而舍人入翰林遂预大政更新学校持一道德同风俗之论学者响集京师以数千?在其中淬濯磋磨器业大成亟欲归养处士谕止之故捐馆之日?不及见处士少壮时读经传诸子能泛通其意而嗜释老说深笃其志以徼福於亲而已前卒之五旬自呼匠治棺衾家人异之谗曰劳佚迭更何怪焉及病且殆犹盥栉应宾戚其庄盖如此元丰元年十月乙卯处士实启手足距其始生为春秋五十二妻周氏有子五人?尝试礼部矣择持皆吉士善治生援拟尚幼女一人嫁进士陈习铭曰尊德乐义非贤莫安事亲从兄致实其难咨若人兮惇慕弗援畏日不足詎知尽年五子六孙唯善之勤沄沄其术汨汨其源曷予尚之铭坎其文

亡友黄显翁墓志铭

显翁姓黄讳垵余少时与同里学其父讳某余铭其墓以为贤丈人者也显翁幼穎俊日纳千言俄遽记忆自作篇咏灵指讽不俟声律师教晓稍长窃出随诸兄治举业山舍宗党爱异之既冠游闽吴庠序程课辄登上列二十五被乡贡罢归愈刻激期得仕一再不合年四十余矣於是放怀除当世慕望朋游为咄嗟而显翁不戚戚也曰士不见於懵繆则又何求熙宁十年正月己巳出三十里访故人辛未还过从祖姑留饮大醉卧子夜抚床呼同馆笑语良久起出户便旋复就枕鼻不鸣其僮以掌微伺之叫曰气絶矣旦日?归遂成丧明年改元元丰壬辰葬父墓面五百步所曰溪白北原其息子充来请铭曰善先人能叙其平生舍君宜谁归实许之

呜呼显翁不幸止尔孰为使之者夫士诚有才无适而不利用顾其所极有大小良恶则亦惟其时焉耳必当夏后商周之盛其有不尽之叹不用之恨矣乎地居一同而长正宰师待焉其蘊每厚则其任每上夫何叹恨之有黄氏籍南城余百载其世溢十其宗从杂六七百室其名穎俊初维显翁然亦止此尔是则士生汉魏以後虽诚有才犹与凡民无必异之势也呜呼显翁孰使不幸迁固至昉史述千卷南城人列於传两武夫而已周廸危全諷是也名德公卿亡矣贤豪固不出下国乎遭遇无期运乎一何寥落之穷哉余不得而论之徒遗显翁以铭其辞曰

曷不信古虑时我弃相邀脆腐曰尚德志谓子则戾有既似之谓出且協有曾莫施舒余斯冈东近先塚嗒无珠矣安此奚恐

黄土衡墓志铭

士衡讳均南城人为乡盛宗曾祖惠传祖光震父质皆好善不仕士衡少笃学师友所称为人沈毅恭慤嶷然士君子器也熙宁七年客游淮湖五月某甲子疾病卒於广州黄陂县之逆旅於是壽四十六其子无逸以柩归元丰元年三月某甲子葬於某乡某里之桃原士衡娶胡氏有四子无逸其长也通经术富辞才能使其家有闻宜在乎此次曰某某某二女嫁饶某铭曰

父母好善子未必才亦既才矣志或不谐猗咨士衡嗣庆方来特不及仕讎已焉哉堂堂襟衷委翳幽埃於穿列铭维用告哀

傅野墓志铭

君傅氏讳野字亨甫幼有节操屹然慕古豪杰风逮以进士试数不中而人推其才学李觐初有乡曲名声君抵以书曰名不可妄得也当共赋短长耳觐异而交焉其後觐黜於秘阁归君与陈次公以师长事之吁人由此知有先生弟子君辞高古於诗最奇崛常执韩柳李杜编语人曰必知此乃当下笔尝客舒州与建人黄莘余翼文酒相酬士民传美以为未有是时之人王韶年少学官在舒投记愿交君纳之别十许年韶为建昌司理掾访君沙溪山延置门下且荐於守使会诸生黄察等许君高才滞淹守使以闻有旨赐君粟帛以充军学教授然君不习佞与俗子殊品致益顛顛无聊久之韶受命治熙河功有绪信呼君君往依之奏为熙学教授督役筑香子城城成例赏君得试将作监主簿明年召还朝论事殿中方已即言傅野有文章学术而老未仕愿补东南一官以便养母上可之君调明州定海县尉未几熙河市易务檄浙使者责君偿贷务钱绢七百贯匹其实华陰人有与君同姓名者贷之而务官前後不参详谬以责君君不服浙使者上言明州去熙河万里移檄来往甚烦请及傅野官满録送理对有旨即遣不必官满於是时君尉定海既四年而无代者後於华陰已得其人矣使者以朝旨不敢违君遂至熙河而无所辨君有子久於熙河无乡思君以为感及是日促之归子辞以营什一息未竟君为少留而经略使用君摄领粮饷迫贼界中寒气下利卧十旬死於河州学舍元丰五年五月戊申也七年君孙蔡裹君骨归以某月某日葬於某所君为人轩豁善醉不修恩讎方穷悴时俗子多所侮慢而君终身不忿憾其於孝弟尤力虽侮慢於君者不敢擯也许抗为

人言观傅野负米奉亲则吾徒有禄为可愧君在军学也诏去试秘阁而小人媚忌君蒙慰荐相与造飞语谤君於守守疏君於是时君穷为平生第一然百计不使老母愁辛身与妻儿余官仓腐米鬻菜粥以度日而母独常鱼肉白饭不悟其贫云其族沙溪数百口有以事抵城邑君必饮食之久而不怠其财之有无与兄弟无彼我虽侮慢於君者不敢不叹息也君所为文章号通藁二十四卷邓润甫尝序之君既卒而兄子默复集後书杂益之总三十卷去通藁之号藏於家君父讳垂范李觐铭其墓者也母邓妻陈各有妇德君生丁巳死壬戌首尾六十六年铭曰

力为古文章兮与衆殊途裕吾江海兮人则潢污举国醉兮醒者非夫千金技就兮焉屠猗嗟君兮伟儒而卒於崎岖文之故乎抑命欤何居吁

陈子纯墓志铭

职方员外郎南城陈微之之嫡子约字子纯天姿聪明奇略人也自职方始仕为州县吏四方以至为郎领郡未尝恤其私一以付子纯而其经理调脂委曲尽善其始年费一其季年百千之而未艾其为无所欲则已欲无不致致无不具具无不宁盖常视成於文酒笑谑之间而他人则戮力残身莫之及者江岭闽吴之人语为家子纯必在所称南城则樵渔牧豎阡谷细眈无不知诵子纯姓字余为学时聆听所熟云尔比少长从羈旅游而子纯既不幸早世矣识其子姝而友之岁月考诂子纯所以为家其规画纲条畅達刚强去四五十许年而不紊或小易之辄失其宜窃尝叹息以为古之人得一国而辅之言入计行四境歛张毕在股掌之内世以谋臣命之矣然目一瞋而法度所陈能使後人毋我变者几何人哉以子纯志之所营才之所集卓越如此诚令得国而谋之其有不给乎哉夫时之所遭则有不同而谓世或无士者幪幕之论也子纯之死以嘉佑七年四月乙酉其壽四十二是时职方为循州讞至职方曰吾亡二子矣安能复仕遂告老归葬子纯於可封乡之王家原後二十五年墓宅师订其地为不吉於是子纯之长子京亦已死矣次子亢改卜得可封之鼓楼冈迁而窆焉是岁乙丑元丰八年七月乙未也余固尝推美子纯之设施惜其止於一家矣而亢友於余良厚故为之铭曰

嗟矣谋国而莫吾用于其为家如屋斯栋我运我智我成我才则兢则完由彼乎哉呜呼止矣其壽维嗇其谁知之列此幽刻

傅夫人墓志铭

余妻之母危母傅氏两家皆业儒术子侄以俊秀游友其乡是故世有姻好维南城之危起家始拱辰实淳化三年进士终屯田员外郎赠光禄卿傅氏始容庆历六年丙科以鄱阳尉谢病归遂不出然两家之仕者自是不絶夫人容之娣而拱辰之第三男妇也年二十而归归三十六年而嫠嫠二十六年而卒维光禄为人崛杰高亢其配长安县君丁亦以肃飭为闺门常而夫人在娣姒间见谓无违不激不委唯正之师唯是之从其及既嫠则壹素以严刻刻勤辛恶衣菲食以致给足治丝枲纫缝诸儿能诵书使坐前旁持久与俱不夜分不言寐子幼则子孙幼则孙无日不然闻人为善喜见於顔语如其色宾客过家供具饌饮频数不厌嫁子娶妇

问其世於礼义何如而不及贫富也有二男一女长之武嘉佑二年礼部试不中死汴京次之邵今为惠州河源县主簿女适袁州军事推官丰城李冕凡夫人之女孙外女孙皆以予名士为愜其三男孙曰淳力行好古曰滂早死曰涇亦试礼部矣嗟乎夫人好德乐善恳至如此使其所以值待每若盛古之时则其志意之得可胜道哉熙宁十年九月某日夫人卒壽八十二明年十一月某日葬於富阳里之簒原葬八年矣之邵始於铭取余文余辞而不许则为之其文曰

处则静女嫁而正妇曰既有子鬱为严母假哉德矣维具之为贤维任之攸艰而夫人举焉弗序弗传畴以慰其然

丁氏墓志铭

夫人为丁氏女十有七年而後嫁为黄氏妇二十有八年而下世熙宁十年十二月癸未小斂明年二月庚申封其生也誉者倾乡其病也问者色忧其死也吊者声哀丁黄俱富族而夫人不於侈泰之非涕泗数十百而衆无间於贤善之名谓文王不作而汝坟江汜之风不可髣髴者岂非迂儒之论哉讳文惠父也希旼夫也渊子也陈识丁蒨聂展皆婿也礼教乡之龙穴葬地也渊好进士学号勤敏其从予游也久故於是来请铭为之文曰

室家之宜兮壽考之亏兮世道之悲兮

陈处士妻叶氏墓志铭

陈处士之夫人叶氏世居建安曾王父某父某皆故不仕夫人为女慧为妇顺为母慈以明内外称之归陈氏经事三姑後姑处之每过前姑凡岁时祭祀滌器调饌必躬亲未尝以委奴役其於族与宾如其祭其视夫之兄弟息如己出处士早世夫人遵其志教飭子孙延儒师能尽情诚乡间有急辄悯济之饥给以食危援以力盖其常夫人母春秋高所以存奉踵武相望母为人言吾女敬养我贤於男云其至行如此元丰元年夏六月某甲子夫人卒於是壽七十余一凡生七男四女男某某举进士女嫁张孝杰林景则张惊雷殊某月某甲子葬夫人祔处士君之莹实丁阮山铭曰

孰不有归我图必宜无非无仪允蹈成之離離夫人正顺之师载扬其芬刻以铭诗

汤处士游夫人墓志铭

元丰五年冬十一月壬辰南丰处士汤君丧其内游夫人不即葬明年春二月己未饭僧於见客堂处士拜佛稽首百下亦卒是冬十月癸酉其孤举二丧窆於龙池乡东户里之佛塔窠同位而异穴先时以牛马走来请曰维亡父生平好善足未尝历州县庭口未尝扬人过恶事亲期适而已不敢壮有余而老不足接人趋恭而已不敢论贤而诋不肖夫然故州间以迪吉归之而远近宾客日至维亡母实能佐佑其治非不生财也而知以发其身故内无奉养之阙而

外有賙濟之譽虽不积而不悔是维吾亲德行愿得铭以志诸幽以传无穷其许我哉余盖未识处士特熟其孤於逆旅耳请勒铭诗非所敢爱也按汤氏之先闽产或言本姓殷为国朝讳而改或言亦南史汤之系无谱牒可据未知其孰是其徙家南丰距处士为五世曾祖某祖某父某处士讳某字顺之游姓出九国时亦不知其所受若徙之初也曾祖某祖某父某夫人壽五十五而处士多其三岁有五男子曰震桓复济深而震深为进士各有时名二女子适游某杨某孙若干人铭诗曰

相从载祀六六乎而方隆繹义淑睦乎而遽终倾兮躅续乎而渠以占之其使之孰乎而书以志之其履之谷乎而

祭文

祭傅梦弼文

呜呼辞场屡隳穎悟多才人以为祥君以为灾庚子来今春秋十四子於其间荐名相继上求声律子?人先上求经术子占万全惟子之文无往不适譬如江涛悍浩冲击湍澜所到骨竦毛寒一篇时出百室愿观师勉其徒翁祝其孺期子之肖否则忧虞谓子程辙超遥过人青云坐登指在朝嚙命不与谋差因所拟谁令骏足不极千里东人之子一荐罢归白首摧颓卒换蓝衣西人之子再荐如忝等之闲常亦掇官检嗟子视此两不一如五试南宫夙愿徒虚淮康关涂六出六入终以失意客死其邑游旧莫顾宗姻弗闻一世胸襟奄忽埃尘本欲荣亲先亲而没亦曰行道位将名拂辛勤二纪刻砺磋磨毫髮不谐非灾谓何蒙庄有言外物难必嗟子之智于何不察势有所轧情无不驰嗟子虽才意困於为早泰晚屯前夷後戚人间共讳唯子兼得利不可究名无足云首阳东陵同是误身惟彼彭殤兹不在计行情致哀愚智一揆倾觞展诀旅櫟在斯灵乎清宁其尚知之